

DE DIDXZAAC XTE JESUCRIST NI BCUAA SAN LUCAS

¹ Zienzi de bniety abaandeb pur bcuaadeb de ni aguc cun dunnì,

² zectisy ni bseed de bnietni dunnì. De bniety ni guná xa guc desde chi guzulo btìch Jesucrist xtiidx Dios ne néza laadeb gucnédeb brìchni.

³ Ne ziyza nare abaania pur guchiiia xapac xquel guc desdì gulo. Pur ñingui, xmiguua Teófilo, riluua güenqui icuáa de cosré par liú, xnez xnezni,

⁴ par gachezaaczacu cún ni ná didxldí de lo irate ni abseeddeb liú.

⁵ Chi guc Herodes rey xte Judea, gubány tuby bxoz ni bdialá Zacarías. Laab gucbì tuby bxoz ni bdxaa lo tuby cuua de bxoz ni bdialá de xpiny Abías. Chial Zacarías bdialá Elisabet. Laab zéedbi lo xfamily to bxoz Aarón.

⁶ Iroptedeb gubánydeb zec ni riáld nez lo Dios ne bcuadiagdeb baandeb zec ni ná ley xte Dios ax quít tu chaleeti inii dec laadeb napdeb duld.

⁷ Per ruteete lliindeb quít guuti te pur Elisabet quít nialeeti nicáab bdoo ne ziyza iroptedeb la binguldeb.

⁸ Guu tuby dxi biáld de bxoz ni bdxaa bxoz Zacarías lonii par gúndeb sirvi lo Dios.

⁹ Chiy zec ni guc costumbrì xte de bxozqui gudziñdeb suert par dún tú yáld chalduu guxaal rut mazru nadá láani yudoroo xte Jerusalén, ax

biáld Zacarías biiub láani yudoo xte Dios rut mazru nadáqui par güelduub guxaal.

¹⁰ Lalzi ni caguub guxaal, irate de bniety canaabdeb lo Dios lo ldedoo.

¹¹ Chiy bliulo tuby ángli xte Dios lo Zacarías, zuldí ángliqui lad naldí lo bcuu rut caguub guxaal.

¹² Chi guná Zacarías ángliqui, quit racbeetib xa gúnbi ne quesentiand bdxibbi.

¹³ Chiyru raipy ángliqui laab:

—Zacarías, quit rdxibiu. Dios abaanny cuend ni rnaabu lony. Liú cun chialu Elisabet chúu tuby llingaanti chiy cuelátby Juany.

¹⁴ Quesentiand saclaazu ne zieny de bniety saclaaz chi gal bdooqui.

¹⁵ Te pur llingaanu laaby gacby tuby ni quesentiand sac nez lo Dios. Quit guéetiby vin nicza ni rsuz bniety, ne anste ni galby arbeznéxgaby Spíritu Sant.

¹⁶ Ne pur laaby quesentiand zieny de bniety Israel ibíi itodeb Dad Dios xtendeb.

¹⁷ Juanyré sanidybi lo Dad ni teru gueed ne sbeznéb Spíritu Sant ne zapbi guelrnabee zecac ni gúp profet Elías, par chalee ibanyné de dad de lliinni naldiu sin didxguidx ne par gachee de ni quit rcuadiag diidx xa xquel ná par icuadiagdeb diidx. Ziy xquel cuxnezbí de bniety par gúndeb cuend Dad ni gueed.

¹⁸ Chiyru raipy Zacarías ángliqui:

—Nare rliluaa quit gacti zec ni guniibiu te pur nare anaa bingul ne ziyza chiala.

¹⁹ Ángliqui cuaibny:

—Nare naa Gabriel. Nare cayuna xmandad Dios. Laany bxiaaldny nare par zedtixtiia de rsonré loo.

²⁰ Per anre, liú quit güeldilaaztiu ni guniia liú. Pur ningui yáanu gúp ne quitga chaleeti iniiu axtisy dxi ni gal llingaanu chí gac zec ni aguniia liú.

²¹ Lalzi cayac ziy, de bniety ni zuguaa dets yudoo canuudeb idiia Zacarías. Rdxalodeb te pur cayacldaab láani yudoo.

²² Chi bdiia Zacarías, quit releeti iniib. Chiy gubeedeb dec nuu xi cos gunáb láani yudooqui, ax runbi seny lodeb, per laab abíianbi gúp.

²³ Chi bialo de dxi ni baany Zacarías sirvi láani yudoroo xte Jerusalén ax zíab lizbi.

²⁴ Chi gudeed guc ziy, chialbi Elisabet bguaad Dios laab bdo, ax quit bdiitatib lizbi gaay búiu. Runbi xgab rniib:

²⁵ “Xtadni Dios baanny ziy cun nare anre par quitru gún de bniety burli nare.”

²⁶ Chi bialo xoop búiu, Dios bxiaaldny ángli Gabriel tuby guidx xte Galilea rut lá Nazaret

²⁷ par güetixlob tuby dxaap ni lá María. Laab a ná par guchnaab tuby bniety ni lá Gusé ni zá lo xfamily to rey David.

²⁸ Ángliqui biiuny laniuu rut rbez María ax guniiny:

—¿Xac María?, liú ni abcuaabee Dios. Xtadni Dios zuguané liú. Dios abanldee quiu de lo irate de bniety gunaa.

²⁹ Per María chi gunáb ángliqui quesentiand rdxalob pur de xtiidx ángliqui ne runzacbi xgab xi zelo de diidxqui.

30 Chiy raipy ángliqui laab:

—Quit rdxibiu María. Dios agulény liú par gunldeeny quiu quesentiand.

31 Anre acuezníu necidá xte tuby bdoo ne bdoo ni icóoqui ax cielooby JESÚS.

32 Ne zapby guelrnabee ax cuelé de bniety laaby Lliin Dios xte llayabaa. Chiy Xtadni Dios gúnny laaby rey zec ni guc to xpíngulby David

33 par inabeeby lo naciony Israel par chazy. Ne guelrnabee xtenby quit chúuti dxi ldullni.

34 Chiy María raipbi ángliqui:

—Per, ¿xo gac ziy ne nare gady chúuti dxi cueznía nguú?

35 Chiyru raipy ángliqui laab:

—Liú icóo bdooqui pur Spíritu Sant ne horqui guelrnabee xte Dios ni rbez llayabaa icuabldany quiu zec chi rcuablda tuby zá quia bniety. Pur ningui, lliiniu ni teru icóoqui, Dios isiacdee laaby ax inii de bniety dec laaby náby Lliin Dios.

36 Ziyza xprimu Elisabet icáab tuby bdoo masqui anáb bingul. Bniety ni rniideb dec quit chaleeti icáa bdoo, aguc xoop búiu rbezbi necidáqui.

37 Te pur quit xi costi nagán par Dios.

38 Chiy gunii María:

—Xtadni Dios ná ni rnabee nare. Su chagac zec ni aguniiny cun nare.

Chi gunii María ziy, chiyru zé ángliqui.

39 Láani de dxiqui zégac María tuby guidx ni ná láani de dany Judea.

40 Chi biuu María láani liz Zacarías ax guninéb Elisabet.

41 Chi bindiag Elisabet rsee María, bdoo ni nuua Elisabet bzeesby láanbi, ziy xquel quesentiand gulezné Elisabet Spíritu Sant.

42 Chiy quesentiand diip gunii Elisabet:

—Dios abanldeeny quiu, María, de lo irate de bniety gunaa ne ziyza abanldee Dios quia lliiniu ni icóo.

43 ¡Dichos nare ningui zedtxilo xnan Dad Dios xtena nare!

44 María, horac ni bindiaga guniiu, llingaana bzeesby láania tant rzaclaazby.

45 Dichos liú, María, pur ni güeldilaazu, te pur zac cumplir ni gunii Xtadni Dios liú.

46 Chiy gunii María:

Quesentiand rniia de diidx zaac lo Dios

47 ne quesentiand rzaclaaza pur Xtadni Dios ni racné nare.

48 Te pur masqui názia tuby ni cayun sirvi lony, per anre abcuabeeney nare par gac zec ni ná xgabny,

ne desde anre par chazy de bniety sniideb xíclaboo.

49 Te pur Dios ni rnabee abaanny de cos güen par nare, ne laany nány sant.

50 Ne Dios zeza rgány irate de bniety ni run cuend laany,

51 ne zieny ni abaanny pur guelrnabee xtenny ax rungány de xgab xte de bniety naroo.

52 Ne bdzicány guelrnabee lo de ni rnabee. Chiy de bniety ni nadolaaz ax bdeedny guelrnabee.

53 De bniety ni runlieedxni bguaadny laadeb zieny guelnazaac.

Chiy de ricu bsáanny laadeb sin xíteete.

⁵⁴ Gucnény de bniety Israel ni rac xpínny ne quit bianlaaztiny dec ná par ilaslaazny laadeb.

⁵⁵ Zecqui ni raipny de to xpingulni, Abraham, ne cun de ni zéed lo xfamilbi dec quit chúuti dxi cuelaazny laadeb.

⁵⁶ Chiy María guzuguanéb xprimbi Elisabet chon búiu, chiyru biecuibí lizbí.

⁵⁷ Chi bdziny dxi ni gul llingaan Elisabet,

⁵⁸ chiy de vecin ne de xfamily Elisabet quesentiand rzaclaazdeb güeguaadeb laab, te pur agucebedeb xa xquel blaslaaz Dios laab.

⁵⁹ Chi guc bdooqui tuxman, chiy güelduudeb seny tixby, seny ni ruu de bniety Israel, ax rcaazdeb nidialáby Zacarías zecac ni lá xtdaby.

⁶⁰ Per xnanby gunii:

—Laaby quit idialátiby ziy. Laaby ná par idialáby Juany.

⁶¹ Chiy raipdeb laab:

—¿Xínii idialáby ziy ne ruteete xfamiliu quit láti Juany?

⁶² Chiyru cun seny xquel gunabdiidxdeb xtdad bdoocqui par gachebedeb tú rcaazbí idialáby.

⁶³ Chiy xtdaby gunaabbí tuby ldaa bred par ícuaab letri, ax bcuaab lo bredqui: “Laaby idialáby Juany.” Chiy iratedeb bdxalodeb zec ni guc.

⁶⁴ Hóracqui Zacarías guzulo rniib stuby ax guzulo rniib de diidx zaac lo Dios.

⁶⁵ Irate de vecin xtendeb quesentiand rdxalodeb, ne irate de guidx ni ná láani dany Judea brüch diidx pur loc ni guc.

66 Ne irate de bniety ni guchee ziy, rundeb xgab ne raipdeb saadeb:

—¿Túdxa gac bdoogui?

Purqui laaby Dios abanldee quiaby.

67 Xtabdy Zacarías quesentiand rbeznéb Spíritu Sant ax guzulo rniib de diidx ni bguaad Dios laab, ax nab:

68 De diidx zaac ná par Xtabni Dios xte Israel te pur abedldány dunni ni nan xpínny.

69 Abni#dxny dunni tuby ni nap guelrnabee par ílda dunni,
tuby ni zá lo xfamily David ni ná xpiny Dios.

70 Ziy xquel baany Dios promes desdi gulal ne de profet ni gubány zec ni rcaazny laadeb bteeddeb xtiidxny,

71 dec gacnény dunni lo irate de ni rdxichné dunni,

72 ne ilaslaazny irate de to xpíngul gulalni, ne quitza yianlaaztiny promes ni baanny.

73 Promesré baany Dios cun to xtabni Abraham

74 dec gacnény dunni lo de ni rdxichné dunni par chalee idxanni sirvi lony sin dxiby,

75 ne par idxanni zec ni rcaazny iduibte ni ibánni.

76 Chiy, liú, llinganeena, idialoo profet xte Dios xte llayabaa

te pur liú san#diu gunzaacu nez par Dad ni gueed.

77 Liú ná par quixtiuu lo de bniety par chalee gacbeedeb xa xquel gacdeb perdón pur de xtuldeb.

78 Ne Dios xtenni rcaazny ne rgány dunni.

Ningui sxiaaldny llinny ni ná zec tuby bcháa xte gubidx par dunni,

79 par chalee ixalny xquelrieny de bniety ni zé nez mal ne de bniety ni run de duld ni riáld guelguty.

Ne laany cuxnezny dunnî par ibánnî zec ni riáld.

80 Juany güelaa güeroob ne güelaa guzutipnéb de cos ni zéed pur Dios, ax güeldezbî nez lo yiubiz rut quit tu rbezti axtqui chi guzulo bt̃ichbî xtiidx Dios lo de bniety Israel.

2

(Mt. 1:18-25)

1 Láani de dxiqui rey César Augusto gunabeeb yas tuby cens iduibte lo guichliu.

2 Ne primer güelt ni bias cens, chiy guc Cirenio gobernador xte Siria.

3 Ax irate de bniety ná par chiadeb ladxdeb par chagacdeb punt.

4 Pur ningui, bdiia Gusé guidx Nazaret ni ná nez Galilea par güeb Belén tuby guidx xte Judea, rut gul to rey David, te pur lo xfamily to rey David zá Gusé.

5 Güeb Belén par güegacbi punt cun María ni a ná par guchnaa cun laab. Ne María anuaab bdo.

6 Chiy lalzi zuguaadeb Belén bdziny dxi ni gul bdo.

7 Ruy bdziny llingulo María guichliu. Chiy María btuuibbi bdo.

8 Gax nez Belén nuu de pastor rcualodeb de xíildeb lo guiix idubyeelte.

⁹ Tuisqui bdiacá tuby ángli xte Dios rut zuguaa de pastorqui ne guelrcuabcháa xte Dios bzieeny iduibte rut zuguaadeb. Chiy quesentiand bdxibdeb.

¹⁰ Per ángliqui raipy laadeb:

—Quit rdxibti te nare zednía tuby güen rson par laat, ne pur rsonqui quesentiand saclaz irate bniety:

¹¹ andxiré ladx David agul tuby ni ílda laat, ne laaniy CRIST ni ná Dad.

¹² Ne par gumbeetny, güeldíte idxialti tuby bdoo ni teste gul, duuibby tuby ladaa ladiin nágaaby láani rut ro de ladxaa.

¹³ Hóracqui mazru zieny de ángli xte llayabaa bdiacá rut zuguaa ángliqui rniideny de diidx zaac lo Dios, laadeny guniideny:

¹⁴ ¡Xtiosten Dios ni rbez llayabaa, ne lo guichliu zuu guelnaldiulaaz par de ni cayun zec ni rdxalaaazny!

¹⁵ Chiy chi bieequi de ángliqui llayabaa, de pastorqui guzulo raipdeb de saadeb:

—Gultoo Belén, pis, choguiaan ni aguc ni agudixtee Xtadni Dios lon.

¹⁶ Ne quesentiand gueeld güedeb ax bdxialdeb María cun Gusé, ne bdooqui nágaaby láani rut ro de ladxaa.

¹⁷ Chi gunádeb ziy, ax beedeb diidx zec ni gudixtee ángliqui lodeb pur bdooqui,

¹⁸ ne irate de bniety ni bindiag rdxalodeb ni gunii de pastorqui.

¹⁹ Per María irate de cosré guluchuub láani lazdoob, ne runbi xgab pur de diidxqui.

20 Chiyru bieequi de pastorqui rzaclaazdeb rdeeddeb gracy Dios pur irate ni bindiagdeb ne ni gunádeb, pur guc irate zectisy ni gucdixtee lodeb.

21 Chi guc tuxman ni gulny ax guluudeb seny tixny, seny ni ruu de bniety Israel, ne guleládebny JESÚS zectisy ni raipy ángliqui María anste gaadbí bdooqui.

22 Chi bialo de dxi ni baany María zec ni ná par gún de gunaa chi rcáadeb bdoo zec ni rnabee ley xte Moisés, chiyru güenédeb bdooqui lo Xtadni Dios láani yudoroo xte Jerusalén.

23 (Laadeb baandeb ziy te pur ley xte Dios rnii: "Trate de nguiueen ni gal gulo, laadeby anádeby par Dios.")

24 Ax güenédeb gun par Dios zec ni rnabee ley, tiop gug o tiopza palom.

25 Tiampqui gulez tuby bniety Jerusalén, laab bdialáb Simeóny. La güen gucbí, ne btozacbí Dios. Laab canuub bniety ni gacné de bniety Israel. Ne Spíritu Sant rbeznény laab.

26 Pur Spíritu Sant guchee Simeóny dec laab quitga gatytib axtisy iniáb Crist ni ixiaald Xtadni Dios.

27 Ne ziyza pur Spíritu Sant güe Simeóny láani yudoroo xte Jerusalén. Chi güené Gusé cun María Jesús láani yudooqui par güegaanydeb zec ni rnabee ley,

28 Simeóny gudeezbí Jesús lonaab ax guniib de diidx zaac pur Dios, laab guniib:

29 Xtada Dios, azelee isaanbiu gatia naldiu, te pur laabiu abaanbiu cumplir promes ni baanbiu cun nare.

³⁰ Agunáa cun de bsluaa bniety ni gacné dunni,

³¹ laany bxiaaldbiuny nez lo irate de bniety.

³² Laany nány bieeny ni izieeny xquelrieny de bniety ni quit ná bniety Israel.

Laany nány bcháa par de bniety Israel xtenbiu.

³³ Gusé cun María xnan Jesús bdxalodeb pur de diidx zaac ni gunii Simeóny pur Jesús.

³⁴ Chiyru banldee Simeóny quiadeb, ax raipbi María xnan Jesús:

—Nare rguixtiia loo, María, bdooré anungueldby dec zienzi de bniety Israel quit chaldilaazti laaby chiy zienzadeb zeldilaaz laaby. Laaby zedliuuby bniety xa xquel rcaaz Dios ibánybdeb, per ziende quit icaazti laaby ³⁵ ne ziy xquel gacheeby xa ná xgab cad tuby bniety. Per par liú, María, zecpacza chi rdeed tuby spad láani lazdo bniety ziy iziieniu chi gac irate de cosqui.

³⁶ Láani yudooqui guzuguaaza tuby gunaa ni ná profet. Laab bdialáb Ana, lindraap Fanuel, ni zéed lo xfamily Aser. La abingulbi ne la bniinbi chi bichnaab. Laab gubanynéb chialbi gadz iz,

³⁷ ne aguc ochenta y cuatrí iz ni biiانبí viud. Nic tuby dxi quit rdeedti sin quit chiab yudoo, iduibtiamppte nuub yudoo rnaabbi lo Dios. Nuugüelt rcuanbi, quit rquiintib par renaabbi lony.

³⁸ Ne chi caniné María Simeóny, horqui bdziny Ana. Chiy chi gulull bdeedbi gracy Dios ax guzulo cayueeb diidx pur Jesús nez lo irate de ni canuu gueed bniety ni gacné Jerusalén.

39 Chiy, chi bialo baany Gusé cun María irate zec ni rnabee ley xte Dios, ax bieccuideb Galilea par zíadeb Nazaret rut ná ladxdeb.

40 Ne bega zeroo Jesús mazru guzutipny, ne mazruza nány ne quesentiand banldee Dios quiany.

41 Gazubizte re Gusé cun María Jerusalén chi rac laní pascu.

42 Chi blduull Jesús tsibtioip iz ax güe iratedeb Jerusalén zec ni guc costumbrí xtendeb redeb laníqui.

43 Per chi bieccuideb, chi gulull laníqui, Jesús biianny Jerusalén, sin quit gucbeeti Gusé ne nicliza xnanny María.

44 Laadeb baandeb xgab dec laany zíadny glay de bniety, ziy xquel guzadeb tuby dxi nez. Per chi gudíilydeb laany lo de xfamildeb cun lo de bniety ni rumbeedeb,

45 quit bdxialtidedbny. Chiyru bieccuideb Jerusalén par güetíilydebny ruy.

46 Chi guc chon dxi chiyru bdxialdebny láani yudoroo xte Jerusalén. Zubny glay de maistri ni nán ley, cacuadiagny ni rniideb ne rnabdiidxzacny laadeb.

47 Ne irate ni rindiagdeb rniiny quesentiand rdxalodeb zec ni nány ne zec ni rcaibny lodeb.

48 Chi guná Gusé cun María laany, quesentiand bdxalodeb ax raipy xnanny María laany:

—Llingaana, ¿xínii baaniu zeec? Xtadu cun nare quesentiand cadxúun guelrsaa cadíilyni liú.

49 Chiyru gunii Jesús:

—¿Xínii caguilyguibti nare? ¿Ta quit gánguibti dec nare ná par gúna xtsiiny Xtadá?

⁵⁰ Per laadeb quit gucbeetideb xi zelo ni guniiny.

⁵¹ Chiyru bieccuinény laadeb par guidx Nazaret, ne güelaatec bcuadiagny xtiidxdeb. Per xnanny irate de cosré guluchuub láani lazdoob.

⁵² Jesús güelaa güeroony ne güelaa gúpny guelrieny ax zeclí rzaclaazné Dios laany ziyza rzaclaaznéza bniety guichliu laany.

3

(Mt. 3:1-12; Mr. 1:1-8; Jn. 1:19-28)

¹ Chi guc tsaany iz ni canabee rey Tiberio, chiy Poncio Pilat guc gobernador xte Judea, Herodes guc gobernador xte Galilea, betsbi Liby guc gobernador xte Iturea cun xte Traconite, ne Lisancias guc gobernador xte Abilinia.

² Anás cun Caifás laadeb gucdeb bxoz ni rnabee de bxoz. Láani de dxiqui, Dios guninény Juany llingaan Zacarías nez lo yiubiz rut quit tu rbezti.

³ Ne Juany gudeedbi irate de guidx ni ná gax ruu gueeu Jordán ax raipbi de bniety dec ná par yialaazdeb pur de xtullddeb ne irubniszadeb te gún Dios perdón laadeb.

⁴ Ziy xquel guc cumplir de diidx ni bcuaa profet Isaías, te pur laab bcuaab:
Ríeny rsee tuby bniety ni rbixtia nez lo yiubiz rut quit tu rbezti ax rniib:

“Gulganzaac nez xte Xtadni.
Gulxal tuby nezldí.

⁵ Gulcha irate de barranc

ne gulgaany tubylo irate rut ná de dany ne de lóm,

ne gulgaany tiblyldí de nez ni ná teeb.

Chiy gulgaany tiblyldíza lo de nez ni nadxab.

⁶ Ne irate bingüichliu sniádeb ni ixiaald Dios par gacné dunni.”

⁷ Chi bdiia de bniety par itiubnis Juany laadeb, laab raipbi laadeb:

—¡Xípalza zecpacza de béeld vivti! ¿Tú gudixtee lot par ldát lo castiguroo ni abdzingax?

⁸ Gulbány zacru par yíany dec guldíacti rialaazti pur de xtuldti. Ne quit gauptit de saat: “Dunni nan xfamily to Abraham”, te pur nare rniia laat axt de guiaré zelee gún Dios de xfamily to Abraham.

⁹ Ne de bniety ni quit nabány xnez Dios zec ni riáld, laany zunnény laadeb zec ni runné de bniety tuby yag chi aquitru rca frut loni ax rtiuudebni par chaaicquini.

¹⁰ Chiy de bniety gunabdiidxdeb Juany:

—¿Xa xquel riáld idxanni?

¹¹ Juany cuaibbi lodeb:

—Ni nap tiop gamilly, ná par ideedbí tubyni elqui ni quit rápni. Ne ni ráp ziény comid, ná par ideedbí duudxni elqui ni runlieedxni.

¹² Néza duudx de biny ni run cobri xte impuest bdzindeb par irubnisdeb, ax gunabdiidxdeb Juany:

—Maistri, ¿xa xquel ná par idxanni dunni?

¹³ Chiyru raipy Juany laadeb:

—Quit gúntit cobri mazru guyally que ni rnii de ni rnabee laat.

¹⁴ Ne ziyza duudx de suldad gunabdiidxdeb Juany:

—Chiy dunnì, ¿xa xquel ná par idxanni?

Ax raipy Juany laadeb:

—Quit idzicátit xixten bniety, quit icuaquiatit dixú bniety ni quit ráp duld. Ne gulyáan cunformi zecti ni runti gan.

¹⁵ Ne de bnietyqui ójla laadeb yiub gacbeedeb la Juaniy ná Crist.

¹⁶ Per Juany raipbi iratedeb:

—Nare rtiubnisa laat cun nis. Per zeed tuby bniety ni itiubnis cun Spíritu Sant ne cun bal. Laany mazru napny guelrnabee que nare, ax nicli lo xcurachny quit riáldtia ixaicquia te pur mazru sacny que náa.

¹⁷ Ne zec chi ría trigu ziy gúnny cun bniety. De bniety ni nabány xnez Dios siáldny laadeb lo guelrnabee xtenny. Chiy de bniety ni quit nabány xnez Dios ax siáldny laadeb lo bal ni quit chúuti dxi yiuu.

¹⁸ Zeec xquel guniné Juany laadeb, ne cunru zieny de diidx xquel blidxbi laadeb par gudixteeb lodeb de didxzaac xte Dios.

¹⁹ Ne ziyza gudildnéb rey Herodes, te pur Herodes rbeznéb Herodías chial betsbì Liby ne ziyza pur de cos malru ni abaany Herodesqui.

²⁰ Per Herodes xlat ni niunbi cuend ni rnii Juany ax baanbi stuby cos mal: guluub Juany láani lizguiib.

(Mt. 3:13-17; Mr. 1:9-11)

²¹ Ne anste gac de cosré, chi btiubnis Juany de bniety, ziyza btiubnisbi Jesús. Chiy lalzi chi canaabny lo Dios, bllal llayabaa

²² ax biat Spírítu Sant zec tuby palom axt quia
Jesús ax bíeny rsee Dios llayabaa guniiny:

—Liú noo Llingaana ni la rcaaza ne ni la
rzaclaaznía.

(Mt. 1:1-17)

²³ Zecti treint iz nuu Jesús chi guzulony cun
xtsñny. De bniety bambeedeb Jesús zec
llingaan Gusé. Chiy Gusé rac lliin Elí.

²⁴ Elí rac lliin Matat, Matat rac lliin Leví, Leví
rac lliin Melqui, Melqui rac lliin Jana, Jana rac
lliin Gusé,

²⁵ Gusé rac lliin Matatías, Matatías rac lliin
Amós, Amós rac lliin Nahum, Nahum rac lliin
Eslí, Eslí rac lliin Nagai,

²⁶ Nagai rac lliin Maat, Maat rac lliin Matatías,
Matatías rac lliin Semei, Semei rac lliin Gusé,
Gusé rac lliin Judá,

²⁷ Judá rac lliin Joana, Joana rac lliin Resa,
Resa rac lliin Zorobabel, Zorobabel rac lliin
Salatiel, Salatiel rac lliin Neri,

²⁸ Neri rac lliin Melqui, Melqui rac lliin Adi,
Adi rac lliin Cosam, Cosam rac lliin Elmodam,
Elmodam rac lliin Er,

²⁹ Er rac lliin Josué, Josué rac lliin Eliezer,
Eliezer rac lliin Jorim, Jorim rac lliin Matat,

³⁰ Matat rac lliin Leví, Leví rac lliin Simeóny,
Simeóny rac lliin Judá, Judá rac lliin Gusé, Gusé
rac lliin Jonán, Jonán rac lliin Eliaquim,

³¹ Eliaquim rac lliin Melea, Melea rac lliin
Mainán, Mainán rac lliin Matata, Matata rac lliin
Natán,

³² Natán rac lliin David, David rac lliin Isaí,
Isaí rac lliin Obed, Obed rac lliin Booz, Booz rac
lliin Salmón, Salmón rac lliin Naasón,

³³ Naasón rac lliin Aminadab, Aminadab rac lliin Aram, Aram rac lliin Esrom, Esrom rac lliin Fares, Fares rac lliin Judá,

³⁴ Judá rac lliin Jacob, Jacob rac lliin Isaac, Isaac rac lliin Abraham, Abraham rac lliin Tare, Tare rac lliin Nacor,

³⁵ Nacor rac lliin Serug, Serug rac lliin Ragau, Ragau rac lliin Peleg, Peleg rac lliin Heber, Heber rac lliin Sala,

³⁶ Sala rac lliin Cainán, Cainán rac lliin Arfaxad, Arfaxad rac lliin Sem, Sem rac lliin Noé, Noé rac lliin Lamec,

³⁷ Lamec rac lliin Matusalén, Matusalén rac lliin Enoc, Enoc rac lliin Jared, Jared rac lliin Mahalaleel, Mahalaleel rac lliin Cainán,

³⁸ Cainán rac lliin Enós, Enós rac lliin Set, Set rac lliin Adán, Adán rac lliin Dios.

4

(Mt. 4:1-11; Mr. 1:12-13)

¹ Jesús quesentiand rbeznény Spíritu Sant chi bzany ruu gueeu Jordán, ne Spíritu Sant güené laany nez lo yiubiz rut quit tu rbehti.

² Ruy guzuguaany cuarent dxi ne guxin ax güegaany bñdxab prueb laany. Xíteete quit xi bquiintiny irate dxiqui, chiyru bldiaanny.

³ Chiy raipy bñdxab laany:

—Belati guldípacu noo Lliin Dios, gunabee gac guiaré guechtily.

⁴ Jesús cuaibny:

—Lo xquiits Dios rnii: “Gati púrzi pur guechtilti ibány bñiety sino que néza pur xtiidx Dios.”

⁵ Chiy güené bindxab laany yaa quia tuby dany ax horquí bliuungui laany irate de naciony xte lo guichliu

⁶ ax raipy bindxab laany:

—Nare inüdxá liú guelrnabeeré ne de guelnazaac ni nuu lo de nacionqui te pur xtena nádeni. Ne nare sdeedani elquí ni icaaza.

⁷ Belati sullibiu luaa ne itoo nare, irateni gac xtenu.

⁸ Per Jesús cuaibny:

—Lo xquiits Dios rnii: “Bto tubyzi Xtadu Dios ne tubyzi lony baany sirvi.”

⁹ Chi gudeedqui, chiy güené bindxab laany guidx Jerusalén ax biepnéngui laany quia yudoroo xte Jerusalén, raipy laany:

—Belati guldípacu noo Lliin Dios, biab desde ruuc axtquí niguét

¹⁰ te pur lo xquiits Dios rnii:

Dios sxiaaldny de ángli xtenny par icualodeny liú.

¹¹ Sldiasdeny liú cun naadeny par quit gunna guia de niuu.

¹² Jesús cuaibny:

—Ziyza rnii lo xquiits Dios: “Quit gúntiu prueb Xtadu Dios.”

¹³ Ziy xquel guc, chi quitru bdxialti bindxab xa xquel gúnbi prueb Jesús, ax gubicáb rut zuguaany. Canuutisbi xi dxi chaleeru gúnbi pruebny.

(Mt. 4:12-17; Mr. 1:14-15)

¹⁴ Jesús bieccuiny nez Galilea quesentiand napny guelrnabee xte Spíritu Sant ne iduibte de nezqui zaaiby xtiidxny.

¹⁵ Rseedny de bniety láani de yudoo irate de nezqui, ne iratedeb rniideb diidx zaac pur laany. *(Mt. 13:53-58; Mr. 6:1-6)*

¹⁶ Chiy Jesús güeny Nazaret guidx rut guroony. Ne dxi ni rzilaaz de bniety ax biiuny láani yudoo zec ni guc xmodny, chiy guzuldíny par biildyny lo xquiits Dios.

¹⁷ Bdeeddeb laany libri xte profet Isaías. Ne chi bxalny láani libriqui, bdxialny tuby lat rut rni:

¹⁸ Spírit xte Xtadni Dios zuguané nare te pur abanldeeny quiaa par iniia de didxzaac xte Dios lo de bniety ni ná prob. Abxiaaldny nare par gacnía de bniety ni nuu nalas, par quixtiia lo de bniety xa xquel ldádeb, laadeb ni rnabee duld lodeb, par ixala de bslo de bniety ciagu ne par gacnía de bniety ni cadeed guelzii.

¹⁹ Ne par quixtiia dec abdziny dxi ni arbez Xtadni Dios par gunldeeny quia de ni quíily laany.

²⁰ Chiyru bchii Jesús lo libriqui ax bdeedny libriqui bniety ni racné láani yudooqui ax guriny. Ne irate de ni nuu láani yudooqui güelaaru bguiaadeb laany,

²¹ chiy laany guzulo caninény laadeb, guniiny: —Andxigacré aguzub zec ni rnii lo xquiits Dios ni abindiagti.

²² Iratedeb guniideb de diidx zaac pur Jesús, ne quesentiand rdxalodeb pur de diidx zaac ni rniiny ax guzulo rnabdidxsaadeb:

—¿Ta gati laabi y llingaan Gusé?

²³ Jesús raipny laadeb:

—Nare nánpaca dec laaŧ teru iniit nare diidx ni rnii: “Doctor, baany rmıdy lagac liú”, ne sniizactı nare: “Ni bindiagnı baaniu guıdx Capernaum, baanza ziy ladxu.”

²⁴ Ziyza raipy Jesús laadeb:

—Nare rguixtiia lot nic tuby profet quit rcaaztideb laab ladxbi.

²⁵ ¿Ta quit renelaazti chi guu profet Elías? Gulalqui zieny gunaa viud guu lo naciony Israel chi quit biabti nisguia chon iz iruld ne iduibte nezqui guu gubiny.

²⁶ Per Elíasqui quit bxiaalŧti Dios laab par gacnéb tuby viud ni rbez Israel sino que par tuby viud ni gulez guıdx Sarepta, ni ná gax guıdx Sidón.

²⁷ Ziyza guu zieny bniety Israel ni guc guelguidx ni lá lepra chi beed profet Eliseu, per nic tubydeb quit bsiactib sino que laab bsiacbi Naamán tuby binzıt ni zá nez Siria.

²⁸ Chi bindiagdeb de diidxré, irate de ni nuu láani yudoo quesentiand bdxıichdeb.

²⁹ As güesuldıdeb par guléedeb Jesús láani guıdxqui ne quia tuby dany ná guıdxqui. Chiy güenédeb laany ruxchu guıdxqui par nizáalddeb laany desdi ruy.

³⁰ Per Jesús gudeedny glaydeb ax zégacny.
(*Mr. 1:21-28*)

³¹ Chiyru zé Jesús Capernaum tuby guıdx xte Galilea. Ruy, dxi ni rzilaaz bniety, laany bseedny laadeb.

³² Quesentiand rdxalodeb xquel ni rliuuny laadeb te pur rninény laadeb cun guelrnabee.

³³ Láani yudooqui nuu tuby bniety nguii ni nuu tuby bñdxab láani lazdooni ax gurixtiab:

³⁴ —Bsaanbiu dunni, Jesús de Nazaret. ¿Xíni riutébiu cun dunni? ¿Ta zéedbiu par initlobiu dunni? Nare rumbiia laabiu, ne náanna dec laabiu nábiu Bniety sant xte Dios.

³⁵ Jesús byaynény bñdxabqui guniiny:

—¡Dxichgaruu, bdiia láani bñietqui!

Chiy bñdxabqui bzáaldiy bñietqui nez lo iratedeb ax bñiangui láani bñietqui sin quit xi niactib.

³⁶ Iratedeb bdxibdeb ne bdxalozadeb ax guzulo raipdeb saadeb:

—¿Xi de diidxqui? ¡Bñietré napbi guelrnaberoo ne rnabeeb de bñdxab par rdiiadeb láani bñiety!

³⁷ Ne iduibte de nezqui rueedeb diidx pur Jesús.

(Mt. 8:14-15; Mr. 1:29-31)

³⁸ Chiyru güesú Jesús bñiany laniudoo zény liz Simóny. Xnansuegrí Simóny racxúb quesentiand nuub xliia, ax gudiindeb lo Jesús pur laab.

³⁹ Jesús guzurlony ax gunabeeny ibicá xliiaqui ax gubicá xliiaqui. Hóracqui güeste bñietqui ax guzulo bíub laadeb.

(Mt. 8:16-17; Mr. 1:32-34)

⁴⁰ Chi bieeyz gubidx, irate de bñiety ni racxú de xfamilni, güenédeb de bñiety ni ráp iralote guelguidx lo Jesús ax bzubnaany quia cad tubydeb ziy xquel bñiacny laadeb.

⁴¹ Zieny bñiety racxú, nuudeb bñiiaza bñdxab láani lazdoodeb rbixtiadengui:

—Laabiu nábiu Lliin Dios.

Per Jesús gudildnény de bindxabqui ne quit bsaantiny niniidengui te pur de niy nándengui dec laany nány Crist.

(Mr. 1:35-39)

⁴² Chi bragueel stuby dxi, Jesús bdiiany láani guidxqui par güeny tuby lat rut ná dxiruzi. Per de bniety gudílydeb laany ax bdzindeb rut zuguaany. Ne raipdeb laany dec suguanény laadeb quit chiatiny.

⁴³ Per laany raipny laadeb:

—Ná par chatixtiia xa ná guelrnabee xte Dios lo de bniety stuby de guidx te par ziy bxiaald Dios nare.

⁴⁴ Ziy xquel cuandzá Jesús guniiny xtiidx Dios láani de yudoo nez Galilea.

5

(Mt. 4:18-22; Mr. 1:16-20)

¹ Tuby güet Jesús zuguaany ruxchu nis xte Genesaret ax bdziny zieny de bniety, axtpacza rtaagudeb laany te pur rcaazdeb guindiagdeb xtiidx Dios.

² Jesús gunány tiop barcu ni quit xi nuuti láanni gax ruxchu nisqui, te pur de bniety ni rnaaz beld abdiadeb laanidéqui ax caguiibydeb xtarraydeb.

³ Chiy Jesús biiuny laany tuby de barcuqui ni ná xte Simóny ax gunaabny favor lo Simóny par idzib barcuqui mazru glay nis. Ax guriny lánqui par guzulo caliuuny de bniety desde ruy.

⁴ Chi gulull guninény laadeb, ax raipny Simóny:
—Güené barcuqui rut ná mazru guét lo nisqui ne gulcuaa xtarrayti lo nis par inaazti beld.

⁵ Simóny cuaibbi:

—Maistri, abdxanni dz#ny idubygueelte ne xíteete beld gady inaaztin. Per pur xtiidxbiu ningui icuáa tarray xtena lo nis.

⁶ Chi bcuaadeb xtarraydeb láani nis, quesentiand zieny beld gunaazdeb axtpacza guzulo ralliaa xtarraydeb.

⁷ Chiyru guridxdeb de xcumpnierdeb ni nuu láani stuby barcu par gacné laadeb. Chiyru güedeb ax bchatecdeb iropte barcuqui beld axt amer nieezdengui láani nis.

⁸ Chi guná Simóny Bed guc ziy, ax guzullibbi lo Jesús ne raipbi laany:

—Quit riáldti suguanébiu nare, Dad, te pur nare názia tuby binduld.

⁹ Te pur Simóny cun de ni zuguané laab quesentiand bdxalodeb pur tant zieny beld gunaazdeb.

¹⁰ Ziyza bdxalo Jacob cun Juany de llingaan Zebedeo de ni rac xcumpnier Simóny. Per Jesús raipny Simóny:

—Quitru rdxibiu te pur desdi anre itopu de bniety xlat ni inaazu beld.

¹¹ Chiyru guléedeb de barcuqui lo nis, bsáandeb iratequiy ax zenedeb Jesús.

(Mt. 8:1-4; Mr. 1:40-45)

¹² Chi zuguaa Jesús tuby guidx, chiy bdziny tuby bniety nguii ni aguzulluu cun guelguidx ni lá lepra. Chi gunáb Jesús, guzullibbi axt lo liu guzu lob gunilasbi lony:

—Dad, belati sigueldbui, laabiu zeleé isiacbiu nare.

¹³ Chiy Jesús bguaaldny laab ax guniigany:

—Rcaazla. Quebiac.

Chi guniiny ziy, hóracqui biac bniyetqui.

14 Chiyru raipny laab:

—Quit tu chagaipni xa xquel guc biacu. Lo bxozzi güeliuu liú ne güené ni riáld chanú zec ni gunii Moisés, par gacbee irate bniety dec abiacu.

15 Per dxi pur dxi mazru brüch diidx xi de run Jesús, ne zieny de bniety rdxasaa par guindiagdeb ni rniiny ne par isiacny laadeb de guelguidx xtendeb.

16 Per Jesús reny de nez rut quit tu rbezti par rnaabny lo Dios.

(Mt. 9:1-8; Mr. 2:1-12)

17 Tuby dxi Jesús caseedny de bniety ax zub tuby tiop de fariseu ruy cun de maistri ni nán ley de ni zá irate de guidx xte Galilea, xte Judea ne xte Jerusalén. Jesús bliuuny laadeb dec napny guelrnabee xte Dios bsiacny zieny bniety racxú.

18 Chiy bdziny tuby tiop de bniety nguiú zednédeb tuby bniety nguiú nágaab lo daa pur ni aguty tixbi, ax rcaazdeb niunédeb laab laniuuqui par izuubdeb laab axt rut zuguaa Jesús.

19 Per quit bdxialtidede calí nez níudeb te pur la zieny de bniety zuguaa ruy. Chiy bieepydeb quia yuuqui par bdzicádeb tuby tiop tej par bldiatdeb bniety racxúqui lo daa xtenbi glay de bniety rut zuguaa Jesús.

20 Chi guná Jesús dec laadeb reldilaazdeb ax raipny bniety racxúqui:

—Llingaana, abaania perdón de xtuldu.

21 Chiy de maistri ni nán ley cun de fariseu guzulo rundeb xgab rniideb: “¿Túlesa bniyetqui

ningui rsaclob Dios cun de xtiidxbi? Ruteete quit tu chaleeti gún perdón de duld quesoltisy Dios.”

²² Per Jesús gucbeegacny xa ná xgabdeb ax raipny laadeb:

—¿Xínii runti xgab ziy?

²³ ¿Cún ni nagánru par gac, ta gapiab: “Abaania perdón de xtuldu”, o gapiab: “Güeste, queguza”?

²⁴ Per anre iliuaa laat dec nare Bniety ni bxiaald Dios napa guelrnabee lo guichliuré par gúna perdón de duld.

Chiyru ax raipy Jesús bniety racxúqui:

—Quegüeste. Cuáa daa xtenu. Quebia lizu.

²⁵ Hóracqui bnietqui agüelee guzuldíb nez lo iratedeb. Chiyru cuáab daa ni guutbi lonii ax zíab lizbi, rniib de diidx zaac lo Dios.

²⁶ Iratedeb quesentiand bdxalodeb ne guniideb de diidx zaac lo Dios, ne quesentiand bdxibdeb ax guniideb:

—Andxiré gunán tuby milagri ni gady iniátin.
(*Mt. 9:9-13; Mr. 2:13-17*)

²⁷ Chi gudeedqui, Jesús bdiiany láani guidxqui ax gunány tuby bniety ni run cobri xte de impuest, laab láb Leví. Zubbi rut retilly de bniety xte impuest ax raipny laab:

—Guzanald nare.

²⁸ Chiyru güesú Leví bsáanacbi irate de cosqui ax zenaldacbi Jesús.

²⁹ Chiyru Leví baanbi tuby laníroo lizbi par Jesús ax guu zieny de cobrador xte impuest cunru zieny de bniety ni guriné laadeb lo millly.

³⁰ Per de fariseu cun de xmaistrídeb ni nán ley guzulo caniyádeb de xpiny Jesús, raipdeb laadeb:

—¿Xínii rquiinti ne réet cun de cobrador xte impuest ne cun de binduld?

³¹ Jesús cuaibny:

—De bniety ni nazaac ne ni nadaan quit xi lieedxti racdeb doctor sino que de bniety ni racxú, laadebiy racdeb lieedxi doctor.

³² Nare quit zeldtia par de ni ná güen sino que nare zelda par de binduld te par yialaazdeb pur de xtulddeb.

(Mt. 9:14-17; Mr. 2:18-22)

³³ Chiyru gunabdiidxdeb Jesús:

—¿Xínii cuenzi rcuuan de xpiny Juany Bautist cun de xpiny de fariseu, ziyza quesentiand rnaabdeb lo Dios ne de xpinbiu púrzi rquiindeb ne réedeb?

³⁴ Jesús cuaibny:

—Laat, ¿tatix zelee gaipti de bioos quit iquiintideb rut rac tuby saa chi zuguanédeb bíiny?

³⁵ Per teru idziny dxi ni ibicá bíiny. Chiyru icuuandeb.

³⁶ Ziyza raipny laadeb:

—Ruteete quit tu rtiuuti lday lady cuby par ica rmiand tuby ladiiuxy. Belati gún bniety ziy, lady cubyqui mazru rguillaangui ladiiuxqui. Ne quit yanzaacti lady cubyqui cun ladiiuxy.

³⁷ Nicza quit rdaati vin cuby láani de guidiiuxy, te pur belati gún bniety ziy, vin cubyqui rguillaangui de guidiiuxqui ax rac perdid zecli vin ne zecliza guidy.

³⁸ Pur ningui ná par taa vin cuby láani de guidy cuby.

³⁹ Ne nic tuby de ni rée viniuxy quit yiulaaztideb vin cuby te pur rniideb: “Viniuxqui ná mazru güen.”

6

(Mt. 12:1-8; Mr. 2:23-28)

¹ Tuby dxi ni rzilaaz bniety, chi zeteed Jesús de nez lo niaa rut nuu trigu, de xpínny guzulo raxdeb de do xte trigu, rllubdebni cun naadeb ax rquiindeb de trigüeenqui.

² Chiy gunabdiidx tuby tiop de fariseu laadeb:
—¿Xínii runti ni quit riáld gúnti de dxi ni rzilaaz bniety?

³ Jesús cuaibny:
—¿Ta gady guuldti lo xquiits Dios ni baany David tuby güelt chi bldiaanbi cun de xcumpnierbi?

⁴ David biiub láani yudoo xte Dios ax cuáab de guechtily ni abiacdee par bquiinbi. Ziyza bdeedbí de guechtilqui de xcumpnierbi ni zuguané laab, ne masqui de bxozzi ná par iquiiny de guechtilqui.

⁵ Chiy raipzacny laadeb:
—Ne nare Bniety ni bxiaald Dios napzaca guelrnabee par dxi ni rzilaaz bniety.

(Mt. 12:9-14; Mr. 3:1-6)

⁶ Stuby dxi ni rzilaaz bniety, Jesús biiuny láani tuby yudoo ax guzulo caseedny de bniety. Ruy zuguaa tuby bniety nguii ni gubiz naani lad naldí.

⁷ Ne de maistri ni nán ley cun de fariseu caldaatsdeb Jesús par íguiaadeb dún la siacny

bnietqui dxi ni rzilaazdeb, ziy xquel par gapdeb nez chúu xi icuaquiadeb Jesús.

⁸ Per laany nánnacny xi xgab cayundeb ax raipny bniety ni gubiz naani:

—Güesuldí. Güezuguaa glayre.

Bnietqui güesúb ax guzuldíb ruy.

⁹ Chiyru raipy Jesús laadeb:

—Inabdiidxa laat tuby cos: ¿Xi ná par gún bniety dxi ni rzilaazni? ¿Ta tuby cos güen o tuby cos mal? ¿Ta gacné bniety guelnabány o idzicá bnietni?

¹⁰ Chiyru bguiaa Jesús lo irate de bniety ni zuguané laany ax raipny bnietqui:

—Bldí noo.

Bnietqui baanbi ziy ax biac naab.

¹¹ Per stuedxdeb quesentiand bdxiihdeb, chiy guzulo raipdeb de saadeb xa xquel gúndeb contri Jesús.

(Mt. 10:1-4; Mr. 3:13-19)

¹² Láani de dxiqui, Jesús güeny láani tuby dany par güenaabny lo Dios. Gudedgueeltec gunaabny lo Dios.

¹³ Chi bragueel, guridxny de xpínny ax gulény tsibtiopeb de ni gulelány apóstol.

¹⁴ De bniétré ná ni bcuabeeny: Simóny ni gulelány Bed, Andrés bets Simóny, Jacob cun Juany, Liby cun Bartol,

¹⁵ Madeu cun Mally, Jacob llingaan Alfeo, Simóny ni bdxaa lo de cananista,

¹⁶ Judas bets Jacob cun Judas Iscariote ni baany entriagu laany.

(Mt. 4:23-25)

17 Jesús biatny quia danyqui cun de apóstol. Ax guzuguanény laadeb tuby lat rut ná tubylo, cunru zienguilliú de xpínny, ne cunru zienguilliúza de bniety ni zá iranezte, zeclí de bniety ni zá nez Judea, cun de bniety Jerusalén ne de bniety ni zá gax ruu nisdoo de nez rut lá Tiro ne Sidón. De bnietry beeddeb par guindiagdeb ni rnii Jesús ne par yacdeb xte de guelguidx ni rápdeb.

18 Ziyza biac de ni nuu bindxab láani lazdooni.

19 Irate de bnietyqui rcaazdeb niguaalddeb Jesús pur ni rsiacny iratedeb cun guelrnabee ni napny.

(Mt. 5:1-12)

20 Chiyru Jesús bguiaany lo de xpínny ax raipny laadeb:

—Xíclabaat, de prob, te pur laat riáldti lo guelrnabee xte Dios.

21 'Xíclabaat laat ni rldiaanti anre te pur laat teru guialti.

'Xíclabaat, laat ni cayúunti anre, te pur teru chúu dxi saclaazti.

22 'Xíclabaat chi rdxichné biny laat, chi rdialáa biny laat, chi rgué biny lot, chi run biny despresy laat zec tuby ni quit illiú pur causi ni reldilaazti nare Bniety ni bxiaald Dios.

23 Quesentiand gulzclaaz chi runné biny laat ziy, te pur laat zapti premyroo llayabaa. Te pur ziygac banné de to xpíngul de binqi de profet gulal xte Dios.

24 'Per probzacti, de ricu, te pur aguzaclaaztextgat.

25 'Probzacti ni rialti anre te pur teru ildiaanti.

'Probzacti laat ni rlliznégacti bniety anre te pur teru chúu dxi guunti pur guelnalas.

²⁶ 'Ne probzacti laat ni riulaazti rzubyaa irate biny laat te pur ziygac bzubyaa de to xpíngulti de profet fals ni guu chiy.

(Mt. 5:38-48; 7:12)

²⁷ 'Per laat ni cacuadiagti ni rniia, nare rniia laat: gulcaaz de ni callianné laat. Gulgac güen cun de ni rdxichné laat.

²⁸ Gulganldee quia de ni rgudé laat. Gulnaab lo Dios pur de ni rgué lot.

²⁹ Belati tu chia lladiagu, bdeed chiab stuby lad. Belati chúu ni idzicá xchamarru, bsaan chanéb né xcamilliu.

³⁰ Tutix ni inaab liú xirullzi, bdeedni. Ne ni idzicá ni ná xixtenu, quit gúntiu quej.

³¹ Gulgaany cun iraru de bniety zec ni rcaazti gúndeb cun laat.

³² 'Belati laat rcaazti púrzi de ni rcaaz laat, xíteete güenti quit cayuntit, te pur axt de biny mal run ziy.

³³ O belati gúnti güen púrzi cun de ni runza güen laat, ziyza quit cayuntit zec ni riáld te pur axt de biny mal run ziy.

³⁴ Ne belati laat idedlaat mily púrzi de ni rllot dec zelee quillydeb milyqui, quit xi güenti cayunti te pur axt de biny ni ná mal run ziy. Rdedlaadeb mily de ni rllodeb zelee quilly lodeb.

³⁵ Per laat ná par icaazti de ni rdxichné laat, ne gulgaany ni ná güen cun laadeb. Guldeed laadeb xitill cos sin quit icanuutit xi in#dxdeb laat. Ziy xquel mazru guroo ná guelnazaac ni yáldti llayabaa. Ne ziyza xquel par gacti de lliin Dios ni

rbez llayabaa, te pur laany ziyza güen nány cun de ni quit xi nayiulaaz ne cun de ni ná mal.

³⁶ Gulgá de bniety zec ni rgá Xtadni Dios laat.
(Mt. 7:1-5)

³⁷ 'Quit cubeetit ne quitza icuaquiatit bniety dixú te quit teedti ziygac. Ziyza gulgaany perdón stuby de bniety te gúnza Dios perdón laat.

³⁸ Ne bel xi runlieedx stuby de bniety, gulgacnédeb ne Dios in#dxza laat ni runlieedxzacti. Laany mazru ni iguaadny laat que ni ideedti. Te pur laany sguaadny laat zectiziacza ni rguaadti stuby de bniety.

³⁹ Ziyza raipy Jesús laadeb:

—Laat nánti dec quit chaleeti chané tuby bniety ciagu stuby bniety ciagu te pur nuu riezgu chayabdeb láani gu#dy.

⁴⁰ Nic tuby bniety ni caseed quit gánti zec ni nán maistrí sino que axtisy belati güelaazbi iseedbi, chiyru gacheeb zec xmaistríb.

⁴¹ 'Quit cubeetiu stuby de bniety pur falt bichiin ni napdeb güenru guu guelrsaa pur de faltroo ni cayunu.

⁴² Ne belati mazru faltroo cayunu, ¿xólesa gapiu stuby de bniety: "Quit náti güen runu zec"? ¡B#dixú! Nidootellga baany zec ni riáld, chiyru a zélee gapiu stuby de bniety: quit runu zec.

(Mt. 7:15-20; 12:34-35)

⁴³ 'Quit nuuti yag zaac ni rca frut ni nadxab lonii. Nicza quit nuuti yag dxab ni rca frut zaac lonii.

44 Cad tuby de yag rumbee bniety ni pur frut ni rca loni. Quit rcati hig lo yaguích nicza quit rcati uv lo de cuanguiix.

45 Bniety ni ná güen rniib de diidx zaac te pur laani nuu láani lazdoob. Ne bniety ni ná mal ax rniizacbi de diidx mal te pur malqui nuu láani lazdoob. Te pur desde láani lazdoob bniety rdiia ni rdiia ruu bniety.

(Mt. 7:24-27)

46 '¿Xínii rniit nare “Dad, Dad” ne quit runtiti ni rniia laat?

47 Iniiia laat xa ná bniety ni zéed cun nare ne rindiagbi ni rniia ax rcuadiagbi xtiidxa:

48 Laab náb zec tuby bniety ni rzuub tuby yuu. Nidoote rgaanybi guét axt idzinbi lo guia rut naguiiz ax rldiasbi cimient lo guiaqui. Chi reed nisroo masqui rlaní tix yuuqui, per nicli quit rseestini yuuqui te pur cimient xtenni ná lo guia.

49 Per bniety ni rindiag ni rniia, ne quit rcuadiagbi xtiidxa, laab náb zec tuby bniety ni rzuub tuby yuu ni quit nuu cimient xtenni. Chi reed nisroo ax rlaní tix yuuqui ax hóracqui rbebaaniy. Ne axt nicli quit xo icubytiiy.

7

(Mt. 8:5-13)

1 Chi gulull guniné Jesús de bniety, ax zégacny par guidx Capernaum.

2 Ruy gulez tuby capitán roman. Gúpbí tuby mos ni quesentiand rcaazbi. Mosqui racxúb apac mer gatybi.

³ Chi bindiag capitánqui rson pur Jesús, bxiaaldbi tuby tiop de bingul ni rnabee Israel par chanilasdeb lo Jesús par guedsiacny xmosbi.

⁴ Laadeb güedeb rut zuguaa Jesús ax guzulo banlasdeb lony, raipdeb laany:

—Capitánre riáld gacnébiu

⁵ te pur rcaazbi de bniety Israel ne gucnézacbi par guzub xquiudoon.

⁶ Chiyru güené Jesús laadeb. Per chi zedzingaxdeb liz capitánqui, laab bxiaaldbi tuby tiop de xmigubi par chagaipdeb Jesús:

—Dad, masqui quit idzinbiu liza te pur nare quit riáldtia yiuubi liza.

⁷ Pur ningui, nicli quit rcaaztia niadtíilia laabiu narepaca. Per guniibiu diidx desdi rut zuguaabiu par yac mos xtena.

⁸ Te ziyza nare rcuadiaga xtiidx de ni rnabee naa par chalee icuadiagza de suldad xtena xtiidxa. Chi gapia tubybi, chiab, ax zéb. Chi gapia stubybi dec gueedbi ax zéedzacbi. Ne chi rnabiia xmosa xi chagaanybi, ax regaanybi ni rapiab.

⁹ Chi bindiag Jesús ziy, quesentiand bdxalony pur de xtiidx capitánqui ax bguiaany lo de bniety ni zanald laany, chiy guniiny:

—Nare rguixtiia lot per nicli Israel gady idxialtia tuby bniety ni quesentiand reldilaaz Dios zec ni reldilaaz bnietqui Dios.

¹⁰ Ne chi biecqui de bniety ni bxiaald capitánqui lizbi, chiy gunádeb dec abiac mosqui.

¹¹ Chiyru Jesús zégacny tuby guidx ni lá Naín. Ruy güenény ne xpínny ne cunru zieny de bniety.

12 Chi bdzinny gax ruxchu guidxqui, gunány zécuaats de bniety tuby binguty ne tubyzib náb llingaan xnanbi ne viudza ná xnanbi. Zieny de bniety guidxqui zéne laab zécuaatsdeb llingaanbi.

13 Chi gunány ziy, Dad Jesús bgány bniety gunaaqui ax raipny laab:

—Quit ruunu.

14 Chiyru gubii Jesús ax bguaaldny cajónqui. Ne de bniety ni zéneb ax guzudxídeb ax raipy Jesús bniety gutyqui:

—Bíiny, nare caniia liú: ¡Quegüeste!

15 Chiy as guri bíiny ni agutyqui ax guzulo cayueeb diidx. Chiyru baany Jesús entriagu laab lo xnanbi.

16 Chi gunádeb ziy, iratedeb quesentiand bdxibdeb ax guzulo rniideb de diidx zaac lo Dios, laadeb guniideb:

—Tuby profet ni nap guelrnabee abdiacá lon.

Ne guniizadeb:

—Dios abeedny par gacnény de xpínny.

17 Ne iduibte Judea, ne de nezqui gucbee de bniety de cos ni abaany Jesús.

(Mt. 11:2-19)

18 Juany gúpbi rson xte irate de cosré te pur de xpínbi bené laab diidx. Chiyru gurídxbi tiop de xpínbi

19 ax bxiaaldbi laadeb par chanabdiidxdeb Jesús la laaniy Crist ni ná par gueed o la ná par icanuudeb stuby irinqui.

20 De bniety ni bxiaald Juany güebiideb rut zuguaa Jesús, raipdeb laany:

—Juany Bautist bxiaaldbi dunnı par yopnabdiidxni laabiu dún la laabiu nábiu Crist ni ná par gueed, o ná par icanuun stuby irınqui.

²¹ Horac ni bdzindeb, Jesús bsiacny zieny bniety ni cadeed guelzii pur de guelguidx ne de ni nuu bindxab láani lazdooni, ne ziyza zieny de bniety ni ná ciagu bxalny bslodeb.

²² Ziy xquel guc ax raipy Jesús laadeb:

—Gulchia ne gultixtee lo Juany irate ni agunát ne ni abindiagtı. Gulgüenéb diidx dec arianlo de ciagu, de bniety ni ná coj arelee rzadeb, ne ziyza abiac de bniety ni rac guelguidx ni lá lepra, de cuaat arindiagdeb, ne de binguty gubıı gubánydeb, chiy de prob ax cayacdixtee lodeb xa xquel gacdeb perdón lo Dios.

²³ Xıclabaa bniety ni quit cuezti chaldilaaz nare.

²⁴ Chi gulull zé de bniety ni bxiaald Juany, chiyru guzulo cayuené Jesús de bniety diidx pur Juany, raipy laadeb:

—¿Tú rlilot ná bniety ni güeguiaat nez lo yiubiz rut quit tu rbeztı? ¿Ta rlilot dec laab náb zec tuby yaxtily ni ruaa bı?

²⁵ O, ¿xa ná bniety ni güeguiaat? ¿Ta tuby bniety ni nacu de lady zaac? Laat nántı dec de biny ni racu lady zaac láani de palacy rbezdeb gati lo guiix rut nabiz.

²⁶ Pur ningui, ¿tú güeguiaat? ¿Ta tuby profet? Per nare rniia laat, laat güeguiat tuby bniety ni ná mazru que profet.

²⁷ Juany Bautist laabıy rzeet xquıits Dios rut rniı:

Rxiaalda tuby bniety ni sanıdy loo

par gunzaacbi nez xtenu.

²⁸ Nare rniia laat de lo irate de bniety guichliu gady chúuti tuby ni mazru sac que Juany Bautist. Per masqui ziy, bniety ni gulliaaru sac lo guelrnabee xte Dios, laab mazru sacbi que Juany Bautist.

²⁹ Irate de bniety ni btiubnis Juany ne de cobrador xte impuest ni btiubniszachi, chi bindiagdeb ni gunii Jesús, gucheedeb dec Dios runquiny zec ni riáld.

³⁰ Per de fariseu cun de maistri ni nán ley, quit nizigueltdideb nitiubnis Juany laadeb, ziy xquel baandeb despresy ni bcaaz Dios niun par laadeb.

³¹ Jesús raipny de bniety ni caninény:

—¿Xádxaza iniia laat ná de bniety ni rbez lo guichliu anre? ¿Tú zec nádeb?

³² Per nare rniia, laadeb nádeb zec de bniiny ni rguit nez lo guee ax rbixtiadeby saadeby: “Bcuidxni flauti par niyaat, per nicli quit niyaatit. Ne bdxuuldzacni tuby canciony nalas, per nicliza quit niuuntit.”

³³ Anre ziguiy nát te pur beed Juany Bautist ne laab quit rquiintib guechtily nicza quit réetib vin, ax laat rniit dec laab nuu bindxab láani lazdoob.

³⁴ Anre ax beed Bniety ni bxiaald Dios rquiinbi guechtily ne réeb vin ax rniit dec laab naláb, ne riulaazbi réeb, ne rdxasaab cun de binduld ne cun de cobrador xte impuest.

³⁵ Per irate de ni racbee, laadeb nádeb dec güenqui ná ni run Dios.

³⁶ Tuby de fariseu baanbi cumbid Jesús par chaquiinny lizbi, ax güe Jesús lizbi ax guriny lo milly.

37 Chiy tuby gunaadxab ni rbez lagac láani guidxqui chi gucbeeb dec Jesús zequiniy liz fariseuqui ax güenéb tuby botey perfum ni sac guyally.

38 Chiy ruunbi zuguaab llanii Jesús ax guzulo caguazbi de nii Jesús cun nis ni ruunbi. Chiy ax gusbizbi de niiny cun guichquiab ax bcharuubdeny chiyru bchab perfumqui de niiny.

39 Chi guná fariseuqui ziy, ax baanbi xgab: “Belati guldípac bnietqui náb tuby profet, zacbeeb túng caguaald laab ne zacbeezacbi xa nabány gunaac, te laab náb tuby binduld.”

40 Chiy Jesús raipny fariseuqui:

—Simóny, ná par iniia liú tuby cos.

Fariseuqui cuaibbi:

—Guniibiangui, Maistri.

41 Jesús raipny laab:

—Tuby bniety nguii bdedlaab mily tiop bniety. Tubybi bdedlaab gaay gayuaa denari. Stubybi bdedlaab cincuentni.

42 Iroptedeb quit nialeeti niguillydeb milyqui, per bniety ni bdedlaa milyqui raipbi laadeb dec quit quillytideb ni nazaabdeb. Anre gunii nare, de lo iroptedeb, ¿tú mazru rcaaz bnietqui?

43 Simóny cuaibbi:

—Nare rliluaa dec bniety ni nazaabby mazru guyally.

Jesús raipny laab:

—Guldícu.

44 Chiy Jesús bguiaany lo gunaaqui ax raipny Simóny:

—Bguiaa lo bniety gunaaré. Chi bdzinia lizu quit bn#dxtiu nis par chaady niia ne gunaaré

bguazbi de niia cun nis ni biinbi, ax gusbizbideny cun guichquiab.

⁴⁵ Quit bcharuutiu nare, per laab desde chi biiua, quit rbezti cacharuub de niia.

⁴⁶ Quit bchatiu perfum quiaa, per laab bchab perfum de niia.

⁴⁷ Pur ningui, caniaa liú pur tant ni rcaazbi nare, laab agucbi perdón pur irate de duld xtenbi. Per elqui bniety ni rlilo dec gady cuenzi gúntib duld, laab gullieezy rcaazbi nare.

⁴⁸ Chiyru raipny gunaaqui:

—Abaania perdón de duld xtenu.

⁴⁹ De bniety ni zubnény ruy guzulo rnabdidxaadeb:

—¿Tú bnietqui ningui axt de duld runbi perdón?

⁵⁰ Per Jesús raipny bniety gunaaqui:

—Agucu perdón te pur güeldilaazu nare. Zacru quegüe.

8

¹ Chi gudeed guc de cosré, Jesús cuandzány zienzi de guidx ni ná nezdequi. Guniiny ne gudixteeny xa ná guelrnabee xte Dios. Irate tsibtiop xpiny güené laany.

² Néza tuby tiop de gunaa ni guléeny bindxab láani lazdooni ne de ni absiacny xte de guelguidx. Lodeb nuu María ni láza Magdalena, laab ni guléeny gadz bindxab láani lazdoob.

³ Néza Susan cun Lluan chial Chuza, Chuza ni guc tuby de biny ni rnabee de xixten rey

Herodes, ne zienru de gunaa ni gucné laany cun loc ni rápdeb.

(Mt. 13:1-9; Mr. 4:1-9)

⁴ Zieny de bniety bdiideb de guidx par güeguiaadeb Jesús. Ne chi bdxasaa zieny bniety, laany benény laadeb tuby cuend, raipny laadeb:

⁵ —Tuby bniety nguiu bdiab güecuaab biny lo lliab. Chi cacuaabni, duudxni biab lo nez ax guaapy de bniety quiani ax gudo de maniinni.

⁶ Stuudxni biab láani de guia. Ne chi bldieny de binqui gubizdeni te pur banlieedxni gudx.

⁷ Stuudxni biab láani yaguích ax gunitlodeni te pur tubylote bldiennédeni de yaguích.

⁸ Per stuudxni biab lo liu zaac. Ne chi güeroodeni, quesentiand gucdeny, axt tuby gayuaaga biny guc cad tubyni.

Chi gunii Jesús ziy, chiyru quesentiand diip raipny laadeb:

—Irate ni rcaaz icuadiag, gulcuadiag.

(Mt. 13:10-17; Mr. 4:10-12)

⁹ Chiy de xpínny gunabdiidxdeb laany xi zelo cuendqui,

¹⁰ ax raipny laadeb:

—Dios rcaazny gacbeet de ni ná xgaats lo guelrnabee xtenny. Per stuby de bniety rniniádeb cun púrzi cuend te masqui rianlodeb, per lazu quit rianlotideb ne masqui rindiagdeb per quit racbeetideb.

(Mt. 13:18-23; Mr. 4:13-20)

¹¹ 'Squé zelo cuendqui: Binqui ná zec ni ná xtiidx Dios.

¹² Ne de biny ni biab lo nez, laani náni zec de bniety ni rindiag xtiidx Dios, per as zéed

bíndxab rdzicá xtiidx Dios láani lazdoodeb par quit chaldilaazdebni ne par quit gacdeb perdón.

¹³ Biny ni biab láani de guia ná zec de bniety ni rindiag xtiidx Dios ne rundeb recibirni cun gust, per quit zuguadzi#stideb. Reldilaazdeb duudx, per chi run stuby de bniety burli laadeb ax rtiulogacdeb, rsaanacdeb xtiidx Dios.

¹⁴ Biny ni biab láani de yaguích ná zec de bniety ni rindiag xtiidx Dios, per duudxga, duudxga ax rsaanacdeb xtiidx Dios pur ruudeb guelrsaa pur de guelnazaac ne irateru de cos ni nuu lo guichliu, ziy xquel ax aquitru runtideb zec ni rcaaz Dios gúndeb.

¹⁵ Per biny ni biab lo liu zaac, laani náni zec de bniety ni rindiag xtiidx Dios ne guldípacdeb renuudebny zec ni riáld ax rzutipnédebny, ne pur guelrzutipqui ax rundeb zec ni rcaaz Dios. *(Mr. 4:21-25)*

¹⁶ 'Ruteete quit tu rcuaguiti tuby linterni par idaagu quiani cun xitill o par chúzaquiy nii luun sino que ná par suubiy yaa par yianlo tutix ni yíiu.

¹⁷ Anre ziytiziaczaquiy xíteete ni nuu xgaatsti yáan sin quit gacbee bniety. Ne ziyza quit xi diidxti ni ná xgaats yáanza sin quit gacbee bniety sino que zuu chi gacbee bniety xnez, xnezizy.

¹⁸ 'Pur ningui, gulcuadiagzaac. Te pur elqui ni reldilaaz Dios zec ni riáld, dxi pur dxi mazru acazutipnéb xtiidxny. Per elqui ni quit reldilaaz xtiidx Dios zec ni riáld, zuu dxi ni axt quitru chaldilaaztib laany.

(Mt. 12:46-50; Mr. 3:31-35)

19 Chi güe xnan Jesús cun de betсны rut zuguaaany, chiy quit nialeeti nibiideb gax rut zuguaa Jesús te pur la zieny bniety.

20 Per guu ni gudixtee lo Jesús:

—A xnanbiu cun de betsbü zuguaa detsqui. Rcaazdeb ininédeb laabiu.

21 Per Jesús raipny laadeb:

—De bniety ni rcuadiag xtiidx Dios ne rundeb zec ni rcaazny, laadebiy xnana ne de betsa.

(Mt. 8:23-27; Mr. 4:35-41)

22 Tuby dxi Jesús biiuny láani barcu cun de xpínny ax raipny laadeb:

—Gultoo stuby lad nisqui.

Ax zédeb.

23 Ne lalzi ni zeteeddeb, Jesús gutaaisny ne guzulo bdiia tuby bidux lo nisqui. Quesentiand guzulo rdxá nis láani barcuqui. Apac mer yaazi láani nis.

24 Chiyru güecuaanydeb Jesús, raipdeb laany:

—¡Maistri! ¡Maistri! ¡A dunní acayaaizní láani nis!

Chiyru güeste Jesús ax bcuezny bidux ne nisduxqui ax irate gulez ne guridxí.

25 Chiy raipny de xpínny:

—¿Cún ni reldilaazti nare?

Per laadeb quesentiand bdxibdeb, ne bdxalodeb ax guzulo rnabdidxsaadeb:

—¿Túdxá bnietqui ningui rnabeeb bi ne nis ax rcuadiagdeni xtiidxbi?

(Mt. 8:28-34; Mr. 5:1-20)

26 Chiyru bdzindeb nez Gadara ni ná stuby lad dets nis Galilea.

27 Chi bdiia Jesús láani barcu, güebínuu tuby bniety Gadara laany. Quesentiand xchi aguc nuu

de bindxab láani lazdoob bnietqui. Quit racutib de xabbí nicza quit guleztib láani tuby yuu sino que cuandzab glay de baa.

²⁸ Chi gunáb Jesús, guzullibbí lony, ax gurixtiab:

—¿Xínii riutébiu cun nare, Jesús, Lliin Dios ni rbez llayabaa? Rguinia lobiu: Quit isacsibiu nare.

²⁹ (Bnietqui guniib ziy te pur Jesús acanabeeny bindxabquí par idiiangui láani lazdoob. Quesentiand zieny güelt agunaaz bindxabqui laab. Ne de bniety abldiibdeb de naab cun de niib cun de caden par quit calí nez chiab. Per laab rtiuugacbi de cadenqui ne bindxabqui rbée laab de nez lo guiix rut quit tu rbeztí.)

³⁰ Jesús gunabdiidxny laab:

—¿Tú lóo?

Laab cuaibbí:

—Nare lá Legión.

Guniib ziy te pur zieny de bindxab nuu láani lazdoob.

³¹ De bindxabqui banlasdengui lo Jesús par quit ixiaaldnydengui rut cadeed de bindxab guelziroo.

³² Ne cun nezqui guu zieny de cuch ni cayo tíix dany, de bindxabqui gudiindengui lo Jesús par isaanny chayiudengui láani de cuchqui. Jesús guzigueldny.

³³ Chiy bdiia de bindxabqui láani bnietqui ax biiudengui láani de cuchqui. Chiy irate de cuchqui guzulo rlluindem ax güeyabdem ruu tuby barranc axtqui lo nis rut guaapy nis quiadem ax gutydem.

³⁴ De bniety ni cacualo de cuchqui, chi gunádeb xa xquel aguc, chiy blluuindeb güetixteedeb lo de bniety láani guidx ne nez lo guuix.

³⁵ Ax bdiia de bniety güeguiadeb loc ni aguc. Chi bdzindeb rut zuguaa Jesús, gunádeb bniety nguui ni bdiia de bindxabqui láani lazdooni, zubbí nez nii Jesús anacubí de xabbí ne agudeed ni gucbí ax bdxibdeb.

³⁶ Chiy de bniety ni guná xa guc, beedeb diidx xa xquel guc biac bniety nguui ni guu de bindxabqui láani lazdooni.

³⁷ Pur ningui, irate de bniety nez Gadara guzulo banlasdeb lo Jesús par idiiany nezqui, te pur laadeb quesentiand rdxibdeb. Ziy xquel guc ax biiu Jesús láani barcu ax zégacny.

³⁸ Ne bniety ni bdiia de bindxabqui láani lazdooni banlasbí lo Jesús par nianény laab. Per laany raipny laab dec yáanbí, ax raipny laab:

³⁹ —Quebiecqui lizu. Güetixtee irate de cos ni abaany Dios cun liú.

Bnietqui zégacbí ax gudixteeb irate lo binguidx ni baany Jesús cun laab.

(Mt. 9:18-26; Mr. 5:21-43)

⁴⁰ Chi bieccqui Jesús stuby lad dets nisqui, de bniety quesentiand rzaclaazdeb güechalodebny te pur iratedeb canuudeb laany.

⁴¹ Chiy bdziny tuby bniety nguui ni lá Jairo ni rnabee tuby yudoo. Jairoqui guzullibbí lo Jesús ax banlasbí lony par chiany lizbí.

⁴² Te pur nuu tubyzi llindxaapbí ni nuu tsibtiop iz. Quesentiand lluu racby apacza

gatyby. Chi zé Jesús, güenald zieny bniety laany axtpacza rtaagudeb laany.

⁴³ De lo de bnietsqui nuu tuby bniety gunaa ni racxú aguc tsibtiop iz cadeedbí guelzii pur guelguzan ne abaanbí gaxt irate ni gúpbi pur doctor, nic tubydeb quít nialeeti nisiac laab.

⁴⁴ Laab güebiib nez dets Jesús ax bguaaldbí punt xabny, hóracqui gulez guelguzanqui.

⁴⁵ Chiy gunabdiidx Jesús laabeb:

—¿Tú bnietsqui bguaald nare?

Ne cun iratedeb rniideb dec gati laatidebiy. Chiy Bed cun de xcumpnierbí raipdeb laany:

—Maistri, de bniety rtaagu dunni ne iranetzte rlayaadeb, chiy rnabdiidxzacbiu: “¿Túngui bguaald nare?”

⁴⁶ Per Jesús guniiny:

—Nuu ni bguaald nare te pur nare gucbiia dec nuu ni bsiaca cun guelrnabee xtena.

⁴⁷ Chi gucbee gunaaqui dec laany gucbeeny, as gubiib racdxaaichbí guzullibbí lo Jesús. Ax bziruub nez lo irate de bniety xi pur ningui bguaaldbí xabny ne xquel ni biacbí hóracqui.

⁴⁸ Chiyru raipy Jesús laab:

—Llindxaapa, abiacu te pur güeldilaazu nare. Zacru quegüe.

⁴⁹ Zeczi caniné Jesús laab, chi bdziny tuby xpiny Jairo ni rnabee yudoo ax raipbí Jairo:

—A llindxaapbiu aguty. Quítru runbiu storbí Maistri.

⁵⁰ Per chi bindiag Jesús ziy ax raipny Jairo:

—Quít idxibtibiú. Cuntisy güeldilaazbiu, ziacqui llindxaapbiu.

51 Chi bdziny Jesús liz Jairo, quitru tu bsaantiny níu cun laany Bedtisy, ne Jacob ne Juany cun xtad ne xnan dxapeenqui.

52 Iratedeb cayúundeb ne nalas nuudeb pur laaby. Per Jesús raipny laadeb:

—Quit ruunti. Dxapeenqui quitlli gutytyby, raaisiby.

53 Per laadeb blliznédeb laany te pur nánde dec laaby agutyby.

54 Chiyru Jesús gunaazny naaby, chiy diip raipny laaby:

—Dxapeen, quegüeste.

55 Ax gubányby stuby, ne hóracqui güesteby ax gunabee Jesús par ideedeb ni iquiinby.

56 Xtdaby cun xnanby quesentiand bdxalodeb. Per Jesús raipny laadeb dec ruteete quit tu gaipsideb ni agucqui.

9

(Mt. 10:5-15; Mr. 6:7-13)

1 Jesús bchasaany tsibtiop de xpinny ax bdeedny laadeb guelrnabee par cuéedeb irate de bindxab láani lazdo de bniety ne par isiacdeb de bniety racxú.

2 Bxiaaldny laadeb par chatichdeb diidx xa ná guelrnabee xte Dios, ne par isiacdeb de bniety racxú,

3 ax raipny laadeb:

—Quit xi chanétit par nez, nic tuby bastón, nicli bols, nicli guechtily, nicliza mily. De ladyzi ni nacuti gulchané.

4 Calítill yuu rut idzinti, tubyzi ruy yáanti axtqui chi idziny dxi idiiat guidxqui.

⁵ Ne rut quit rcaazdeb laat, guldiia guidxqui ne guldzibý guxuld niit zec tuby seny dec quit bcuadiagtideb diidx.

⁶ Chiyru bdiideb ax güedeb guidx pur guidx. Güetichdeb de didxzaac xte Dios ne bsiacdeb de bniety racxú.

(Mt. 14:1-12; Mr. 6:14-29)

⁷ Chi gucbee rey Herodes irate de milagri ni cayun Jesús, quit racheetib xi xgab gúnbi. Te pur nuu de ni rnii dec Juany Bautistiy agubány stuby.

⁸ Stuudxdeb rnii dec profet Elíasy abdiacá. Ne stuudxdeb rnii dec laany nány tuby de profet gualalqui ni agubány stuby.

⁹ Per Herodes guniib:

—Nare gunabiia par gurúu quia Juany Bautist. ¿Túdxaza bnietqui ni rzeetdeb cuenzi zieny de milagri abaanbi?

Herodes quesentiand rcaazbi iniábny.

(Mt. 14:13-21; Mr. 6:30-44; Jn. 6:1-14)

¹⁰ Chi bieequi de apóstol, gudixteedeb lony de cos ni abaandeb. Chiy güenény laadeb tuby lat rut quit tu rbezti, gax guidx Betsaida.

¹¹ Per chi gucbee de bniety ax güenaldddeb laany. Jesús güechalony laadeb ax guninény laadeb xa ná guelrnabee xte Dios ne bsiacny de bniety racxú.

¹² Chi zegac gudxi, güebinnu tsibtioop xpiny Jesús laany ax raipdebny:

—Gutsbiu de bnietqui guíadeb, par chazilaazdeb ne par chatíilydeb ní iquiindeb de guidx ni ná gax, te pur rut zuguaanqui xíteete quit nuuti.

¹³ Per Jesús raipny laadeb:

—Laat, guldeed ni iquiindeb.

Laadeb guniideb:

—Gaayzi guechtily caan cunzi tiop beld.
Güenru chosiin ni iquiiny irate de bnietyqui.

¹⁴ Ne zecti gaay mily ná bniety nguii. Per
Jesús raipny de xpínny:

—Gulcuedeb lat, lat zecti cincuentgadeb.

¹⁵ Ziy xquel baandeb ax guri iratedeb.

¹⁶ Chiyru Jesús cuáany gaay guechtilqui
laznaany cun iropte beldqui. Bguiaany nez
llayabaa bdeedny gracy Dios. Chi gulull blullny
de guechtilqui cun de beldqui, ax bdeedny de
xpínny par gudiizdebni lo de bniety.

¹⁷ Iratedeb bquiindeb ne bialdeb. Chi gulull
bquiindeb, bcharuldeb dzi tsibtiopt dxumy de
guechtily cun de beld ni biian.

(Mt. 16:13-19; Mr. 8:27-29)

¹⁸ Tuby dxi chi gubicá Jesús tuby lad par
canaabny lo Dios ne né de xpínny zuguanény,
chiy gunabdiidxny laadeb:

—¿Xi rnii de bniety, tú nare?

¹⁹ Laadeb cuaibdeb:

—Nuudeb rniideb dec laabiu nábiu Juany
Bautist. Nuuzadeb rniideb dec laabiu nábiu
profet gulal ni bdialá Elías. Ne nuuzadeb
rniideb dec laabiu nábiu tuby de profet gulal ni
agubány stuby.

²⁰ Chiy gunabdiidxny laadeb:

—Laat, ¿xi rniit, tú nare?

Chiy raipy Bed laany:

—Laabiu nábiu Crist xte Dios.

(Mt. 16:20-28; Mr. 8:30—9:1)

21 Per Jesús quesiendiand raipny laadeb dec ruteete quit tu gaipsideb ziy,

22 ax raipny laadeb:

—Nare naa Bniety ni bxiaald Dios lo guichliu teru quesiendiand guelzii teda. Ne sdxichné de gurtisy xte Israel naa cun de bxoz ni rnabee de bxoz cun de maistri ni nán ley. Sguinxúdeb naa per ni rion dxi sbíi ibánia stuby.

23 Chiyru raipny iratedeb:

—Belati nuu ni rcaaz gac xpínnia, quit náti par gúnbi zec ni ná xgabbí ne llillite ná par güelaazbí de guelzii ni teedbí ne sanaldbí nare.

24 Te pur elqui ni mazru run pur guelnabány ni napbí lo guichliuré zuu chi initbíni. Per elqui ni gaty pur nare, laab zapbí guelnabány lo Dios.

25 Xíteete zeloti gún bniety gan irate ni nuu lo guichliu ne belati lagac laab canitbí laab lo Dios.

26 Belati nuu ni rtiuloné nare ne de xtiidxa, ziyza nare Bniety ni bxiaald Dios stiuloníadeb chi guelda zec tuby rey, cun guelrnabee xte Xtada ne xte de ángli xtenny.

27 Ne nare rguixtiia lot: nuu de ni zuguaa ruc quit gatydeb sin quit iniádeb xa ná guelrnabee xte Dios.

(Mt. 17:1-8; Mr. 9:2-8)

28 Chi guc zecti tuxman ni gunii Jesús de diidxquí, güeny láani tuby dany par güenaabny lo Dios. Güenény Bed, Jacob cun Juany.

29 Per lalzi ni canaab Jesús lo Dios, ax bchu zec ni ná lony ne quesiendiand nguits ne rcuabcháaza guc de xabny.

30 Chiy bdiacá tiop bniety nguiiu cayuené laany diidx. De bnietqui ná Moisés cun Elías.

31 Laadeb quesiand rcuabcháadeb ne cayueedeb diidx cun Jesús pur guelguty ne pur guelzii ni teedny Jerusalén.

32 Masqui quesiand rdxá xcaald Bed cun de xcumpnierbi, per quit gutaaistideb ax gunádeb guelrcuabcháa xte Jesús ne xte de bniety nguiu ni guzuguanény.

33 Chi gubicá de bnietyqui rut zuguaa Jesús, chiy gunii Bed:

—Maistri, ¡xípalza güen zuguaan rurén par idxanni chon ranchiin, tubyni par laabiu, stubyni par Moisés, stubyni par Elías!

Per Bed nicli quit gánbi xiy caniiib horqui.

34 Ne lalzi caniiib ziy, biat tuby zá ni bcuaa blda quiadeb ne bdxibdeb chi nuudeb láani záqui.

35 Chiy láani záqui bíeny rsee tuby ni gunii:

—Bnietré rac Llingaana ni la rcaaza. Gulcuadiag xtiidxbi.

36 Chi gulull bindiagdeb rsee ni guniiqui, ax gunádeb dec tubyzi Jesús azuguaa. Laadeb quit xi guniitideb. Láani de dxiqui ruteete quit tu raipsideb xi gunádeb.

(Mt. 17:14-21; Mr. 9:14-29)

37 Chi bragueel stuby dxi, chi biatdeb quia dany, zieny bniety bdiia güechalo Jesús.

38 Chiy tuby bniety nguiu ni nuu lo de bnietyqui gurixtiab:

—Maistri, bguiaabiu llingaana, laaizby rac lliinia.

39 Ruu tuby bindxab láanby ax rbixtiaby ne racby zec guelguidx ratiia ax rdiia btsíny ruuby. Runangui laaby ax quit rsaantingui laaby.

⁴⁰ Agudiinia lo de xp̄inbiu par cuéedeb
b̄indxabqui, per quit güeleeti.

⁴¹ Jesús cuaibny:

—¡Xípalza laat de binduld niy quit reldilaazti
nare! ¿Xátidxaza rquiiny suguanía laat ne xátidxa
güelaaznía laat? Dané lliiniu rurén.

⁴² Per chi zé bniinqui, b̄indxabqui bzáaldiy
laaby lo guichliu ax gucby zec ni rac guelguidx
ratiia stuby. Per Jesús gunabeeny bdiia
b̄indxabqui ax bsiacny bniinqui. Chiyru
bdeedny laaby xtaby.

⁴³ Iratedeb bdxalodeb chi gunádeb
guelrnaberoo xte Dios.

(Mt. 17:22-23; Mr. 9:30-32)

Lalzi laadeb quesentiand rdxalodeb pur de
cos ni run Jesús, laany raipny de xp̄inny:

⁴⁴ —Gulcuadiagzaac ni iniia ne quit
yianlaaztitni. Nare Bniety ni bxiaald Dios, zaca
entriagu laznaa de biny.

⁴⁵ Per de xp̄inny quit racbeetideb ni rniiny.
Laany quit rsaantiny gacheedeb. Ne bdxibdeb
niapydebny quixteeny xi zelo ni guniiny.

(Mt. 18:1-5; Mr. 9:33-37)

⁴⁶ Chiy de xp̄inny guzulo caniideb tú mazru
sac lodeb.

⁴⁷ Per Jesús gucbeeny xi xgab cayundeb. Chiy
guduubny tuby bniniin, bzuubny rut zuguaany,

⁴⁸ ax raipny laadeb:

—Elqui ni racné bniniinré pur nare, laab
cayunquib cuend nare. Ne elqui ni cayun cuend
nare, laab cayunzacbi cuend ni bxiaald nare.

Anre par gacheet tú mazru sac lot: ni mazru run sirvi lo iratet, laabiꝝ ni mazru sacbi.

(Mr. 9:38-40)

⁴⁹ Chiy raipy Juany laany:

—Maistri, agunán tuby bniety ni rbée bindxab láani lazdo de bniety pur guelrnabee xtenbiu. Per dumni rdxaipniꝝ quiꝝru gúntib ziy te pur quit candzanéꝝtib dumni.

⁵⁰ Per Jesús raipny laadeb:

—Quiꝝru rcuat. Te pur elqui ni quit run contri dumni, laab nuub xladni.

⁵¹ Chi zeddziꝝny dxi ni yaaipy Jesús yabaa, chiyru cuáany valor zény Jerusalén.

⁵² Bxiaaldny de ni guzaniꝝdy, laadeb güedeb tuby guidx xte Samaria par güetúlydeb rut cuezdeb.

⁵³ Per de bniety Samaria quit baantideb recibirny te pur gunádeb dec laany zény Jerusalén.

⁵⁴ Chi guná Juany cun Jacob ziy ax raipdeb laany:

—Dad, ¿ta rcaazbiu inabeen yab gui llayabaa par ilduull de binqui zec ni baany profet Elías?

⁵⁵ Chiy bguiaa Jesús lodeb ax gudildny laadeb, raipny laadeb:

—¿Ta quit gánti xi zelo ni rniit?

⁵⁶ Bniety ni bxiaald Dios quit zéedtiny par idziꝝcány guelnabány xte de bniety sino que par idziꝝcány laadeb lo duld.

Chiyru zédeb stuby guidx.

(Mt. 8:18-22)

⁵⁷ Chi zédeb nez, tuby bniety nguii raipbi Jesús:

—Dad, nare rcaaza sanalda laabiu nez ruttisy chiabiu.

⁵⁸ Jesús cuaibny:

—De begu nuu xcuevdem. De maniin nuu xpitiaazdem. Per nare Bniety ni bxiaald Dios quit naptia nicli rut quixquiaa.

⁵⁹ Jesús raipny stuby bniety:

—Guzanald nare.

Per laab guniib:

—Dad, bsaanbiu suguanía xtada axtqui chi gatybi. Chiyru guelda cun laabiu.

⁶⁰ Jesús raipny laab:

—Bsáan xtadu cun de bniety ni quit rcaaz sanald nare. Per liú, quegüetich diidx xa xquel ná guelrnabee xte Dios.

⁶¹ Chiy raipy stuby bniety laany:

—Dad, rcaaza sanalda laabiu, per nidoote bsaanbiu chatixtiia lo de xfamilia.

⁶² Per Jesús guniiny:

—Elqui ni rzunaa nii arad, ne iziecquilob nez detsbi, quit xo icuaatib de llurqui tiblydí. Ziyza ni rcaaz sanald nare ne bel quit isáanbi irate tuby lad, quit xo yiiutib lo guelrnabee xte Dios.

10

¹ Chi gudeed guc de cosré, Dad Jesús gulézacny setent bniety, ax bxiaaldny tiopgagadeb de guidx ne de ranch par san#dydeb chiagadeb de rut ná par chiany.

² Ax raipny laadeb:

—Didxldíqui, zieny bniety rcaaz icuadiag xtiidx Dios, per quitti zieny bniety par iliuu

laadeb. Pur ningui, gulnaab lo Dios par
ixiaaldny mazru zieny bniety par iliiu laadeb.

³ Gulchia laat, ne nare rxiaalda laat zec chi re
de lliily glay de begu.

⁴ Quit chanétit bols, nicli mily, nicza gurachy, ne
quit tu sudxinétit lo nez.

⁵ Chi yiuut liz tuby bniety, gulguaapdiosdeb
nidoote gulnii: “Dios iguaadny laat
guelnaldiulaaz.”

⁶ Ne belati yuuqui rbez de bniety ni riáld
bendicionqui, ax ziianni ruy. Per belati quit náni
par laadeb ax ziecquini cun laat.

⁷ Ne ruygac gulyáan, ne gulquiiny ne gulguée
ni inídxdeb laat. Quit itiulotit cuezti lizdeb te
pur bniety ni run dziny nappacbi que iquiinbi,
ne ruytisy guldez quit chazátit iranezte.

⁸ Chi idzinti tuby guídx rut gúndeb recibir laat,
gulquiiny ni iguaaddeb laat.

⁹ Gulsiac de bniety racxú ni rbez ruy, ne
gulgaipdeb: “Guelrnabee xte Dios azeddingaxni
par laat.”

¹⁰ Per belati idzinti tuby guídx rut quit
rcaazdeb laat, guldiia lo nez ax gulgaipdeb:

¹¹ “Axt de guxuld xte ladxti ni acua lazniin,
rdzibyni zec tuby seny dec quit baantit cuend
xtiidxni. Per gulgabee dec guelrnabee xte Dios
azeddingaxni par laat.”

¹² Nare rniia laat, dxi ni ldull guichliu, de
guídx rut quit icaaz bniety laat mazru castiguroo
yálddeb que castigu ni yáld de bniety ni gulez
guídx Sodoma.

(Mt. 11:20-24)

¹³ ¡Probeenzacti, de biny Corazín! Ne,

þrobeenzacti, de biny Betsaida! Te pur belati láani guidx Tiro ne láani guidx Sidón niac de milagri ni guc ladxti, gulal bieccuideb cun Dios, ne zacuzadeb lady ngas chiy sdaaibza dé quiadeb zec tuby seny dec rialaazdeb pur de xtulddeb.

¹⁴ Per dxi ni ldull guichliu, mazru castiguroo yáldti que de bniety Tiro cun Sidón.

¹⁵ Ziyza laat, de bniety Capernaum, quit ililot dec zíáldti llayabaa. Te pur laat ariáldti axt xti infierni.

¹⁶ Chiyru bguiaa Jesús lo de xpinny ax guniiny:
—Elqui ni gún cuend laat, laab cayunbi cuend nare. Per elqui ni run despresy laat, laab cayunbi despresy nare. Ne ni run despresy nare, laab cayunbi despresy ni bxiaald naa.

¹⁷ Chi bieccui setent de bniety ni bxiaaldny, quesentiand rzaclaazdeb ax raipdeb laany:

—Dad, axt de bindxab rcuadiag xtiidxni chi rzeetni lábiu.

¹⁸ Jesús raipny laadeb:

—Guldícti. Nare gunáa zeczi chi riepnis xquel bnity Satanás guelrnabee xtenbi.

¹⁹ Nare bn#dxa laat guelrnabee par chaaipiti quia béeld cun quia de nilliuby, ne par gúnti gan lo irate de mal sin quit xi gactit.

²⁰ Per quitru rzaclaazti pur rcuadiag de bindxab xtiidxti sino que gulsclaaz pur a cá lát lo libri xte llayabaa.

(Mt. 11:25-27; 13:16-17)

²¹ Hóracqui Jesús quesentiand guzaclaazny pur Spíritu Sant ax guniiny:

—Nare rzubyaa laabiu, Xtada, Dad ni rnabee llayabaa ne lo guichliu, te pur abliuubi de bniety ni quit xi gán de cos ni bcuaatsbiu lo de ni nán ne de ni racbee. Ne pur volunta xtenbiu guc ziy, Xtada.

²² Xtada abnñdxny nare irate de cos par inabiia dengui. Ruteete quit tu gánti túngui Jesucrist Lliin Dios sino que soltisy Dios, ne ziyza soltisy Jesucrist cun de bniety ni reldilaaz laany, laadebiy ná ni rumbeezadeb Dios.

²³ Chiy chi bguiaany lo de xpínny ax laaizdeb raipny:

—Xíclabaa de ni iniá ni caguaat

²⁴ te pur nare rniia laat dec zieny de profet ne de rey bcaazdeb niniádeb ni caguaat, per quit gunátidebni. Bcaazdeb nindiagdeb ni caguindiagti, per quit bindiagtidebni.

²⁵ Chiy tuby maistri ni nán ley güesuldíb par güeninéb Jesús. Güegaanybi prueb laany ax gunabdiidxbiny:

—Maistri, ¿xa xquel gúna par gapa guelnabány par chazy?

²⁶ Jesús cuaibny:

—¿Xa xquel rnii ley xte Moisés? ¿Xa xquel racbiuni?

²⁷ Maistri ni nán leyqui cuaibbi:

—“Dibyquia dibylaazu bcaaz Dad Dios xtenu, ne bcaaz saa bnietiu zecac liú.”

²⁸ Chiyru raipy Jesús laab:

—Güenqui cuabiu. Anre belati liú gúnu ziy, zapu guelnabány par chazy.

²⁹ Per maistriqui rcaazbi niacnéb lagac laab pur loc ni gunabdiidxbi Jesús ax raipbi laany:

—¿Tú bniety icaaza zecac nare?

³⁰ Chiyru bené Jesús laab tuby cuend, raipny laab:

—Tuby bniety Israel bdiab Jerusalén par zéb guidx Jericó. Chiy gunaaz de gubaan laab, btaazdengui laab, ax gulaandengui irate de cos ni zéneb axt néru de xabbi. Casi binguty náb bsáandengui laab ruy.

³¹ Ax bguaald zeteed tuby bxoz nezqui, per chi gunáb ziy, zit bcuaab güelt ax zégacbi.

³² Néza tuby levita, bniety ni racné de bxoz, gudeed nezqui. Ziygac chi gunáb bniety ni nágaa ruy, zit bcuaab güelt ax zégacbi.

³³ Per tuby bniety ni zá Samaria gudeedbi lo nezqui. Chi gunáb bniety ni nágaa ruy ax bgáb laab.

³⁴ Chiyru gubii bniety samariaqui rut nágaa bnietqui ax baanbi rmidy de rut ná herid cun sity ne cun vin ax bldiibbi de rut ná heridqui. Chiyru bcueebbi laab burr xtenbi ax güenéb laab rut ná tuby posad. Ruy bcualob bnietqui.

³⁵ Chi bragueel stuby dxi, chi achia bniety samariaqui, guléeb xte tiop dxi dziiny par bdeedbi bniety ni ná lizni ruy ax raipbi bnietqui: “Bcualobiu bnietré. Belati gúnrubiu gaxt pur laab, nare quilla chi yaicquia.”

³⁶ Chiyru raipy Jesús maistri ni nán ley:

—Anre, ¿xi rniiu? De lo iyonte de bnietqui, ¿tú bniety bcaaz bniety ni btaaz de gubaanqui?

³⁷ Maistri ni nán leyqui cuaibbi:

—Elqui ni bgá bnietqui.

Chiyru raipy Jesús laab:

—Quegüe, ne baany ziygac cun stuby de bniety.

³⁸ Jesús güelaaru güeny ax bdzinny tuby guidx. Ruy güeny liz tuby bniety gunaa ni lá Mart.

³⁹ Mart nuu tuby beldbi ni lá María. María gurib llanii Jesús par guindiagbi ni caniiny.

⁴⁰ Per Mart quesentiand cacualaazbi cun de xmandadbi, ax güebiib rut zuguaa Jesús. Chiy raipbi laany:

—Dad, ¿ta xíteete quit ruutibiu guelrsaa pur belda rsannéb nare irate mandad? Gutsbiub dxa te gacnéb nare.

⁴¹ Per Jesús cuaibny:

—Mart, Mart, ¿ta la ruu guelrsaa pur zieny xmandadu?

⁴² Per tubyzi cos ni mazru sac nuu. María guléb ni mazru sac, ne ruteete quit tu idzicátini lob.

11

(Mt. 6:9-15; 7:7-11)

¹ Tuby güelt Jesús canaabny lo Dios tuby lat, ne chi blduullny gunaabny lo Dios, tuby de xp̄inny raipy laany:

—Dad, bseedbiu dunni inaabni lo Dios zec ni bseed Juany Bautist de xp̄inbi.

² Jesús raipny laadeb:

—Chi inaabti lo Dios gulnii:

Xtadni Dios, laabiu ni rbezbiu llayabaa

Quesentiand riáld idxapni didxdoo lábiu

Su gueed guelrnabee xtenbiu.

Su chagac zec ni ná volunta xtenbiu lo guichliu zec ni racni llayabaa.

³ Bguaadbiu dunnî ni iquiinnî lillite.

⁴ Baanbiu perdón de duld xtenni, te ziyza dunnî rdxanzacni perdón irate de ni run mal dunnî.

Quit cuelaaztibi u dunnî par idxanni duld sino que gucnébiu dunnî lo irate de mal.

⁵ Ne Jesús raipzacni laadeb:

—Izuubzin belati tubyti nuu tuby xmiguni. Chiy iruldgueel idzinbi liz xmigubi ax iniib:

“Xmiguaa, bnidxlaa nare chon guechtily

⁶ te pur tuby xmiguaa testepac bdziny liza, ne xíteete quit ráptia ideedab.”

⁷ Ne izuubni stubyqui icaibbi desdi laniu ax iniib: “Quit runu storbi nare. A puertqui dxí. Nare naganía de lliinia. Quit chaleeti chastia par inidxani liú.”

⁸ Per nare rniia laat, masqui belati laab quit chasteb par ideedbi xirullzi pur rac xmigudeb, per zunbi juers chasteb par ideedbi irate ni rquiiny xmigubi par quitru gúniy storbi laab.

⁹ Pur ningui, rniia laat: Quit cuezti inaabti lo Dios ne laany sguaadquiny ni rcaazti. Gultiílyn ne sdxialquitny. Gultídx gulnaab lony, ne zunquiny cuend laat.

¹⁰ Te pur elqui ni rnaab, scáab. Ne ni rguílny, sdxialquibny. Ne ni rquiiny rnaab lony zunquiny cuend laab.

¹¹ Belati tubyti nát dad, ¿tatix sdeedti tuby guia lliinti chi inaabby guechtily? ¿O tatix sdeedzacti tuby béeld chi inaabby beld?

¹² ¿O ideedzacti tuby nilliuby chi inaabby tuby dzitbidy?

13 Laaclat nát binduld ne nánti rdeedti ni rcaaz de lliinti, ¡latixcu Xtadni ni rbez llayabaa quit inidxacny Spíritu Sant par de ni rnaabny!
(Mt. 12:22-30; Mr. 3:20-27)

14 Jesús cabeeny tuby bindxab ni bsáan tuby bniety gúp. Ne chi bdiia bindxabqui, ax aguzulo rnii gúpqui. Parzi quesentiand bdxalo de biny.

15 Per nuudeb guniideb:

—Bnietqui rbéeb de bindxab láani de bniety pur lagac guelrnabee xte Beelzebú ni rnabee lo de bindxab.

16 Stuidxdeb ax par gúndeb prueb laany, rnaabdeb gúnny tuby milagri xte llayabaa.

17 Per laany nánnacny xi xgab cayundeb, ax raipny laadeb:

—Irate naciony rut ná biny tiop cuaa pur didxguidx, rlasaapacdeb ne ziyza rut ná tuby family tiop cuaa pur didxguidx, ziyza rlasaadeb.

18 Ziygaczaquiy belati Satanás gúniy contri lagac saa bindxabiy ax, ¿xólesa güelaaz guelrnabee xteniy? Caniia laat zec te pur laat rniit dec nare rbiia bindxab láani lazdo de bniety pur guelrnabee xte Beelzebú.

19 Per belati ziy, laat, ¿tú rdeed guelrnabee de xpinti par cuéedeb bindxab? Rguixtiia lot dec lagac laadeb rniideb dec laat rzacanti.

20 Te pur nare pur guelrnabee xte Dios rbiia de bindxab láani lazdo de bniety, niy zelo dec guelrnabee xte Dios azuguané laat.

21 'Chi daan tuby bniety ne caab xi cun gacnéb laab par cacualob lizbi, quit xo cúaanti biny ni napbi.

²² Per belati gueed stuby ni mazru nallung ax zuniy gan lob, ne sdzicáy ni caab ne scaazaquíy irate ni napbi.

²³ 'Elquí ni quít nuu xlada, laab cayunbi contri nare. Ne elquí ni quít racné nare, laab cayunbi mal nare.

(Mt. 12:43-45)

²⁴ 'Chi rdiia tuby bñdxab láani lazdoó tuby bniety, ax rcandzangui de nez rut nabiz rguíiliy rut izilaaziy. Ne chi quít rdxialiy rut izilaaziy ax runiy xgab dec güenru yaicquíy rut bñiiay.

²⁵ Ne bel chi yaicquíy idxialiy lazdoó bñietqui zecpac láani tuby yuu ni ablub láanni, ne ni anazaac.

²⁶ Chiy ax azecáangui dzi gadz bñdxab ni ná mazru mal que niy. Chiy iratedengui yíiudengui láani lazdoó bñietqui. Pur lúltmí, bñietqui mazru rnia íbánybi que gulo.

²⁷ Lalzi Jesús caniiny de diidxré, gurixtia tuby bniety gunaa ni nuu lo de bñietqui:

—¡Xíclabaa bniety gunaa ni btsiny laabiu lo guíchliu ne bñiob laabiu!

²⁸ Per Jesús cuaibny:

—¡Mazru xíclabaa de ni rcuadiag ni rnii Dios ne rundeb zec ni rniiny!

(Mt. 12:38-42; Mr. 8:12)

²⁹ De bniety güelaaru bdxasaadeb rut zuguaa Jesús ax guzulo raipny laadeb:

—De bniety ni rbez lo guíchliu anre, mal nádeb ax rnaabdeb tuby milagri. Per quítru xi iniátideb, quesoltisy zec ni gudeed profet gulal ni bdialá Jonás.

³⁰ Zec ni guc Jonás tuby seny par de bniety ni gulez guidx ni lá Nínive, ziygacza nare Bniety ni bxiaald Dios lo guichliu, nare naa tuby seny par de bniety ni nabány anre.

³¹ Dxi ni ldull guichliu, chi ideed de bniety cuend Dios, chiy reina ni zá guidx ni lá Sabá sbányzacbi stuby ne sniib dec de bniety ni nabány anre riáld castigu xte Dios. Te pur laab quesentiand zit záb par bedcuadiagbi ni nán rey Salomón. Ne nare Jesús ni zuguané laat, mazru saca que Salomón.

³² Ne ziyza de bniety ni gulez guidx Nínive sbánydeb dxi ni ldull guichliu, chi gún Dios juzgui de bniety ni nabány anre, ne sniideb dec de bniety ni nabány anre riáld castigu xte Dios. Te pur de bniety Nínive bcuadiagdeb xtiidx Jonás chi raipbi laadeb dec ná par ibánydeb zec ni rcaaz Dios. Ne nare Jesús ni zuguané laat mazru saca que Jonás.

(Mt. 5:15; 6:22-23)

³³ Ruteete quit tu rcuaguiti tuby linterni par suubiy rut ná xgaats nicza niguét tuby caj, sino que ná par suubiy yaa par yianlo tutix ni yiu.

³⁴ De bslon ná zec tuby bieeny par xcuerpin. Belati rdxanni ni ná güen, iduibte xcuerpin nap bieenqui. Per belati idxanni ni ná mal, iduibte xcuerpin ná zec rut nacay.

³⁵ Bcualo liú te quit chané de bsloo liú nez mal.

³⁶ Ne belati nic tuby ldaa xcuerpin quit runti de cos mal ax chiyguiy rienni zec chi rzieeny tuby linterni cun bal xtenni.

(Mt. 23:1-36; Mr. 12:38-40; Lc. 20:45-47)

37 Chi gulull guniné Jesús laadeb, tuby fariseu baanbi cumbid Jesús par chaquiinny lizbi. Chi biiuny ax guriny par iquiinny,

38 chiy fariseuqui bdxalob chi gunáb dec Jesús quit gudibynaatiny zectispac ni ná xcostumbrideb anste ni iquiindeb.

39 Per laany raipny laab:

—Laat nát zec de vas cun de plad ni nania nez detsni te pur quesentiand güen ríenti. Per nez láanti, quesentiand mal nát ne rdxalaazzacti rbaanti.

40 ¡La nadtí! ¿Ta quit gántí dec tubyzi Dios banchuu xcuerpín ne lazdoon?

41 Pur ningui gulgacné de ni quit xi napti te par yíany dec güenquipac nát.

42 ¡Probeenzacti, de fariseu! Laat rdeedti diezmi xte ment ne rrud ne xte irateru de cos ni rquiiny bniety, rdeedtini par Dios zec ni rnabee ley gúnti. Per quit runtít zec ni riáld cun stuby de bniety ne quitza runtít cuend guelrcaaz xte Dios. Gulgaany cuendni sin quit isaantít ideedti ni rdeedti Dios.

43 ¡Probzacti, de fariseu! Te pur rdxalaazti subtí lo de bangu láani de yudoo rut rbe de ni mazru sac, ne rdxalaazti dec quesentiand gap de bniety didxdoo laat lo nez.

44 ¡Probeenzacti, de maistri ni nán ley cun de fariseu, te pur quit runtít zec ni rniit! Laat nát zec de baa ni quit rianlo bniety ax ni quit racbeedeb chi raaipdeb quia de baaquí.

45 Chiy cuaby tuby maistri ni nán ley, laab guniib:

—Maistri, chi rniibiu de diidxqui né dumni rsaclobiu.

⁴⁶ Per Jesús raipy laab:

—¡Ziyza laat, de maistri ni nán ley, probeenzacti! Te pur rnabeet de bniety gúndeb de cos ni quit tu chaleeti gún, ne nicli quit rcaazti gacnédeb par gúndeb zec ni rcaazti.

⁴⁷ ¡Probeenti!, te pur runzaacti de baa xte de profet ni gudinxú lagac de xpingul gulalti.

⁴⁸ Ziy xquel racbee bniety dec laat nácti cunformi cun ni baany de to xpingulti. Laadeb gudinxúdeb de profetqui. Chiy laat ax gunát guczaac de baa xtendeb.

⁴⁹ Pur ningui, Dios lo guelnán xtenny ax guniiny: “Nare ixiaalda de profet cun de apóstol, ne nuudeb sguinxú de biny laadeb, nuuzadeb ax zun de biny contri laadeb.”

⁵⁰ Ziy xquel ax de biny ni nabány anre, laadeb gún Dios castigu pur riny ni bxíi de profet ni gudinxúdeb desde chi gurixti guichliu,

⁵¹ desdi riny xte Abel axtqui riny xte Zacarías ni gudinxúdeb lo ldedoo Jerusalén. Pur ningui caniaa laat dec de biny ni nabány anre laadeb quillydeb pur iratedeb.

⁵² ¡Probzacti, de maistri ni nán ley!, te pur laat quit rsaantit gacbee de bniety xa xquel gúndeb par gacdeb xpiny Dios, nicliza laat quit runtiti pur gacti xpiny Dios ne rcuazacti gac de ni rcaaz gac xpiny Dios.

⁵³ Chi gunii Jesús de diidxré, de maistri ni nán ley cun de fariseu quesentiand bdxichnédeb laany, ax guzulo rnabdiidxdebn yienzi de cos.

54 Rundeb prueb laany par chúu nez gúndeb contri laany.

12

¹ Lalzi nuudeb ziy, bdxasaa pur mily bniety, ne de tant ziendeb quesentiand rcuayasaadeb. Ax Jesús guzulo cayaipny nidoote de xpínny:

—Gulcualo laat cun levadur xte de fariseu, niy zeloy dec gulcualo laat te pur laadeb quit runtideb zec ni rniideb.

² Te pur nic tuby de ni nuu xgaats quit yáanti sin quit yíany, ne nicza tuby de ni ná xgaats quit yáanti sin quit gacheetiza bniety.

³ Pur ningui irate de diidx ni aguniit rut nacay, zindiag de bniety de diidxqui rut nanieeny. Ne de diidx ni aguniit xgaats laniuu, zuu ni cuxtia de diidxqui desde quia lizti.

(Mt. 10:26-31)

⁴ Laat, de xmiguaa, nare rniia laat quit náti par idxibtí de ni rcaaz quinxú laat. Te tutix zelee quinxú xcuerpit, per spírit xtenti ruteete quit tu chaleeti iguaaldni.

⁵ Per iniia laat tú ná par idxibtí: guldxiby Dios te pur laany napny guelrnabee, chi abdzicány guelnabány zelee ixiaaldny spírit xtenti infierni. Pur ningui guldxibny.

⁶ Laat nánti dec de maniin ni rzu quit sactidem guyally, per Dios quit rianlaaztyny nic tubydem.

⁷ Ne laat axt de guichquiat tuby pur tubyni ná cuend lo Dios. Pur ningui quit idxibtit, te pur mazrupac sacti que zieny de maniin.

(Mt. 10:32-33; 12:32; 10:19-20)

8 'Nare rniia laat tutix bniety ni inii nez lo de binguichliu dec xpinniab, ziyza nare Bniety ni bxiaald Dios sniizaca nez lo de ángli xte Dios dec xpinniab.

9 Per elqui bniety ni inii nez lo de binguichliu, dec gati xpintiab, ziyza nare sniizaca nez lo de ángli xte Dios dec gati xpintizacab.

10 'Ne tutix bniety ni inii contri nare Bniety ni bxiaald Dios, zelee gacbi perdón, per elqui ni inii de mal diidx contri Spíritu Sant, quit chúuti dxi gacbi perdón.

11 'Chi chanédeb laat láani de yudoo, o lo de juez cun lo de gurtisy, quit chúutit guelrsaa xa xquel icaibti o xa xquel iniit,

12 te pur chi idziny hor ni iniit, Spíritu Sant laany iliunuy laat xa xquel ná par iniit.

13 Tuby bniety ni nuuch lo de bnietqui raipbi Jesús:

—Maistri, gutsbiu betsa te inidxbi herency ni riálda.

14 Per Jesús raipy laab:

—Hombri, ¿tú gunii liú nare gaca juez o abogadza par quiizia xixtenti?

15 Ne ziyza raipny laadeb:

—Gulcualo quit sebylaazti ni quit rápti, te pur xíteete sacti ziény guelnazaac ni ráp bniety, te gati de guelnazaactiqui rguaad guelnabány bniety.

16 Chiy benény laadeb cuendré:

—Guu tuby bniety ni guc ricu, ne de lo liu xtenbi quesentiand bdop de guelnazaac.

17 Chiy ricuqui quesentiand guzulo runbi xgab rniib: “¿Xa xquel gúna an? Quit ráptia calí chuchuu de guelnazaac xtena.”

18 Ax baanbi xgab ax nab: “Anánna xa xquel chagania. Itsilia de yuu rut nuchuu de guelnazaac xtena par gúnadengui mazru guroo. Láanqui cuchuaa irate de guelnazaac xtena cun irateru ni napa.

19 Chiy gapia lagac nare: Xmiguaa, quesentiand zieny guelnazaac anaguchuu par zieny iz: bzilaaz, bquiiny, ne güée, ne guzaclaaz.”

20 Per Dios raipy laab: “Hombri, tont noo. Lagac anguxinré gatiu. Ne de guelnazaac ni naguchuu, ¿túlesa par dengui?”

21 Ziy xquel rdeed bniety ni rguchuu guelnazaac púrzi par lagac laab, per lo Dios xíteete naptib.

(Mt. 6:25-34)

22 Chiyru raipy Jesús de xpiny:

—Nare rniia laat: quit chútit guelrsaa pur ni iquiinti par ibányti nicliza pur lady ni gacuti.

23 Guelnabány mazru sac que ni iquiiny bniety, ne xcuerpi bniety mazru sac que lady.

24 Gulguiaa de bloo. Nicli quit rundem dz#ny lo guix nicli quit rtedem guelnazaac, nicli quitti lizdem rut chuchuu guelnazaac, per Dios rguaad ni godem. ¡Latixcu laat mazru sacti que de maniin!

25 Ne ziyza, ¿tatix pur cuenzipac chúu bniety guelrsaa ax agac bniety mazru ziuul?

26 Ne belati nicli ziy quit chaleeti gún bniety, ¿xílesa par cuenzi chúu bniety guelrsaa pur ni iquiiny bniety ne pur stuby de cos?

²⁷ 'Gulguiaa xa xquel reroo de guiaa lo guix.
Xíteete dziiny quit runtideni ne quitza
rguibtideni. Per nicli rey Salomón quit
guzuchuuti zec ni zuchuu de guiaa masqui más
guzuchuub.

²⁸ Pur ningui, de cuanguixcla anre rsuchuu
Diosni masqui illí ba náni par chaaicquini.
Latixcu laat, de biny ni gullieezy reldilaaz laany,
quit iguaadny ni gacuti.

²⁹ Pur ningui, quitru candzat ruut guelrsaa pur
ni iquiinti ne pur ni guéet.

³⁰ Te pur de biny ni quit reldilaaz Dios, laadeb
ruudeb guelrsaa pur irate de cosqui. Per laat
napti tuby Xtadti llayabaa, ne laany nanchuuny
xi runlieedxti.

³¹ Per gulsaa inabee Dios laat, chiy laany
in#dxny irate de ni runlieedxti.

(Mt. 6:19-21)

³² 'De xpinnia, quit idxibtit. Laat dudxiinzi nát,
per Xtadni Dios rzaclaazny isiáldny xi isiáldny
laat lo guelrnabee xtenny.

³³ Gultóo ni rápti ax guldeedni de bniety ni ná
probeen. Gulgaany pur gúnti gan de guelnazaac
xte llayabaa ni quit irati ne rut quit chaleeti yiuu
gubaan nicza de maniin ni ro xixten bniety.

³⁴ Te pur mazrupac run bniety xgab pur rut
nuchuu ni mazru sac par laab.

³⁵ 'Gulsuguaa altant ne gulgaany zec ni riáld.

³⁶ Gulgaany zec de mos ni canuu yaicqui
xlámni ni zé tuby saa, par yiub ixalbi ruu puert
chi izez.

³⁷ Xíclabaa de mos ni nagabany canuu yaicqui
xlámni. Te pur nare rniia laat dec lagac xlámdeb

icue laadeb lo milly ne ichub de xabbi par ideedbî ni iquiindeb.

³⁸ Xíclabaadeb belati idxial xlámdeb laadeb nagabanydeb masqui idzinbî iruld gueel o cuayza.

³⁹ Ne ziyza gulgacbee dec belati tuby bniety nánbî xor nía gubaan lizbî, laab quit nisaantib níiu gubaanqui lizbî.

⁴⁰ Ziyza laat gulsuguaa altant te pur nare Bniety ni bxiaald Dios quit gántit xor guelda. *(Mt. 24:45-51)*

⁴¹ Chiyru gunabdiidx Bed laany:

—Dad, ¿ta parzí dunnî beebiu de cuendqui, o par irate de bniety?

⁴² Jesús guniiny:

—Nare guniia cuendqui par tutix bniety ni ná güen ni rzuubpac xtiidxni ne ni run xgab zec ni riáld, zecqui tuby mos ni rsáan xlámni lizbî par gacbi cargu xte iraru de mos par ideedbî ni iquiindeb chi aguld hor.

⁴³ Xíclabaa mos ni cayun zec ni riáld chi idziny xlámbî stuby

⁴⁴ te pur nare rniia laat dec lámqui sáanbî irate de xixtenbî laznaa mosqui.

⁴⁵ Per belati mosqui gúnbî xgab dec zacldaa idziny xlámbî ax sulo gunnéb de mos zectisy ni icaazbî, ziygacza gúnbî cun de criad ne sulo iquiinbî ne guéeb axtisy suzbî.

⁴⁶ Ne chiy idziny xlámbî tuby dxi ni quit canuutib laab, ne tuby hor ni quit gántib. Chiy quesentiand castiguroo gún xlámbî laab ne siáldbî laab rut riáld de ni quit rcuadiag diidx.

47 'Te pur mos ni nán xa xquel rcaaz xlámbi gúnbi, per quit rzuguaatib altant nicza quit rcuadiagtib xtiidx xlámbi, laab quesentiand castiguroo yáldbi.

48 Per mos ni quit gánti xa xquel rcaaz xlámbi ne gúnbi de cos ni riáld castigu, zacbi castigu per gulliaaru. Pur ningui, elqui bniety ni abguaad Dios guelrieny, mazru zieny ni ná par gúnbi pur guelrieny ni bguaad Dios laab. Ne ziyza bniety ni abguaadny guelrnabee mastecru zieny ni ná par gúnbi pur guelrnabee ni abguaadny laab.
(Mt. 10:34-36)

49 'Nare zelda lo guichliu zec tuby bal ne, ¡ó!la nare acayac zec ni ná par gac!

50 Nare teru ná par teda guelzii niy canuu naa ne, ¡quesentiand nalas rziienia desdi anre axtqui chi yalo gac zec ni ná par gac!

51 Quit ililot dec zelda lo guichliu par gac de bniety tubyzi sino que pur guelreldilaaz nare sdildné de bniety saani.

52 Te pur desde anre tuby family rut nádeb gaay, sdilddeb chondeb contri tiopdeb, ne tiopdeb contri chondeb.

53 De dad zundeb contri lliindeb ne lliindeb zunza contri laadeb. Ziyza de nan zundeb contri llindxaapdeb ne llindxaapdeb zunza contri laadeb. Nansuegri ax gún contri xgulizni, xgulizbi ax gúnza contri laab.

(Mt. 16:1-4; Mr. 8:11-13)

54 Ziyza raipy Jesús de bniety:

—Chi rniát rdiia de zá lad rut rreezy gubidx as rniit dec ziab nisguia ne racqui ziy.

55 Ne chi rniát rdiia bi lad sur ax rniit dec naldaa gac ne ziyquí rac.

56 ¡Laat rniit tuby cos per quít runtít zec ni rniit! Laat nánti xi zelo de seny xte llayabaa ne xte lo guichliu, ne, ¿Xínii quít racbeet xi zelo de cos ni cayac lo guichliu anre?

(Mt. 5:25-26)

57 '¿Xínii quít gúnti xgab lagac laat cún ni ná güen?

58 Belati chúu ni gún demand liú ne chiy idxialub lo nez chi azénedeb liú lo de gurtisy, gudíily diidx zaac cun laab anste idzíniu lo juez. Te pur belati idzíniu lo juez, chiyru juezquí gún entriagu liú lo de policía par chaldudeb liú láani lizguuib.

59 Ne nare rniia liú dec quítga xo idiiatiu láani lizguuib axtisy quilliu irate ni inii juez liú.

13

¹ Lagac de dxiqui, güe tuby tiop de bniety benédeb Jesús diidx xa xquel gudinxú Pilat tuby tiop de bniety nguii ni zá nez Galilea, ax bguuchbi riny xtendeb lo riny xte de ladxaa ni gundeb par rtodeb Dios.

² Chiy raipy Jesús laadeb:

—Quít ililot dec de bniety Galileauqui gudeedeb ziy pur nádeb mazru binduld que iraru de ni zá Galilea,

³ te pur nare rniia laat dec gati pur ziyti. Ne belati laat quít yialaazti pur de xtuldti, iratecti snitti lo Dios.

⁴ Ziyza quít ililot dec irate tsanbchon bniety ni guty chi guribaan torre xte Siloé quiadeb dec

mazru rápdeb duld que iraru de bniety ni rbez Jerusalén,

⁵ te pur nare rniia laat dec gati pur ziyti. Ne belati laat quit yialaazti pur de xtuldti, iratecti snitti lo Dios.

⁶ Jesús benény laadeb cuendré:

—Tuby bniety nguui gúpbi tuby llaa yag hig lo lliab, ax güeguaab la cá hig loni. Per xíteete quit bdxialtib.

⁷ Chiy raipbi bniety ni cacualo guichliuqui: “Bguiaa, canioo, aguc chon iz seguid redtília hig lo yagqui, ne gady chúuti dxi idxialani. Btiuu yagqui. ¿Xi par runzini storbi lo guichliuc?”

⁸ Per bniety ni rcualo guichliuqui cuaibbi: “Dad, bsáanbiuni lo izqui. Nare gunzaaca llaanni ne cuua abonni.

⁹ Rliluaa ziy xquel ica frut loni par stuby iz. Per belati ziygac, chiyru itiuunni.”

¹⁰ Tuby güelt, dxi ni rzilaaaz bniety, Jesús caseedny de bniety láani yudoo

¹¹ ax zuguaa tuby bniety gunaa ruy. Aguc tsanbchon iz racxúb. Tuby bindxab bsáan laab jorobad ne xíteete quit releeti ildíb.

¹² Chi guná Jesús laab, ax guridxny laab ne raipny laab:

—Gunaa, abiacu xte guelguidx ni gucu.

¹³ Chiyru bzubnaany quia gunaaqui ne hóracqui agüetele bldíb ax guzulo rniib de diidx zaac pur Dios.

¹⁴ Per bniety ni rnabee láani yudooqui, quesentiand bdxiiichbi te pur bsiac Jesús bniety dxi ni rzilaaazdeb, ax raipy bniety ni rnabee láani yudooqui de bniety:

—Nuu xoop dxi ni ná par gún bniety dz#ny. Lo xoop dxiqui gultaa te yacti, per gati dxi ni rzilaaz bniety.

¹⁵ Chiyru cuaby Jesús:

—Laat rniit tuby cos per quit runtít zec ni rniit. Te pur laat runacti dz#ny dxi ni rzilaaz bniety. ¿Tatix quit reldát gúun o burrza xtenti par guéedem nis?

¹⁶ Ne bniety gunaaré lo de xfamily to Abraham zéedbi ne aguc tsanbchon iz ni bldiiby bindxab laab cun guelguidxré ax, ¿tatix quit ná par isiacab dxi ni rzilaaz bniety?

¹⁷ Chi gunii Jesús ziy, irate de ni rdxichné laany bianxtiudeb. Per iraru de bniety rzaclaazdeb pur irate de cos güen ni runny. *(Mt. 13:31-32; Mr. 4:30-32)*

¹⁸ Ne ziyza gunii Jesús:

—¿Xádxaza xquel iniia laat par gacheet xa ná guelrnabee xte Dios, o xiza cos iliuua laat par gachezaacti xa ná guelrnabee xtenny?

¹⁹ Laani náni zec tuby biny xte cuaan ni lá mostaza ni rbaaicqui bniety lo lliani, ax rerooni axtqui racni zec tuby yagroo ax runchuu de maniin xpitiaazni lo de llizni. *(Mt. 13:33)*

²⁰ Ziyza raipy Jesús laadeb:

—¿Xádxaza iniia laat ná guelrnabee xte Dios te par gachezaacti xa náni?

²¹ Laani náni zec levadur ni rguuch tuby bniety gunaa cun chon medid harin te pur masqui dudxiinzi levadurqui, per rzaguí irate cubqui. *(Mt. 7:13-14, 21-23)*

²² Chi zé Jesús par Jerusalén, rseedny de bniety irate de guidx ne de ranch nez rut rdeedny,

²³ ax guu ni gunabdiidx laany:

—Dad, ¿ta duudxzi ná bniety ni gac perdón?

Laany cuaibny:

²⁴ —Gulgaany pur yiiut ruu puert ni ná dee te pur nare rniia laat dec zieny de ni icaaz yiu, per quit chaleeti yiuudeb.

²⁵ Te pur chi chazuldí bniety ni ná lizni ruy par ichiib ruu puert, laat ni yáanti detsqui seztí ruu puert ne sniit: “Dad, bxfalbiu.” Per laab iniib laat: “Quit gántia calí nez zéedti.”

²⁶ Chiy laat sulo iniit: “Dunni abquinnén ne bdenén laabiu, ne ladnez xtenni bseedbiu dunni.”

²⁷ Per laab iniib laat: “Aguniia laat, nare quit gántia calí nez zéedti. Gulbicá nez luaa iratecti de binduld.”

²⁸ Ruy guunti ne golaiti chi iniát Abraham, Isaac cun Jacob ne irate de profet xte Dios zuguaadeb lo guelrnabee xte Dios, ne laat agubicát tuby lad.

²⁹ Te pur bniety idubygabiite lo guichliu gueed, de bniety ni zá nez nort, nez sur, nez este cun nez oeste par subdeb iquiindeb lo guelrnabee xte Dios.

³⁰ Ne zienzi de ni ná lúltmi anre, laadeb ná ni gacdeb primer chiy. Chiy de ni ná primer anre, laadeb ná ni gacdeb lúltmi.

(Mt. 23:37-39)

³¹ Horqui bdziny tuby tiop de fariseu ax raipdeb Jesús:

—Quegüebiu irinqui nez, te pur rey Herodes rcaazbi quinxúb laabiu.

32 Per laany raipny laadeb:

—Gulchia ne gulgats maniosqui: “Bguiaa andxiré ne illí nare cadzıcaa de bındxab tuby lad ne casiaca de bniety racxú ne güidx ilduulla.”

33 Per ná par chala nez xtena andxiré, illí ne güidx, te pur quit náti par gaty tuby profet stuby güidx ni quit náti güidx Jerusalén.

34 ¡De bıny Jerusalén, de bıny Jerusalén, laat rguinxút de profet ne rcuaat guía de bniety ni zéed pur Dios! ¡Zienzi güelt bcaaza nichasaa laat zec ni rchasaa bıdy de lliinmi láani xiilmi, per quit ni nátit!

35 ¡Pur ningui, nare rniia laat dec ladxti teru quesentiand nalas yáanni. Ne rniizaca laat dec quitru chúuti dxi iniát nare axtqui chi idzıny dxi ni iniit: “Dichos ni zéed pur Xtadni Dios.”

14

1 Guu tuby dxi ni rzilaaz bniety, Jesús güequiinny liz tuby fariseu ni ná gurtisy. Chiy stuudx de fariseuqui caldaatsdeb laany.

2 Ne nez lony zuguaaza tuby bniety ngui ni dxaatec gui.

3 Chiy gunabdiidxny de maistri ni nán ley cun de fariseu:

—¿Ta zelee isiaca tuby bniety racxú dxi ni rzilaaz bniety, o quit chalee?

4 Per laadeb dxidxite biiandeb. Chiyru gunaaz Jesús bniety racxúqui, bsiacny laab ax raipny laab, quegüe.

5 Chiyru raipny de fariseu:

—Belati tuby xpurrti o tuby xcúunzacti yab láani bzia dxi ni rzilaaz bniety, ¿tatix quit cuéetmí hóracqui?

⁶ Ax xíteete quit güeleeti nicaibdeb.

⁷ Chi guná Jesús xa xquel run de bioos pur subdeb rut riáld sub de biny ni mazru sac, ax raipny laadeb:

⁸ —Chi iduunu chuu tuby saa, quit subtiu rut riáld sub de biny ni mazru sac. Te pur belati idziny stuby bioos ni mazru sac que liú

⁹ ax ni baany cumbid iroptet zelee guedniib liú: “Bdeed rut zubu bniétré.” Chiy liú zianxtiuu ne zesuu ruy par chasubu lúltmí yallily.

¹⁰ Pur ningui, güenru chi rundeb cumbid liú, guzub axt lúltmí yallily, te par chi gueed ni baany cumbid liú ax iniib liú: “Xmiguaa, quedaa ruré subu rut mazru nazaac.” Ziy xquel izubyaadeb liú nez lo de bniety ni zubnú lo mílly.

¹¹ Te pur ni rzubyaa lagac laani ax zunbichiinbí ne elqui ni runbichiin ax subyaadeb laab.

¹² Chiyru raipy Jesús bniety ni baany cumbid laany:

—Chi iguaadu tuby comid o tuby cenza, quit gúntiu cumbid de xmiguu, niçli de betsu, niçli de xfamiliu, niçliza de vecin ricu xtenu. Te pur laadeb ax zuuza dxi gúndeb cumbid liú ax zallac ni bquiindeb lizu.

¹³ Güenru, chi gúnu tuby laní, baany cumbid de bniety ni ná probeen, de bniety ni quit nazaac naani, de bniety cojeen, cun de bniety ciagu.

14 Ne chiyru xíclaboo te pur masqui quit xo quillytideb loo, per mazru loc ni inñdx Dios liú dxi ni ibány de bniety ni baany zec ni riáld nez lony.

(Mt. 22:1-10)

15 Chi bindiag tuby de ni zubnédeb lo milly ziy, ax raipbi Jesús:

—Xíclabaa ni yáld iquiny lo guelrnabee xte Dios.

16 Chiy raipy Jesús laab:

—Tuby bniety nguiu baanbi xgab ideedbi tuby cen, ax baanbi cumbid zieny de bniety.

17 Ne hor ni agúndeb cen chiy bxiaaldbi xmosbi par chagaipbi irate de bioos: “Gultaaguibti te pur irate agüelee.”

18 Per iratedeb guzulo rnaabdeb dispens lob. Nidoote tubybi gunii: “Gutslaab gúnbi dispens naa te pur testepac gulull guziaa tuby ldaa guichliu. Anre ná par chaguíaa xa náni.”

19 Stubybi gunii: “Nare guziaa gaay nez gúun. Anre chagania pruebdem dún xa xquel rundem. Gutslaab gúnbi dispens nare.”

20 Chiy stubybi gunii: “Nare testepac bichnaa. Pur ningui, anre quit chaleeti cháa.”

21 Chi bieccqui mosqui, gudixteeb lo xlámbi irate zec ni guc. Ax bdxich xlámbi. Chiy raipbi mosqui: “Gueeldzi quegüe iduibte láani guidx ne axt de ladnez ni ná mazru xgaats. Quegüellii de bniety ni ná probeen, de bniety ni quit nazaac naani, de bniety ni ná cojeen cun de bniety ciagu.”

22 Chi baany mosqui ziy ax raipbi xlámbi: “Dad, abaania zec ni gunabeebiu nare, per zeczi nuuru rut cuedeb.”

23 Chiy laab raipbi mosqui: “Quegüe lo de carreter ne de nez lo guiix. Baany juers stuby de bniety par yiudeb te par chatec liza,

24 te pur nare rniia liú dec nic tuby de ni baania cumbid gulo quit iquiinti cen xtena.”
(Mt. 10:37-38)

25 Zieny de bniety guzanald Jesús. Laany bziacquilony ax raipny laadeb:

26 —Belati nuu ni rcaaz sanald nare, ná par icaazbi nare mazru que xtadbi, que xnanbi, que chialbi que de lliinbi, que de betsbí o de bzaanbi, ne mazru icaazbi nare que guelnabány xtenbi o quit chaleeti gacbi xpinnia.

27 Ne elqui ni sanald nare ne quit rcaazbi teedbi guelzii pur nare, quit chaleeti gacbi xpinnia.

28 Belati izuubzin nuu ni rcaaz izuub tuby yuu zaac, ¿ta gati nidoote subllgáb par gúnbi xgab xte de gaxt dún la zaldqui xmilbi par ilduullbi yuuqui?

29 Te pur belati laab gúnbi púrzi cimient, chiy ax quit xo ilduulltibiy, irate de ni iniá sulo gúndeb burli laab

30 ax iniideb: “Bnietre aguzulo cazuubbi yuu, per quit güleeti nilduullbini.”

31 O belati izuubzin tuby rey gúnbi guerr cun stuby rey, ¿tatix quit subllgáb nidoote gúnbi xgab dún la cun tsi mily suldad zelee gúnbi gan lo rey ni zéed contri laab cun gáld mily suldad?

32 Per belati rillob quit chaleeti gúnbi gan lo reyqui, ax anste idziny reyqui, laab sxiaaldbi de

ni chatíly diidx zaac par cuzdeb sin didxguidx.

³³ Anre ziytiziaczaquiy tutix bniety ni quit isáan irate ni napbi, quit chaleeti gacbi xpinnia. *(Mt. 5:13; Mr. 9:50)*

³⁴ 'Zed güenqui náni. Per belati ibicá ni nallini, ¿xólesa illiúni stuby?

³⁵ Quit illiútini nicli par lo yiu nicli za par lo abon sino que irichzin. Elqui ni rcaaz icuadiag, gulcuadiag.

15

(Mt. 18:10-14)

¹ Irate de cobrador xte impuest ne cun de biny ni quit nabány zec ni rnabee ley ni zenuu de bniety Israel, güebiideb rut zuguaa Jesús par guindiagdeb ni rniiny.

² Pur ningui, de fariseu cun de maistri ni nán ley rniyádeb laany, rniideb:

—Bnietré rdxaab lo de binduld ne rquinnézacbi laadeb.

³ Chiy bené Jesús laadeb cuendré:

⁴ —Belati tubyti napbi tuby gayuaa llíily ax itiiunbi tubymi, ¿tatix quit isáanbi dzi noventa y nuevni lo guix par chatílybi llíily ni gunity axtisy idxialbim?

⁵ Ne chi abdxialbim ax rzaclaazbi izubllalliibmi.

⁶ Chiy chi idzinbi lizbi, ichasaab de xmigubi cun de xvecinbi ax gaipbi laadeb: “Gulzclaaz zec ni rzaclaaza te pur abdxiala llíily xtena ni gunity.”

⁷ Anre rniia laat dec ziytiziaczaquiy mazru nuu guelzclaaz llayabaa pur tuby binduld ni

yialaaz pur de xtuldni que pur noventa y nuev bniety zaac ni quit rquiinti ichu xgab.

⁸ Ne ziyza belati tuby gunaa ni nap tsi mily de plat chiy itiiunbi tubyni, ¿tatix quit icuaguib bal ax ilduubbi laniuu caguílgabni zacrua axtqui idxialbini?

⁹ Ne chi abdxialbini ax ichasaab de xmigubi cun de xvecinbi ax gaipbi laadeb: “Gulsacilaaz zec ni rzacilaaz te pur abdxiala mily ni btiuna.”

¹⁰ Anre rniia laat dec ziytiziaczaquiy nuu guelzilaaz rut rbez de ángli xte Dios pur tuby binduld ni rialaaz pur de xtuldni.

¹¹ Ziyza gunii Jesús:

—Tuby bniety guu tiop llingaanbi.

¹² Chiy ni ná mazru bniiny raipy laab: “Pap, danébiu herency ni riálda.” Chiy xtadbi gudiizbi de guelnazaac xtenbi lo iroptedeb.

¹³ Duudxzi guc ni cuáadeb herency ni riálddeb, llingaanbi ni ná mazru bniiny btóogacbi irate de herency ni biáldbí. Ax cun milyqui zégacbi zit, rut güeganxlieezipacbi gaxt irate xmilbi pur ni baanbi zectisy ni bdedgan laab.

¹⁴ Per chi bra xmilbi, chiy guu tuby gubiny nez rut nuub, ax guzulo banlieedxbi ni iquiinbi.

¹⁵ Chiyru güetíilybi dziiny liz tuby de bniety nezqui. Ax bxiaald bnietyqui laab chagapbi de cuch lo guix.

¹⁶ De tant ni rldiaanbi ójla laab xo iquiinbi ni ro de cuch, per quit tu bdeedti ni iquiinbi.

¹⁷ Chiyru baanbi xgab nab: “¡Liz xtada zienzi de mos nuu ne axt runsobri ni iquiindeb, ne nare nezré agatia pur guelrldiaan!

18 Anre azaa yaicquia liz xtada ax gapiab:
Xtada, absacluaa Dios ne absaclozaca laabiu.

19 Quiñru riáldti iniibiu nare lliinbiu.
Gulucuendbiu nare zec tuby xmosbiu.”

20 Chiyru biunezbi biecuibi liz xtadbi.

’Per zitrú zéedbi chi guná xtadbi laab ax bgáb
laab. Chiy rlluuin xtadbi güechalo laab, ax
gudeez xtadbi laab, ne gudob ruub.

21 Chiyru raipbi xtadbi: “Xtada, absacluaa Dios
ne absaclozaca laabiu. Quiñru riáldti iniibiu nare
lliinbiu.”

22 Per xtadbi as raipbi de xmosbi: “Gueeldzi
gulchacáa de lady zaac gulguacu llinia, chiy
gulduuza tuby aniy xcuanaab ne gulcuua sabád
niib.

23 Chiyru gulchacáa bserr ni mazru ndiio ax
gultinmi par iquiinnim te idxanni tuby laní.

24 Te pur par nare aguty llingaana, ne anre
agubíi gubánybi stuby. Agunitbi ne anre
abdxialniib.” Ax guzulo cayunacdeb laníqui.

25 ’Lalzi nuudeb ziy, llingangulob zeczi nuub lo
guiix. Parzi deni zedzingaxbi lizbi, chi bindiagbi
rac muisqui xte ni cayáadeb,

26 chiy guridxbi tuby de mos ni nuu lizbi ax
gunabdiidxbi xi cosqui cayac lizbi.

27 Chiy raipy mosqui laab: “Ady pur bíaad
betsu ax gunabee xtadu guty bserr ni mazru
ndiio pur nadaanquib bíaadbi.”

28 Per llingangulobqui quesentiand bdxiiichbi
parzi quit nátib yiiub ax bdiia xtadbi par
güeganlas lob yiiub.

29 Chiy raipbi xtadbi: “Laabiu nánbiu beld iz
aguc cayuna dz#ny cun laabiu ne gady chúuti dxi

isacluua laabiu ne, ¿gúclesa bn#dxbiu naa masiuzatuby chiveen par gúna tuby laní cun de xmiguua?

³⁰ Per anre ni bíaad llingaanbiuré, ni güegaany perdid xmilbiu cun de gunaadxab ax purlesa ning gunabeebiu guty bserr ni mazru ndiio.”

³¹ Chiyru raipy xtadbí laab: “Llingaana, liú lllillite zuguaníaa liú ne irate ni napa ná xixtenu.

³² Per anre nápac par gac tuby laní ne izaclaazni te pur betsu par nare aldi gutybí ne anre agubíi gubánybi. Agunitbí ne anre abdxialnib.”

16

¹ Jesús raipzacny de xpinny:

—Guu tuby ricu gúpbi tuby mos ni guc cargu de irate, chiguld güetixteedeb dec mosqui cayunxlieezipacbí gaxt de xixte lámqui.

² Chiyru gurídxbi mosqui ax raipbí laab: “¿Xi zelo ni rindiaga cayunu? Bdeed cuend nare ni cayunu, te pur aquitru chazati in#dxa dz#ny liú.”

³ Chiy mosqui guzulo baanbí xgab: “¿Xa gúna anre? Xláma a isáanbí nare sin dz#ny. Quit naptia juers par gúna dz#ny lo guiix, ne rtiulozaca par quínia gun.

⁴ Anánna xa xquel gúna par chúu nez rut icaazdeb nare chi aquitru cayuna dz#ny.”

⁵ Chiyru gurídxbi tubyga pur tubyga de ni nazaaiby lo xlámbi. Chiy raipbí ni bdz#ny nidoote: “¿Belacti nazaaibiu lo xláma?”

⁶ Ax cuaibbí: “Nare zaaibia tuby gayuaa barrily sity de oliv.” Chiy raipbí laab: “A ni guluu

firmiré. Gurigapac te bchung. Bzuub cincuentzi barrily zaaibiu.”

⁷ Chiy gunabdiidxbi stubydeb: “Liú, ¿belac nazaaibiu lo xláma?” Ax guniib: “Tuby gayuaa medid trigu.” Chiy raipbi laab: “A guiits ni guluu firmiré. Bchung. Chiy bzuub ochentzi medid nazaaibiu.”

⁸ Parzi quesentiand rdxalo lámqui guelnasin xte mos malqui pur de ni baanbi. Ni nápacni mazrulza viv de ni quit zenuu xnez Dios cun saadeb que de ni azenuu xnezny.

⁹ Ningui nare rniia laat gulgaany us de xixtenti lo guichliuré par gacné, te par chúu ni icaaz laat ax chi abra de xixtenti, anuu ni icáa laat rut gapti guelnabány par chazy.

¹⁰ Elqui ni run zec ni riáld cun duudxzi, ziyza zunbi zec ni riáld cun zieny. Ne elqui ni quit run zec ni riáld cun duudxzi ziyza quit xo gúntib zec ni riáld cun zieny.

¹¹ Anre ziygacquiuy laat belati quit runti zec ni riáld cun guelnazaac ni nuu lo guichliuré, ¿túlesa gap confianz laat cun de guelnazaac xte llayabaa?

¹² Ne belati quit runti zec ni riáld cun ni quit ná xixtenti, ¿túlesa in#dx laat ni riáldti?

¹³ Nic tuby mos quit chaleeti gún dziiny lo tiop lám. Te pur sdxichnéb tubybi, chiy ax scaazbi stubybi, o zaczacbi güen cun tubybi ax zunbi despresy stubybi. Pur ningui quit xo gúntit sirvi lo Dios ne lo mily.

¹⁴ Ne cun de fariseu mazru rcaazdeb mily parzi chi bindiagdeb ni gunii Jesús, guzulo rundeb burli laany.

15 Chiy raipy Jesús laadeb:

—Laatiy runti laat binzaac nez lo de bniety, per Dios nánnny xa ná lazdoot. Ne masqui runti gan reldilaaz de bniety laat dec sacti, per nez lo Dios xíteete sactit.

16 'Desde chi bdiacá Juany Bautist agac nuu ley xte Moisés ne de diidx ni bcuaa de profet. Per desdi chiy guzulo rr#ch de didxzaac xa ná guelrnabee xte Dios, ax zieny bniety quesentiand cayun pur yiuu lo guelrnabee xtenny.

17 'Mazru sensiy nitlo yabaa ne guichliu, que yáan tuby diidx ni zéed lo ley sin quit gac cumplirni.

(Mt. 19:1-12; Mr. 10:1-12)

18 'Belati tuby nguii gacchuu xquiitsbi par ldáab chialbi, chiy as guchnaab cun stuby gunaa ax duldiy cayunbi. Per belati rbesli dec teste guláadeb, chiy as zuguaaga stuby nguii ni guchnaa chialbi, ax duldaczaquiy.

19 'Guu tuby ricu, ni guzuchuu cun púrzi lady zaac, ne llillite rquinzaacbi pur tant ricu ni gucbi.

20 Ne guuza tuby bniety probeen bdialá Lázaro, rzubbi ruu puert xte ricuqui. Ne quesentiand zieny guidxuudx guu t#x#bi.

21 Lázaroqui ójla laab xo iquiinbi masiu de ni riab niguét xmilly ricuqui, ne axt de beecu reldiia de gu#dx ni nuu t#x#bi.

22 Chi bdziny dxi ni guty Lázaro, ax güené de ángli xte Dios laab llayabaa rut nuu Abraham. Ziyza guty ricuqui, ax bgaatsbi.

²³ Deni cadeed ricuqui guelzii infierni ax bldiaslob, chiy de zit gunáb zuguaa Lázaro cuee Abraham.

²⁴ Ax gurixtiab: “Xtada Abraham, blaslaazbiu nare, ne bxiaaldbiu Lázaro iguadxbi quia tuby xcuanaab par guedsialdiub ludxa, te pur quesentiand guelzii cadedá lo balré.”

²⁵ Per Abraham raipy laab: “Llingaana, güenelaaz dec quesentiand guzaclaazu chi gubániu lo guichliu, ne Lázaro nalas gubánybi. Anre laab riáldbí rut saclaazbi chiy liú riáldu rut tedu guelzii.

²⁶ Ne ziyza rniia liú: glayti nuu tuby barrancroo quesentiand. Pur ningui nic tuby de ni nuu rurén quit xo teedti rut zugoo, nicza de ni nuu rut zugoo quit xo gueedti ruré.”

²⁷ Chiyru gunii ricuqui: “Rguiin rnaaba lobiu pis xtada Abraham, bxiaaldbiu Lázaro liz xtada

²⁸ te pur nuu gaay betsa, par quixteeb lodeb, te quit gueedzadeb rut nuu guelzirooré.”

²⁹ Per Abraham raipy laab: “Laadeb napdeb de guiits ni bcuaa Moisés ne de profet. ¡Güenru gúndeb cuend ni cá lo guiitsqui!”

³⁰ Ricuqui cuaibbi: “Quit xoti, xtada Abraham, per belati ibány tuby binguty ne chaliulob lodeb chiyru laadeb zialaazdeb pur de xtulddeb.”

³¹ Per Abraham raipy laab: “Belati laadeb quit rundeb cuend xtiidx Moisés ne de profet, ¿xólesa chaldilaazdeb masqui ibány tuby binguty?”

17

(Mt. 18:6-7, 21-22; Mr. 9:42)

¹ Jesús raipny de xpínny:

—Nuupac de cos ni cugueegu bniety par gúnbi duld. Per, ¿probliza ná bniety ni cugueegu stuby bniety par gún duld!

² Par laab güenru su ildiibdeb tuby guia xte mulin guinybi par chazáalddeb laab lo nisdoo, xlat ni cuguegubi tuby de ni teste güeldilaaz nare.

³ Gulcualo laa.

‘Belati xi tuby mal gún tuby de soo, blidxbi, ne belati yialaazbi pur ni baanbi ax baany perdónbi.

⁴ Masqui gadz güelt láani tuby dxi chúu xi iniib o gunnézabi liú, ne belati gadz güeltza guedniib liú: “Baany perdón nare, aquitru ibíiti gúna ziy”, ná par gúnu perdónbi.

⁵ Chiy raipy de apóstol Jesús:

—Bguaadrubiu dunní mazru guelreldilaaz.

⁶ Chiy cuaby Jesús lodeb:

—Belati reldilaazti, masqui zeczipac tuby biny xte mostaza ná guelreldilaaz xtenti, zeleé gaipti yag sicómorore: “Biiax ruc chiy quegüesub lo nisdoo”, ne yagqui scuadiagni xtiidxti.

⁷ ‘Izuubzin belati tubyti napbi tuby mos chiy chi guiaad mosqui belati güegaanbi o güegapzabi de ladxaa, ¿tatix zaiptib: “Biiu, guri te iquiiniu?”

⁸ sino que zaiptib: “Bchu chiy banchuu ni iquiinia ne baany cuend nare lalzi caquiinia ne caguía chi ldull iquiinia chiyru azelee iquiiniu ne guíiu.”

⁹ Ne niclidxa xtiosten quit gaiptib pur ni cayuntisbi ni riáld gúnbi.

¹⁰ Ziyzaquiy laa, chi ldull gúnti irate ni gunabee Dios laa, chiy gulnii: “Naizni de mos ni quit illiú te pur bdxantisni ni riáld idxanni.”

¹¹ Deni zé Jesús par Jerusalén chiy gudeedny nez rut dxaa Samaria cun Galilea.

¹² Ax chi zeyiuny láani tuby guidxiin, güechalo tsi de bniety nguii ni rac guelguidx ni lá lepra laany. Per zit xquel guzuguaadeb

¹³ rbixtiadeb:

—¿Jesús, Maistri, blaslaazbiu dunni!

¹⁴ Chi guná Jesús laadeb ax raipy laadeb:

—Gulchaliuu laa lo de bxoz.

Ne lalzi deni zédeb, bía tixdeb xte guelguidx ni racdeb.

¹⁵ Chiy tubybi deni gucbeeb dec abiabi, ax biecuibi rbixtiab rniib de diidx zaac lo Dios.

¹⁶ Ax guzullibbi lo Jesús, guzutec lob lo liu par bdeedbi gracyny. Ne bniety Samaria laab.

¹⁷ Chiy gunii Jesús:

—¿Ta gati tsi ná de ni bsiaca? ¿Cúnlli dzi gaadeb?

¹⁸ ¿Ta tubyzi bniety zítre biecuini de diidx zaac lo Dios?

¹⁹ Chiyru raipy Jesús laab:

—Quegüesú. Quegüe. Abiacu pur ni güeldilaazu.

(Mt. 24:23-28, 36-41)

²⁰ De fariseu gunabdiidxdeb Jesús gúcqui idziny guelrnabee xte Dios, ax cuaibny:

—Xquel ni idziny guelrnabee xte Dios quit nátini ni chalee yianlot.

21 Ne quitza tu iniiti: “Any zuguaa ruré”, o “Any re”, te pur guelrnabee xte Dios ania zuguaa glayti.

22 Chiy raipny de xpinny:

—Teru idziny dxi chi icaazti iniát nare Bniety ni bxiaald Dios masiu tuby dxi, per quit iniátit naa.

23 Masqui chúu ni inii laat: “Abzuguaa rurén”, o “Abzuguaa nezre.” Per quit chanaltditdeb.

24 Te pur zecqui chi rdiniia ax rca bcháa llayabaa de tuby lad axtqui stuby lad, ziytiziaczaquiy gac dxi ni guelda stuby lo guichliu nare Bniety ni bxiaald Dios.

25 Per nidoote ná par teda guelzii quesentiand, ne gaca despresy pur de biny tiampanré.

26 Zec ni gac gulalqui chi gubány Noé, ziygacza gac dxi ni guelda stuby nare Bniety ni bxiaald Dios.

27 Te chiy bquiindeb, güéedeb, bichnaadeb, ne bdeedzadeb lliindeb par guchnaa axtqui chi bdziny dxi ni biiu Noé láani barcuroo ni banchuub ax guzulo nisguiadux ni gudinxú iratedeb.

28 Ziygacza gac chi gubány tuby bniety ni bdialá Lot lo guichliu: de bniety bquiindeb, güéedeb, btóodeb ne guziideb, guzibindeb iralote ne bzuubdeb de yuu.

29 Per chi bdiia Lot láani guidx Sodoma, guzulo riab gui llayabaa cun azufri, ax guty iratedeb.

30 Ziytiziacza gac dxi ni guelda stuby nare Bniety ni bxiaald Dios.

31 'Dxi ni gac ziy, belati nuu ni zuguaa quia yuu quit yiattib par chaldeeb de xixtenbi ni

nuchuu laniuu. Ne belati nuu ni zuguaa lo guix, quit yaicquitib lizbi.

³² Gulchanelaaz xa xquel gudeed chial Lot.

³³ Elqui ni mazru run pur guelnabány ni napbi lo guichliuré zuu chi initbini. Per elqui ni gaty pur nare, zapbi guelnabány llayabaa.

³⁴ Nare rniia laat dec guxinqui rut náгаа tiopdeb lo tubyzi luun, tubybi ze, stubybi yáan.

³⁵ Ne rut cayut tiop de bniety gunaa tubyzi lat, tubybi ze, stubybi yáan.

³⁶ Ne rut zuguaa tiop de bniety nguiiu lo guix, tubybi ze, stubybi yáan.

³⁷ Chi bindiag de xp̄inny ziy ax raipdeb laany:

—¿Calí, Dad?

Chiy Jesús cuaibny lodeb:

—Rut náгаа tuby manyguty ruy rdxasaa de bech.

18

¹ Jesús benény laadeb tuby cuend, par bseedny laadeb dec nápac par inaabdeb lo Dios sin quit chaxaclaasztideb.

² Ax raipny laadeb:

—Guu tuby guidx rut guu tuby juez. Quit bdxibtib Dios, ne quitza baantib cuend de bniety.

³ Ne lagacza láani guidxqui rbezza tuby gunaa viud, ax renaabbi lo juezqui par gúnbi castigu tuby ni rdxichné gunaaqui.

⁴ Per juezqui xchi quit baantib cuend gunaa viudqui, per chiyru ax baany juezqui xgab nab: “Masqui quit rdxibia Dios, ne quit runa cuend de bniety,

⁵ per gunaac zélaa cayunbì storbì nare. Güenru gacníab par quitru chalaá gueedbì anste chadxa paciency xtena.”

⁶ Chiyru raipy Jesús laadeb:

—Ziy xquel gunii juez malqui.

⁷ Pur ningui, latixcu Dios quit gacnény de bniety xtenny ni agulény chí rnaabdeb lony rdxí ne guxin. Ne, ¿tatix zacldaa gacnény laadeb?

⁸ Nare rniia laat dec zacnény laadeb sin quit gacldaatiny. Per chi guelda stuby nare Bniety ni bxiaald Dios, ¿tuguan la sdxialrua de bniety ni reldilaaz Dios lo guichliu?

⁹ Jesús benény laadeb stuby cuend, par de ni rlilo ná bínzaac, chiy rundeb despresy stuby de bniety, ax guniiny:

¹⁰ —Tiop bniety nguiü güedeb laniudoroo xte Jerusalén güenaabdeb lo Dios: tubybì ná fariseu, stubybì ax ná cobrador xte impuest.

¹¹ Fariseuqui, guzuldíb gunaabbì lo Dios squé: “Xtiosten laabiu, Xtada Dios, te pur nare quit nátia zec stuby de biny, zec de ni ná gubaan, de ni ná mal, de ni nap stuby gunaa, per niclí zec ni ná cobradore quit nátia.

¹² Nare rcuana tiop güelt láani tuxman, ne rniüdxzaca diezmi xte irate ni runa gan.”

¹³ Per bniety ni ná cobrador xte impuestqui, zit guzuguaab ne niclí quit baantib pur nildiaslob llayabaa, sino que rgapbì rulazdoob rniigab: “¡Xtada Dios, blaslaazbiu nare naa tuby binduld!”

¹⁴ Nare rniia laat dec cobrador xte impuestqui abaany Dios perdón laab chí bieequibì lizbì, per fariseuqui quit baantiny perdón laab. Te pur

elqui ni rzybyaa lagac laani quit xi sactib nez lo Dios. Per elqui ni runbichiin, laabiy mazru sacbi nez lo Dios.

(Mt. 19:13-15; Mr. 10:13-16)

¹⁵ Ziyza güené de bniety de bniniin rut zuguaa Jesús par iguaaldny laadeby. Per chi guná de xpiny ziy, guzulo rdildnédeb de bniety ni güené laadeby.

¹⁶ Per Jesús gurixny laadeb, raipny laadeb:

—Gulsaan guedná de bniniin nare, quitru rcuat. Te pur guelrnabee xte Dios ná par de bniety ni ná zec laadeby.

¹⁷ Te nare rniia laat dec elqui ni quit reldilaaz guelrnabee xte Dios zec tuby bniniinré, quit chaleeti yiiub lo guelrnabee xte Dios.

(Mt. 19:16-30; Mr. 10:17-31)

¹⁸ Tuby biny ni rnabee gunabdiidxbi Jesús:

—Güen Maistri, ¿Xi riáld gúna par gapa guelrnabány par chazy?

¹⁹ Jesús raipny laab:

—¿Xíni rniiu dec güen naa? Quitru tu náti güen, quesoltisy Dios ná güen.

²⁰ Liú nánnu de mandamient: “Quit náti par gapu stuby gunaa. Quit quinxútiu bniety. Quit gactiu gubaan. Quit güeetiu dixú pur de bniety. Gúp didxdoo xtadu cun xnanu.”

²¹ Bnietqui raipbi Jesús:

—Irate de cosqui cayuna desdi chi naa bichiin.

²² Chi bindiag Jesús ziy ax raipny laab:

—Per rievedx gúnu stuby cos: güetóo irate de ni rápu ax bdeed milyqui de prob, te ziy xquel gapu guelnaaac llayabaa. Chi abtóo de xixtenu, ax quedanalld nare.

23 Per chi bindiag bniety ziy, quesentiand nalas biiand, te pur la ricu náb.

24 Chi guná Jesús dec laab nalas nuub, ax guniiny:

—¡Quesentiandquiza nagán par yiu de ricu lo guelrnabee xte Dios!

25 Mazru senciy teed tuby camey guidy xte tuby guichgull, que par yiu tuby ricu lo guelrnabee xte Dios.

26 Per de ni bindiag ni guni Jesús ax guniideb:
—¿Túlesa chalee gac perdón lo Dios pur de xtudni?

27 Chiyru cuaby Jesús lodeb:

—Nuu ni nagán par bniety guichliu, per par Dios xíteete nagánti.

28 Chiy raipy Bed laany:

—Dad, dunní absáanní irate ni rdxapni par izanaldni laabiu.

29 Jesús ax cuaibny:

—Nare rguixtiia lot, dec tutix bniety ni rsáan lizni, chialni, de betsni, o xtadni, o xnanni, o de lliinni, pur guelrnabee xte Dios,

30 laab mazru zieny ni icáab lo guichliuré. Ne zapbi guelnabány par chazy llayabaa.

(Mt. 20:17-19; Mr. 10:32-34)

31 Jesús guridxny tsibtioy xpiny tuby lad, ax raipny laadeb:

—Anre choon Jerusalén rut gac zec ni bcuaa de profet lo guiits pur nare Bniety ni bxiaald Dios.

32 Zundeb entriagu nare lo de binzít, ax zundeb burli nare, iralozy ni iniideb naa ne stiuxíndeb luaa.

³³ Staaздеb nare, chiyru quinxúdeb naa. Per ni rion dxi ni agutia, sbíi ibánia stuby.

³⁴ Laadeb xíteete gucbeetideb ni guniiny, nicli quit gándeб tú pur rniiny, te pur zec ni guniiny quit releeti gacbeedeb xi zelo ni guniiny.

(Mt. 20:29-34; Mr. 10:46-52)

³⁵ Chi zedzingax Jesús guidx Jericó, tuby bniety nguiu ni ná ciagu zubbí cuee nez rguiinbí gun.

³⁶ Chi gucbeeb cadeed zieny bniety, ax gunabdiidxbi xi cosqui cayac.

³⁷ Ax raipdeb laab dec Jesús de Nazaret cadeed nezqui.

³⁸ Chiy desde rut zubbí gurixtiab:

—¡Jesús, llingaan David, blaslaazbiu nare!

³⁹ De bniety ni zanidy rdildnédeb laab par quitru cuxtiab, per laab mazru gurixtiab:

—¡Llingaan David, blaslaazbiu nare!

⁴⁰ Chiyru guzudxí Jesús ax gunabeeny laadeb chacáadeb bnietyqui. Chi bdzinbí gax ax gunabdiidxnny laab:

⁴¹ —¿Xi rcaazu gúna pur liú?

Bniety ciaguquí cuaibbi:

—Dad, nare rcaaza ibíi yianluaa stuby.

⁴² Jesús raipny laab:

—¡Azelee yianloo! Abiacu te güeldilaazu nare.

⁴³ Hóracqui agüelee gubíi bianlo bnietyqui, ax güenaldbi Jesús rniib de diidx zaac par Dios. Ne irate de ni guná xa guc, guniizadeb de diidx zaac par Dios.

19

¹ Jesús biiuny láani guidx ni lá Jericó ax guzulo cadeedny láani guidxqui,

² ne láani guidxqui rbez tuby bniety nguiu ni ná ricu ax láb Zaqueo. Laab rnabeeb lo de cobrador xte de impuest.

³ Zaqueo rcaazbi gumbieb Jesús, per quit releeti yianlobny te pur la zieny de bniety ne laab ax chaparrenzib.

⁴ Pur ningui blluuinbi guzan#dybi ne par güelee bianlob Jesús ax bieepybi lo tuby yag sicómoro ni zub gaxga rut ná par teedny.

⁵ Chi gudeed Jesús ruy, bguiaany nez yaa ax raipny laab:

—Zaqueo, quebiat angaré, te andxiré ná par yáana lizu.

⁶ Chiyru gueeld biat Zaqueo ne quesentiand rzaclaazbi zéneb Jesús.

⁷ Chi guná de bniety ziy, iratedeb guzulo rniyádeb Jesús rniideb dec laany zeyáanny liz tuby binduld.

⁸ Chiy guzuldí Zaqueo ax raipbi Jesús:

—Bguiaabiu, Dad, quiizia iruldti ni napa lo de prob. Ne belati nuu bniety ni abaania cobri mazru que zec ni ná par quillybi, anre ideedab tap zecti ni gulaanab.

⁹ Chiy raipy Jesús laab:

—Andxiré abaany Dios perdón irate de ni rbez liz Zaqueo pur reldilaazbi Dios zectiziac Abraham.

¹⁰ Ne nare Bniety ni bxiaald Dios zelda par zedtíilia de bniety ni quit zé xnez Dios par ildaadeb lo duld.

(Mt. 25:14-30)

¹¹ De bniety ni cacuadiag ni canii Jesús, laany benény laadeb tuby cuend, te pur azedzingaxny

Jerusalén ne laadeb ax rilodeb dec horqui idziny guelrnabee xte Dios.

¹² Chiy raipny laadeb:

—Guu tuby bniety nguui ni zá lo tuby family ni quesentiand sac. Zéb zit rut icáab guelrnabee par gacbi rey chiyru yaicquibi inabeeb ladxbi.

¹³ Anste idiiab, guridxbi tsi xmosbi, ne cad tubydeb, bdeedbi tubyga mily ni sac guyally, ax raipbi laadeb: “Gulgaany negocy cun milyré axtqui dxi ni yaicquia.”

¹⁴ Per de binladxbi cun rdxichnédeb laab, ax bxiaalddeb tuby cuua de biny ni zenald laab par güeniideb: “Quit rcaaztin gac binqui rey xtenni.”

¹⁵ Per laab bzudeb par gucbi rey, ax bieequibi. Chi bdzinbi, chiy gunabeeb güetidxdeb de xmosbi ni bdeedbi mily par gacheeb belacga abaany tubydeb gan.

¹⁶ Mos ni güe nidoote raipy laab: “Dad, mily ni bnidxbiu nare abaanni gan tsi zecti ni náni.”

¹⁷ Chiy raipy reyqui laab: “Güenquiy, abaaniu zec ni riáld. Ne pur baaniu zec ni riáld masqui cun duudxzi anre inidxa liú tsi guidx par inabiiu.”

¹⁸ Chi güe ni rrop mosqui ax guniib: “Dad, mily ni bnidxbiu nare abaanni gan gaay zecti ni náni.”

¹⁹ Ziygacza raipy reyqui bniétré: “Liú inabiiu gaay guidx.”

²⁰ Chiy güe stuby mosqui ax guniib: “Dad, a xmilbiuré. Nare guluchuuani láani tuby panit

²¹ te pur bdxibia laabiu. Te laabiu quit rgátibiu bniety, rcáabiu ni quit bsáanbiu ne rcáabiu de guelnazaac rut quit guzibinbiu.”

22 Chiyru gunii reyqui: “Mos mal, pur lagac de xtiidxu ningui riáldu castigu. Belati nánldiu dec nare quit rgátia bniety ne rcáa ni quit bsáana ne rcáa de guelnazaac rut quit baania dz#ny,

23 ¿xínii quit nialduu xmília bancu te par chi niecquia ax nicáani cun tod lliinni?”

24 Chiyru raipy reyqui de ni zuguaa ruy: “Guldzicá milyqui lob, guldeedni bniety ni nap tsini.”

25 Laadeb raipdeb reyqui: “Dad, per laab arápbi tsi mily.”

26 Reyqui cuaibbi: “Nare rniia laat elqui ni nap, ná par icáarub. Per elqui ni quit cuenzi nap, axt ni napbi sbicá.

27 Ne de ni rdxichné nare, de ni quit rcaaz gaca rey, gultanédeb rurén, ne gultinxúdeb nez luaa.”
(Mt. 21:1-11; Mr. 11:1-11; Jn. 12:12-19)

28 Chi bené Jesús laadeb cuendqui ax güelaa zény par Jerusalén.

29 Chi bdingaxdeb de guidx Betfagé cun Betania, ne gaxza nii dany ni lá Olivos, chiy bxiaaldny tiop de xpínny,

30 raipny laadeb:

—Gulchia guidx ni ná delantqui. Chi idzinti ruy idxialti tuby burreen cá yag, ne ruteete gady tu cueebti laam. Gulxaicquimi ax gultaném.

31 Ne belati chúu ni inabdiidx laat xínii bldátmi, gulgatsdeb dec Dad Jesús gunii chonénmi.

32 De xpínny güedeb ax bdxialdeb irate zectispac ni raipy Jesús laadeb.

33 Ne chi caxaicquideb burreenqui, de bniety ni ná xtenni laam gunabdiidxdeb:

—¿Xínii caxaicquiti burrqui?

³⁴ Laadeb cuaibdeb:

—Te pur Dad Jesús gunii chonénmi.

³⁵ Chiyru güenédeb burreenqui rut zuguaa Jesús, ne bzuubdeb xabdeb detsmi par gubeeb Jesúsmi.

³⁶ Chiy chi zeteed Jesús, ax guzulo rguix de bniety xabdeb lo nez.

³⁷ Ne chi bdzindeb quia dany Olivos par asulo yiatdeb, irate de bniety ni zanal Jesús guzulo rbixtiadeb pur tant rzaclaazdeb, ne rniideb de diidx zaac par Dios pur irate de milagri ni agunádeb.

³⁸ Laadeb guniideb:

—¡Dichos rey ni zéed pur Xtadni Dios! ¡Anuu guelrzaclaaz llayabaa! ¡Xtiosten Dios ni rbez llayabaa!

³⁹ Chiy de fariseu ni nuuch glay de bniety ni zanal laany, raipdeb laany:

—Maistri, gudildbiu de ni zanal laabiu te quitru iniideb zeec.

⁴⁰ Per Jesús cuaibny:

—Nare rniia laat dec belati laadeb iganydeb, de guia ná ni cuxtia zeec.

⁴¹ Chi bdziny Jesús gax Jerusalén, chi gunány guidxqui, Jesús biinny pur guidxqui,

⁴² ax guniiny:

—¡De biny Jerusalén, ójla masiu andxiré niacbeet tú chalee iguaad laat guelnaldiulaaz! Per anre xgaats nángu par laat, quit xo gacheetit.

⁴³ Teru idziny de dxi chi gún de ni rdxichné laat pader iduibrdonte ladxti, ne iranetzte gúndeb contri laat,

⁴⁴ ne sguinxúdeb laat. Chiy stsilydeb ladxti ne nic tuby guia quít isáantideb quia stuby guia, te pur quít baantit cuend hor ni bedtixlo Dios laat. *(Mt. 21:12-17; Mr. 11:15-19; Jn. 2:13-22)*

⁴⁵ Chiy chi biuu Jesús lo ldedoo Jerusalén ax guzulo rbéeny de ni catóo ne de ni cazii,

⁴⁶ raipny laadeb:

—Lo xquíts Dios rnii: “Liza ná yuu rut inaab bniety lo Dios.” Per laat abaantini zec cuev xte de gubaan.

⁴⁷ Llillite rseed Jesús de bniety laniudoroo xte Jerusalén, per de bxoz ni rnabee de bxoz cun de maistri ni nán ley, ne cun de gurtisy xte guidxqui, caguílydeb xa xquel gúndeb par quinxúdeb laany.

⁴⁸ Per quít bdxialtideb nez par gúndeb ziy, te pur irate de bniety quesentiand rcuadiagdeb ni rseedny laadeb.

20

(Mt. 21:23-27; Mr. 11:27-33)

¹ Láani de dxi ni zuguaa Jesús laniudoroo xte Jerusalén, caseedny de bniety, caliuuny de bniety xtiidx Dios. Chiy bdziny de bxoz ni rnabee de bxoz cun de maistri ni nán ley, ne cun de gurtisy xte Israel,

² ax raipdeb laany:

—Gunii dunnii, ¿tú xtidxbee runu de cosqui?
¿Tú bnídx liú guelrnabee?

³ Chiy raipy Jesús laadeb:

—Ziyza nare inabdiidxa laat tuby cos. Gulcaby,

⁴ ¿tú bxiaald Juany Bautist par itiubnisbi? ¿Ta Dios bxiaald laab o bniety guichliu?

⁵ Per laadeb guzulo cayueegacdeb diidx cun saadeb ax rniideb: “Belati iniin Dios bxiaald Juany Bautist, laab sniib dunnì, ¿xínii quit güeldilaaztib, pis?”

⁶ Ne quitza xo iniitin dec bniety guichliu bxiaald laab te pur sguinxú de biny dunnì cun guia, te iratedeb reldilaazpacdeb dec Juany Bautist guc tuby profet ni gunii pur Dios.

⁷ Chiyru ax cuaibdeb dec quit gántideb tú bxiaald Juany par itiubnisbi.

⁸ Chiyru raipy Jesús laadeb:

—Nicza nare quit iniitia laat tú bn#dx nare guelrnabee par runa de cosqui.

(Mt. 21:33-44; Mr. 12:1-11)

⁹ As guzulo caniné Jesús de bniety, benény laadeb cuendré:

—Guu tuby bniety nguui ni bzu de yag uv lo lliani, chiguld ax bdeedbini iruld de bniety ni nán run dz#iny xte uv. Chiy zégacbi zit rut güeldezbi.

¹⁰ Chi bdziny dxi ni gac iruld uv, bxiaaldbi tuby xmosbi par challii ni riáldbì. Per de binqui btaazdeb mosqui ax bzieecquideb laab sin xíteete.

¹¹ Chiy bniety ni ná xtenni guichliuqui bxiaaldbi stuby mos. Per ziygac de binqui gudédeb lo mosqui, btaazdeb laab ax bxiaalddeb laab sin xíteete quit nideedtideb laab.

¹² Bnietqui gubíi bxiaaldbi stuby mos, per de binqui baandeb herid laab ax guléedeb laab lo liuqui.

¹³ Chiyru gunii bniety ni rnabee guichliuqui: “¿Xa xquel gúna an? Ixiaalda llingaana ni

quesentiand rcaaza. Talbelati laab gapdeb didxdoo.”

¹⁴ Per chi guná de binqui laab, ax raipdeb saadeb: “Laabiꝝ ná ni yanné liu rut nuu uvqui. Gultoo idinxúnbi, par chalee gac guichliuc xtenni.”

¹⁵ Chiy guléedeb laab lo liuqui ax gudinxúdeb laab.

Jesús gunabdiidxny de bniety ni caninéꝝ:

—Anre laat, ¿xa rlilot gunné bniety ni ná xtenni guichliuqui laadeb?

¹⁶ Rguixtiia lot dec laab zeedbi par quinxúb laadeb ne sdeedbi guichliuqui stuby de bniety.

Chi bindiagdeb ziy ax guniideb:

—¡Quit cuelaaz Dios gac ziy!

¹⁷ Per Jesús bguiaany lodeb ax guniiny:

—Belati gati ziguiy, ¿xi zelo ni cá lo xquiits Dios rut rnií?:

Guia ni aldi guleguun de ni rzuub yuu, guiaqui ná ni mazru blliú par guzub yuui.

¹⁸ Tutix ni ldap guiaqui, laab sdeedbi guelzii. Per belati guiaqui yabni quia bniety ax snitlotecni bniety.

(Mt. 22:15-22; Mr. 12:12-17)

¹⁹ De bxoz ni rnabee de bxoz cun de maistri ni nán ley hóracqui rcaazdeb ninaazdeb Jesús, te pur gucbeedeb dec ni guniiny ná contri laadeb, per bdxibdeb de bniety.

²⁰ Ax bxiaalddeb de ni zeldaats laany, digaizy gúndeb dec laadeb nádeb bínzaac, par quiílydeb nez inii Jesús tuby diidx ni chalee gúndeb entriagu laany lo gobernador xte Roma.

²¹ Chiy gunabdiidxdeb laany:

—Maistri, dunnì nánni dec laabiu rniibiu ne rliuubiu zec ni riáld. Te pur nez lobiu tubylote ná bniety ne guldípacbiu rliuubiu bniety xa xquel rcaaz Dios ibány bniety.

²² Guniibiu dunnì, ¿ta ná güen idillyni xte impuest lo gobernador xte Roma, o quit náti güen?

²³ Per Jesús gucbeegacny de mal xgab xtendeb ax raipny laadeb:

²⁴ —Gul liuu nare tuby mily. ¿Tú lon cá loc, ne tú lánq cá loc?

Laadeb cuaibdeb:

—Xte rey César.

²⁵ Chiy raipy Jesús laadeb:

—Guldeed César ni ná xte César, ne guldeed Dios ni ná xte Dios.

Ax quit xi dixúti bdxialdeb nicuaquiadeb laany pur de ni guniiny nez lo irate bniety.

²⁶ Rdxalotisdeb zec ni cuaibny lodeb, ax quitru xi guniitideb.

(Mt. 22:23-33; Mr. 12:18-27)

²⁷ Chiguld tuby tiop de biny saduceu güeguaadeb Jesús. Ne de saduceuqui quit reldilaaztideb dec sbány de binguty stuby. Pur ningui raipdeb Jesús:

²⁸ —Maistri, ley xte Moisés rnii dec belati gaty tuby bniety nguüu ne isáanbi chialbi sin quit niactideb de family, chiy bets bniety ni gutyqui ná par guchnaab viudqui par gacdeb de family xlat betsbi ni gutyqui.

²⁹ Ne guu tuby family rut gucdeb gadz bets. Ni ná guloqui bichnaab, per gutybi sin quit niactib de family cun chialbi.

30 Chiyru ni rrop betsbiqui bichnaab viudqui per quitiac guctideb de family.

31 Chiyru bichnaa ni rionqui cun viudqui, ziytec xquel bichnaa viudqui cun irate gadzdeb, ne iratedeb gutydeb sin quit niactideb de family cun viudqui.

32 Pur lúltmi ax guty gunaaqui.

33 Pur ningui dxi ni ibány de binguty, ¿de lo ira gadz betsddeb tú rac chial gunaaqui te pur iratedeb bichnaa gunaaqui?

34 Chiy raipy Jesús laadeb:

—Lo guichliuré ruchnaa bniety ne rdeedzadeb lliindeb guchnaa.

35 Per de ni riáld gap stuby guelnabány cuby de ni ibány stuby, zecli nguui ne zecliza gunaa aquitru guchnaatideb.

36 Te pur aquitru gatytimeb, sino que laadeb agacdeb zec de ángli xte Dios, ne anágacdeb de lliin Dios pur agubánydeb stuby.

37 Dumni nánni dec sbány de binguty stuby. Te pur axt Moisés gunii ziy tuby lat lo xquiits Dios rut rnii dec gunáb yag ni cayaaicqui. Ax ruy rnii dec Xtadni Dios, laany nány Dios xte Abraham, xte Isaac, ne xte Jacob.

38 Ne Dios quit nátiny Dios xte de binguty, sino que xte de ni nabány, te pur par laany irate bniety nabány.

39 Chiy nuu de maistri ni nán ley raipdeb laany:

—Güenqui guniibiu Maistri.

⁴⁰ Ax aquitru xi nialltideb ninabdiidxdeb laany.

(Mt. 22:41-46; Mr. 12:35-37)

⁴¹ Per laany raipny laadeb:

—¿Xínii rnii bniety dec Crist rac lliin rey David?

⁴² Ne lagac David guniib lo libri xte Salmos: Dios raipny Dad ni rnabee naa:

“Guri lad naldí xtena

⁴³ axtqui gúna gan inabiiu lo de ni rdxichné liú.”

⁴⁴ Pur ningui belati Crist rac lliin David, ¿xínii raipy David laany, Dad?

(Mt. 23:1-36; Mr. 12:38-40; Lc. 11:37-54)

⁴⁵ Irate de bniety cacuadiag, ax raipy Jesús de xpinny:

⁴⁶ —Gulcualo cun de maistri ni nán ley. Te pur laadeb riulaazdeb candzadeb cun lady zaac xtende, ne riulaazzadeb gap bniety didxdoo laadeb lo nez. Chiy láani de yudoo rguílyzadeb subdeb lo de bangu rut rbe de ni mazru sac, ziygacza rundeb rut requiindeb.

⁴⁷ Ne ziyza rdzicádeb liz de gunaa viud chiy parlesa ná bniety dec güen nádeb, ax xipal ziuul de ldee ruulddeb. Per laadeb ná ni mazru castiguroo yálddeb.

21

(Mr. 12:41-44)

¹ Deni bldiaslo Jesús ax gunány casáan de ricu gun láani de alcancia xte yudoo Jerusalén.

² Ne gunázacny tuby gunaa viud probeen, casáanbi tiop cobreen láani alcanciaqui.

³ Chiy raipy Jesús de xpinny:

—Nare rguixtiia lot dec viud probeenré mazru sac gun ni bsáanbi que de gun ni bsáan iraru de bniety.

⁴ Te pur iratedeb rsáandeb púrzi ni run sobri laadeb, per laab masqui cun guelprob xtenbi, bsáanbi irate xcentaveenbi láani alcancíaqui, masqui niyzi napbi.

(Mt. 24:1-2; Mr. 13:1-2)

⁵ Deni cadxalo tuby tiop de bniety yudoroo xte Jerusalén, cayueedeb diidx pur de guia garbi ni guchuuni, ne pur de cos ni nazaac ni bguaad de bniety par zuchuuni. Chiy raipy Jesús laadeb:

⁶ —Teru idziny dxi irate de ni cadxalotqui, per nic tuby guia quit yáanti quia stubyni sino que iratecni ibily.

(Mt. 24:3-28; Mr. 13:3-23)

⁷ Chiy gunabdiidxdeb laany:

—Maistri, ¿gúc gac ziy? Ne, ¿xa ná ni gac seny dec azedyiub gac ziy?

⁸ Jesús raipy laadeb:

—Gulcualo par quit tu gúnti engany laat. Te pur zienzi ni gueed inii laat dec pur naa zéeddeb. Chiy iniideb laat: “Nare naa Crist”, o “Azeddzingax dxi ni gueedny.” Per quit chaldilaaztitdeb.

⁹ Ne chi gapti rson dec cayac guerr ne cadildy biny, quit idxibtit te pur nidoote ziy ná par gac, per gati pur ziyti ldull guichliu.

¹⁰ Chiy güelaaru raipy Jesús laadeb:

—Tuby naciony sdildy cun stuby naciony, ne de ni nap guelrnabee sdildzadeb cun stuby de ni nap guelrnabee.

11 Ne zac de lluroo, zuu gubiny ne guelguidx iranezte lo guichliu, ne llayabaa zianlot de cos ni idxibtí.

12 Per anste ni gac irate de cosqui, de biny snaazdeb laat steeddeb laat guelzii, zenédeb laat láani de yudoo par gúndeb castigu laat. Sguudeb laat láani lizguiib, zenédeb laat lo de rey ne lo de gobernador pur ni reldilaaztí nare.

13 Per ziy xquel par chúu nez gúeet xtiidxa nez lodeb.

14 Quit náti par chúut guelrsaa ne quit náti par gúnti xgab xa xquel icaibtí lo de biny rut ibiit

15 te pur nare in#dxa laat de diidx ni iniit ne guelnán. Nic tuby de ni rdxichné laat quit güelaazti de diidxqui nicza quit xo iniitideb contri laat.

16 Per laat zuu dxi axt xtadtí o xnanti, o de betstí, o de xfamiltí o de xmiguti zundeb entriagu laat ne de lo irat ax nuu ni gaty.

17 Ne irate binguichliu sdxichnédeb laat pur ni nát xpinnia.

18 Per nicli tuby guichquiat quit inittit pur ziy.

19 Ne pur ni rsutipnéti xtiidxa zialdtí guelnabány lo Dios.

20 Chi iniát dec iduibrdonte Jerusalén azuguaa de sultad, esqui aldull guidxqui.

21 Chiy de bniety ni zuguaa nez Judea ná par illuuindeb nez láani de dany, ne de ni zuguaa láani guidx Jerusalén ax ná par idiideb guidxqui, ne de ni zuguaa lo guiix quit náti par yaicquideb láani guidxqui.

22 Te pur de dxiqui gún Dios castigu de biny par gac irate zec ni rnii lo xquiits Dios.

23 ¡Probeenza de gunaa ni amer icáa bdoo ne de ni acaaza bdoo láani de dxiqui! Te pur quesentiand guelzii teed de bniety ne quesentiand guroo castigu yáld de binguidxqui.

24 Zuu ni gaty lo guerr, ne zuuza ni chanédeb pres lo irate de nacyony xte lo guichliu. Ne de binzít snabeedeb Jerusalén, axtisy yalo de dxi ni isaan Dios inabeedeb ruy.

(Mt. 24:29-35, 42-44; Mr. 13:24-37)

25 'Chiy zuu seny cun gubidx, cun bueen, cun de balgui. Ne lo guichliu irate de bniety sacandeb ne sdxibdeb te pur quesentiand diip chubi nisdoo.

26 De bniety axt stiuulddeb pur guelnadxiby chi gúndeb xgab xte de cos ni gac lo guichliuré ne axt de cos xte llayabaa sees.

27 Chiyru de bniety guichliu sniádeb Bniety ni bxiaald Dios rcuabcháany zéedny láani zá cun guelnaberoo xtenny.

28 Chi asulo gac de cosré, gulchuzaclaaz ne guldiaslo, te pur azeddzingax dxi ni ldát lo guelzii.

29 Ziyza raipny laadeb:

—Gulguiaa yag hig, o xitixza stuby yag.

30 Chi rniát dec ablllich de bldag xtenni laat racheet dec azeddziny tiamp xte guelnaldaa.

31 Ziygacqui, chi iniát sulo gac de cosré, zacheet dec abdzingax guelnabee xte Dios.

32 'Nare rguixtiia lot dec irate de cosré gac anste gaty irate de biny ni nabány anre.

33 Zuu dxi nitlo yabaa ne guichliu, per de xtiidxa quit yáantini sin quit gac cumplirni.

³⁴ 'Gulcualo par quit gún de vicy gan laa^t zeclí guelruz ne guelruu guelrsaa pur guelnabány xtenni te par chi guelda stuby, quit gac dxiqui par laa^t

³⁵ zec tuby tramp ni rdxii, te pur ziy gac dxiqui par irate de bniety guichliu.

³⁶ Gulsuguaa altant, llillite gulnaab lo Dios, par chalee ldát lo irate de cos ni gac lo guichliu, ne par chalee ibiit lo Bniety ni bxiaald Dios.

³⁷ Rdxí bseed Jesús de bniety laniudoroo xte Jerusalén, chiy guxin ax reyáanny láani dany ni lá Olivos.

³⁸ Ne irate de bniety, sidoo redeb yudoo Jerusalénqui par recuadiagdeb ni rniiny.

22

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Chi zedyiub laní xte pascu, chi rquiindeb guechtily ni quit ruuti levadur,

² chiy de bxoz ni rnabee de bxoz cun de maistri ni nán ley caguíilydeb xa xquel gúndeb par chalee quinxúdeb Jesús, te pur rdxibdeb de bniety.

³ Chiy biiu bindxab láani lazdoos tuby de xpinny ni lá Judas ni raipzadeb Iscariote.

⁴ Judas güeninéb de bxoz ni rnabee de bxoz cun de biny ni rnabee yudoo, ax benéb laadeb diidx xa xquel gúnbi entriagu Jesús laznaadeb.

⁵ Laadeb guzaclaazdeb ax guniideb ideeddeb mily laab.

⁶ Laab guzigueldacbi ax guzulo rguíilybi nez par gúnbi entriagu Jesús sin quit gacheeti de bniety.

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Chi bdziny laní xte pascu dxi ni rquiindeb guechtily ni quit ruuti levadur, ne chi rguindeb tuby llíily,

⁸ chiy gunabee Jesús Bed cun Juany, raipny laadeb:

—Gulchaganchuu ni iquiinni guxin xte pascu.

⁹ Laadeb gunabdiidxdeb laany:

—¿Calí rcaazbiu choganchuuni?

¹⁰ Jesús raipy laadeb:

—Chi yiiut láani guidx, ax iniát tuby bniety nguui ni zéne tuby rii nis. Gulchanaldbi axtisy rut yiiub,

¹¹ ax gulgats bniety ni ná lizni ruy: “Ziyla ná Maistri: ¿Cún laniuu ni iquinnía de xpínnia anguxin xte pascu?”

¹² Chiy laab iliuub laat tuby yuu ni rrop pis, ne anazaaclga láanqui. Ruy gulganchuu ni iquiinni guxinqui.

¹³ Chiyru güedeb ne bdxialdeb irate zectisy ni raipy Jesús laadeb. Ax banchuudeb ni iquiindeb guxin xte pascu.

¹⁴ Chi bdziny hor, Jesús cun de apóstol gurideb lo milly.

¹⁵ Chiy raipy Jesús laadeb:

—¡Quesentiand rcaaza iquinnía laat anguxin xte pascu anste ni teda guelzii!

16 Te pur nare rniia laat dec aquitru chúuti dxi iquinnía laat sino que axtisy lo guelrnabee xte Dios.

17 Chiy cuáany tuby cop vin, ne chi gulull bdeedny gracy Dios, ax guniiny:

—Gulcáa vinré, gultiizni lo iratecti.

18 Te pur nare rniia laat dec aquitru chúuti dxi iquiniia vin, axtisy dxi ni idziny guelrnabee xte Dios.

19 Chiyru cuáany guechtily, ne chi gulull bdeedny gracy Dios, ax bllullny guechtilqui, par bdeedny laadeb ne guniigany:

—Guechtilré ná cuerpi xtena ni abaania entriagu par gatia pur laat. Ne chi gúnti zeeec, gulgaanyni pur ni renelaazti nare.

20 Ne ziytiziac baanny cun cop ni nuu vin chi gulull baanny cen, ax guniiny:

—Vinré ná riny xtena ni ixíia chi gatia par illal tuby nez cuby xa gap bniety perdón lo Dios.

21 'Per anre ni gún entriagu nare a naab zuub lo milly rut zuub naa.

22 Per nare Bniety ni bxiaald Dios ná par teda zec ni a ná par teda. Per, ¡probliza ná bniety ni gún entriagu nare!

23 Chiy guzulo canabdidxsaadeb, túngui gún entriagu laany.

24 Chiguld guzulo cachaadeb lo diidx tú entri laadeb ná ni mazru sac.

25 Per Jesús raipy laadeb:

—Lo guichliuré de rey rnabeedeb de binladxdeb zec ni rcaazdeb, ne de ni rnabee, rni de bniety dec laadeb rundeb zec ni riáld.

²⁶ Per laat quit náti par gúnti ziy sino que elqui ni mazru sac lot, ná par gúnbi laab zec tuby ni gullieezy sac. Ne elqui ni rnabee, laab ná par gúnbi laab zec tuby ni run sirvi.

²⁷ Lo guichliuré de lám rzubdeb lo milly, ax de mos run sirvi lodeb. Per rurén quit cayacti ziy te pur nare zuguaníaa laat zec tuby ni cayun sirvi lot.

²⁸ 'Laat ná ni zuguanépecti nare lo de dxi ni cadedá guelzii.

²⁹ Pur ningui, nare in#dxa laat guelrnabee zec ni bn#dx Xtdani nare,

³⁰ ne squiinti lo milly xtena rut inabiia ne sbezacti lo de yallily par gúnti guelgurtisy irate de ni zá lo tsibtiof family xte Israel.

(Mt. 26:31-35; Mr. 14:27-31; Jn. 13:36-38)

³¹ Ziyza gunii Jesús:

—Simóny, Simóny, bguiaa canioo, bindxab agudiin laat, par idzibybi laat zec chi rbiiby trigu.

³² Per nare agunaaba lo Dios pur liú par quit isaanu ni reldilaazu nare. Ne chi agubí reldilaazu nare stuby, Bed, gucné de soo par sutipnédeb ni reldilaazdeb nare.

³³ Chiy ax gunii Bed:

—Dad, par nare quit xi gúnti masqui guiaguaa cun laabiu o masquiza axt gatia cun laabiu.

³⁴ Jesús raipy laab:

—Nare rniia liú, Bed, dec anguxiniacré, anste ni icuarsee bidygay, liú pur chon güelt aguniiu dec quit rumbeetiu nare.

³⁵ Chiy Jesús gunabdiidxny laadeb:

—Chi bxialda laat sin nic tuby bols, nicza mily nieliza xcuracti, ¿tatix nuu xi banlieedxti?

Laadeb guniideb:

—Xíteete.

³⁶ Chiy raipny laadeb:

—Per anre elqui ni nap mily ne bols ná par icáabni. Ne elqui ni quit ráp spad, itóob xabbi par siib tubyni.

³⁷ Te pur abdziny hor ni chagac zec ni rnii lo xquiits Dios pur nare rut rnii: “Ne gulucundeb laab lo de biny mal.” Irate ni cá lo xquiitsny pur nare ná par gac ziy.

³⁸ Chiy raipdeb laany:

—Dad, rurén caan tiop spad.

Laany cuaibny:

—Cun sol ziy.

(Mt. 26:36-46; Mr. 14:32-42)

³⁹ Chiyru bdiia Jesús, zec ni ná costumbri xtenny zény láani dany Olivos ax guzanald de xpinny laany.

⁴⁰ Chi bdzinny láani danyqui ax raipny laadeb:

—Gulnaab lo Dios, par quit gún bindxab gan laat.

⁴¹ Ax güeny zitpac zecti rut rcuaa bniety tuby guia, ax guzullibny ruy par gunaabny lo Dios

⁴² guniiny:

—Xtada, belati sigueldbiu, bldábiu nare lo guelzii ni ná par teda. Per quit gacti zec ni rcaaza, sino que zec ni rcaazbiu.

⁴³ Chiy bdiacá tuby ángli xte llayabaa par bdeed laany juers.

⁴⁴ Ne chi quesentiand guelzii cadeedny mazru cun gan rnaabny lo Dios, riabti de nis ni racnaainy lo yiu zecpacza de gotroo xte riny.

45 Chi güesuny rut gunaabny lo Dios, ax güenany de xpinny chiy bdxialny laadeb nayaaisdeb, pur ni la nalas nuudeb.

46 Chiy raipny laadeb:

—¿Xínii raaisti? Gulchaste, ne gulnaab lo Dios par quit gún bindxab gan laat.

(Mt. 26:47-56; Mr. 14:43-50; Jn. 18:2-11)

47 Zeczi caniné Jesús laadeb chi bdziny zienguilliú biny. Ne ni bdialá Judas, ni guc tuby de xpinny, laab zan#dyb# lo de binqui, ax güebinuub Jesús par gudob ruuny.

48 Chiy raipy Jesús laab:

—Judas, ¿ta zeec xquel gúnu entriagu nare Bniety ni bxiaald Dios?

49 De bniety ni zuguané Jesús, chi gunádeb xa xquel cayac ax gunabdiidxdeb laany:

—Dad, ¿la sbéen spad?

50 Chiy tuby de xpinny baanb# herid xmos bxoz ni rnabee de bxoz, btiub diagu#y lad naldí.

51 Per Jesús raipy laadeb:

—Agüelee. Gulsaandeb.

Chiyru bguaald Jesús diag mosqui ax bsiacny diagu#y.

52 Chiyru raipny de bxoz ni rnabee de bxoz cun de biny ni rnabee lo de ni rcualo yudoroo xte Jerusalén ne cun de gurtisy xte de bniety Israel, de ni beed par chané laany:

—¿Xínii zéedti cun spad ne cun yag, par chanét nare zecpacza tuby gubaan?

⁵³ Llillite guzuguanía laat laniudoroo xte Jerusalén ne nicli quit bguaaldti nare. Per anre abdziny hor xtenti, hor ni inabee bindxab laat. *(Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

⁵⁴ Chiy chi gunaazdeb Jesús, güenédeb laany liz bxoz ni rnabee de bxoz ax guzanald Bed de zit.

⁵⁵ Ruy baany de binqui tuby bal iruldti lo patiqui, ax gurideb ruu balqui. Ne néza Bed guriné laadeb ruy.

⁵⁶ Chiy chi guná tuby criad laab zubbi ruu bal, bguiaangui lob ax guniingui:

—Né laab candzanéb Jesús.

⁵⁷ Per Bed quit niziruutib ax raipbi gunaaqui:

—Quit rumbeetiab.

⁵⁸ Alizypacqui, chi guná stuby bindequi laab ax raipiy laab:

—Né liú noo tuby saadeb.

Per Bed guniib:

—Ing, Dad, gati xpintib naa.

⁵⁹ Chi guc zecti tuby hor, guu stuby ni gunii:

—Nédxa bnietyqui candzané Jesús, te pur néza laab náb bniety Galilea.

⁶⁰ Chiy gunii Bed:

—Nicli quit ganna xing rniiu.

Ne horac ni canii Bed ziy, bcuarsee tuby bidygay.

⁶¹ Chiy Jesús bziecquilony bguiaany nez lo Bed, as güenelaazbi ni raipy Jesús laab: “Anste ni icuarsee bidygay anre, liú pur chon güelt aguniuu dec quit rumbeetiu nare.”

⁶² Chiyru bdiia Bed láani patiqui ne
quesentiand ruunbi tant nalas bziienbi.
(*Mt. 26:67-68; Mr. 14:65*)

⁶³ De biny ni cacualo Jesús baandeb burli
laany ne btaazdeb laany.

⁶⁴ Bchiideb lony ax btaazdeb laany chiy
raipdeb laany:

—¡Guniyáa, túy btaaz liú!

⁶⁵ Ne zienru de diidx mal raipdeb laany.
(*Mt. 26:59-66; Mr. 14:55-64; Jn. 18:19-24*)

⁶⁶ Chi bragueel, sidoo bdxasaa de gurtisy xte
de bniety Israel, ne de bxoz ni rnabee de bxoz
cun de maistri ni nán ley, ax güenédeb Jesús rut
dxasaa irate de gurtisy xtendeb. Ruy
gunabdiidxdeb laany:

⁶⁷ —Gunii dumni, ¿ta liú noo Crist?

Laany cuaibny:

—Belati nare iniia laat dec nare naa Crist laat
quit chaldilaaztit.

⁶⁸ Ne belati xi inabdiidxzaca, laat quit icaibtit,
nicza quit íldatit nare.

⁶⁹ Per desdi anre Bniety ni bxiaald Dios subbi
lad naldí xte Dios ni rnabee.

⁷⁰ As iratedeb gunabdiidxdeb laany:

—¿Ta liúy Lliin Dios?

Jesús cuaibny:

—Guldícti, narelay.

⁷¹ Chiyru guniideb:

—¿Xílesa par idílyrun testigu? Lagac dumni
abindiagni ni guniib cun diidx ruupacbi.

23

(*Mt. 27:1-2, 11-14; Mr. 15:1-5; Jn. 18:28-38*)

¹ Chiy hóracqui güesú iratecdeb, güenédeb Jesús lo Pilat.

² Ruy guzulo rcuaquiadeb laany dixú, rniideb:

—Dunni bdxialni bínqui cayunbi engany de bniety ladxni. Rniib dec quit náti par idillyni xte impuest lo gobernador xte Roma, ne ziyza rniib dec laab náb Crist ne rey.

³ Chiy gunabdiidx Pilat laany:

—¿Ta liúy Rey xte de bniety Israel?

Jesús cuaibny:

—Guldícbiu narelay.

⁴ Chiy Pilat raipbi de bxoz ni rnabee de bxoz cun irate de biny:

—Xíteete xfalti bniétré quit rdxialtia.

⁵ Per laadeb güelaaru guniideb mazru diip:

—Laab cayunbi engany de bniety iduibte nez Judea cun de cos ni rseedbi de bniety. Guzulob nez Galilea anre ax cayunbi ziy nezré.

⁶ Chi bindiag Pilat ziy, gunabdiidxbi laadeb la Galilea ná ladx Jesús.

⁷ Ne chi guniideb dec laany nány bniety Galilea, ax bxiaaldbi laany lo Herodes ni rnabee Galilea, te pur láani de dxiqui zuguaaza Herodes Jerusalén.

⁸ Chi guná Herodes Jesús quesentiand rzaclaazbi te pur agulal rcaazbi iniáb laany. Abindiagbi rzeet de bniety laany, ne canuub iniáb gúnny tuby milagri.

⁹ Zieny de cos gunabdiidxbi laany, per Jesús xíteete quit cuaibtiny.

10 Néza de bxoz ni rnabee de bxoz zuguaa ruy, cun de maistri ni nán ley, quesentiand purad rcuaquiadeb laany dixú.

11 Chiy Herodes cun de xsuldadbí quesentiand rnia baandeb trat laany, ne baandeb burli laany. Bguacudeb laany de lady zaac saa ni racu de rey. Chiy Herodes bxiaaldbí laany stuby lo Pilat.

12 Ne dxiqui guzulo rchaa Herodes Pilat, per anste gac ziy laadeb bdxichnesaadeb.
(Mt. 27:15-26; Mr. 15:6-15; Jn. 18:39—19:16)

13 Chiy Pilat bchasaab de bxoz ni rnabee de bxoz cun de gurtisy cun de biny,

14 ax guniib:

—Laat bednét bniétré. Guniit dec cayunbi engany de bniety. Per nez lot agunabdiidxab ne xíteete falt xtenbí quit nidxialtia zec ni rniit pur laab.

15 Ziygacza rey Herodes, pur ningui bziecquibí bnietqui luaa. Agunalot xíteete mal gady gúntib par gatybí.

16 Anre gúna castigubí chiyru ildaab.

17 Pilat lo de dxi laníqui rldáb tuby pres zec ni guc costumbri.

18 Per iratedeb guzulo rbixtiadeb:

—¡Gudinxúbiu bínqui! ¡Bldábiu Barrabás!

19 Ne Barrabás guluudebíy láani lizguiib pur ni baaniy tuby didxguidx Jerusalén, ne pur gudinxúngui biny.

20 Pilat rcaazbí nildáb Jesús, ax guninéb laadeb stuby güelt,

21 per laadeb güelaaru gurixtiadeb:

—¡Bcuaabiub lo cruzy! ¡Bcuaabiub lo cruzy!

22 Ni rac chon güelt raipy Pilat laadeb:

—Per, ¿xill mal abaany bnietchi? Nare xíteete quit xi xfaltib rdxiala par gatybi. Gúna castigubi chiyru ildaab.

²³ Per laadeb güelaaru gurixtiadeb, raipdeb Pilat dec ícuaab Jesús lo cruzy. Ne tant ni rbixtia de biny cun de bxoz ni rnabee de bxoz, baandeb gan guc zec ni rcaazdeb.

²⁴ Pilat guzigueldbi baanbi zec ni rcaazdeb.

²⁵ Ziy xquel guc baanbi zec ni gunii de biny. Bldáb Barrabás ni guu láani lizguiib pur didxguidx ne pur gudinxúb biny, ax baanbi entriagu Jesús par bannédeb laany zec ni bcaazdeb.

(Mt. 27:32-44; Mr. 15:21-32; Jn. 19:17-27)

²⁶ Chi zénédeb Jesús par icany lo cruzy, gunaazdeb tuby bniety ni zá nez Cirene laab bdialáb Simóny. Zectisy ni zá nez lo guiix ax gunabeedeb laab par gucnéb biaab cruzy xte Jesús, guzanaldnébny.

²⁷ Zienguilliú bniety guzanald laany, ne zieny de bniety gunaa ruun ne rbixtiadeb pur rgádeb laany.

²⁸ Per Jesús bguiaany lodeb ax raipny laadeb:

—De gunaa Jerusalén, quit ruunti pur nare, gulguun pur lagac laat ne pur de lliinti.

²⁹ Te pur teru idziny dxi ni iniit: “Xíclabaa de gunaa ni quit nialeeti nicáa bdoo, de ni quit níuti líinni, de ni quit nitiioti bdoo.”

³⁰ Chiy sulo gaipy de bniety de dany: “Gulxaat quian”, ax gaipdeb de lóm: “Gulcuaats dunni.”

³¹ Ne anre narecla cayunnédeb zeec, ¿latixcu laat tuguan xa teedti?

³² Ne néza tiop gubaan zénédeb par ica lo cruzy cun Jesús.

³³ Chi bdzindeb rut lá Calver, bcuaadeb Jesús lo cruzy, cun iropte de gubaanqui: tubybi cua lad naldí stubybi cua lad rbez.

³⁴ Ne chi cacuaadeb Jesús lo cruzy, ax guniiny: —Xtada, baanbiu perdón de binqui, te pur quit gántideb xing rundeb.

Chiy de suldadqui gudzitdeb dád quia xab Jesús par bgaaizni lodeb.

³⁵ Chiy de biny rdxalodeb zuguaadeb ruy, ne axt de gurtisy run burli laany, raipdeb laany:

—Gucnéb stuby de bniety. Anre su gacnéb lagac laab, belati guldípacbi laabiy náb Crist ni bcuabee Dios.

³⁶ Néza de suldadqui run burli laany, rbigaxdeb ax rdeeddeb laany vinagri

³⁷ raipdeb laany:

—Belati liú noo Rey xte Israel, bldá lagac liú.

³⁸ Ne cua tuby letrer nez quiany cun diidx griego, diidx latín ne cun diidx hebreo. Letrerqui rnii: BNIETRÉ NÁ REY XTE DE BNIETY ISRAEL.

³⁹ Chiy tuby de gubaan ni cuaza lo cruzy cun laany raipbi laany de mal diidxré:

—Belati liú noo Crist, bldá liú, ne bldáza durni.

⁴⁰ Per stubybi gudildnéb xcumpnierbiqui, raipbi laab:

—¿Ta quitrul rdxibiu Dios masqui saagac castiguqui cadeedu?

⁴¹ Durni riáldquipacni guelziic, te pur zeec riáld idillyni pur de cos ni abdxanni. Per bnietyqui xíteete mal gady gúntibi.

⁴² Chiy raipbi laany:

—Jesús, güenelaazbiu nare chi acanabeebiu.

⁴³ Ax raipy Jesús laab:

—Nare rniia liú dec andxiacré suguaníu nare llayabaa.

(Mt. 27:45-56; Mr. 15:33-41; Jn. 19:28-30)

⁴⁴ Chi guc laidxi, chiy iduibte lo guichliu bcay, axtqui rca chon gudxi.

⁴⁵ Bcay gubidx, ne cortin ni guzaaiby laniudoroo xte Jerusalén gullaani, iruldti gucni.

⁴⁶ Chiy Jesús gurixtiany:

—Xtada, laznaabiu rsáana spírit xtena.

Ne chi guniiny ziy, ax gutyny.

⁴⁷ Chi guná capitán xte de suldad romanqui irate zec ni guc, ax guniib de diidx zaac par Dios. Laab guniib:

—Didxldícazaquiy dec xíteete malti quit baanti bnietqui.

⁴⁸ Irate de bniety ni zuguaa ruy chi gunádeb irate zec ni guc, zégacdeb rgapdeb rulazdoodeb pur guelnalas ni bziiendeb.

⁴⁹ Per irate de bniety ni rumbee Jesús, cun de bniety gunaa ni guzanald laany desde Galilea, zit güesuguaadeb par bguiaadeb irate de cosré.

(Mt. 27:57-61; Mr. 15:42-47; Jn. 19:38-42)

⁵⁰ Guu tuby bniety nguii ni guc güen ne baanbi zec ni riáld. Laab bdialáb Gusé. Ladxbi guc guidx ni lá Arimatea, tuby guidx xte Judea. Laab guchi tuby gurtisy xte de bniety Israel.

⁵¹ Guséqui canuub guelrnabee xte Dios, ningui quit néti laab níub xlad de ni gudinxú Jesús.

⁵² Chiyru güeninéb Pilat par güenaabbi xcuerpi Jesús.

⁵³ Chi gulull bldiatbi xcuerpiny lo cruzy, ax btuuibiny tuby sábni zaac. Chiy güecuaatsdebny láani tuby baa ni gudaanydeb láani tuby guia, rut ruteete gady tu igaatsti.

⁵⁴ Dxi qui ná vispri xte dxi ni rzilaaz bniety. Ne apac sulo dxi ni rzilaaz bniety hor ni güecuaatsdeb Jesús.

⁵⁵ De bniety gunaa ni bedné Jesús desdi Galilea, güedeb ax gunádeb baa xte Jesús ne gunázadeb xa xquel gudixdeb xcuerpiny.

⁵⁶ Chiy chi biacquideb ax güeganchuudeb perfum ne unguent ni rldianaxy. Chiyru bzilaazdeb dxi ni rzilaaz bniety zec ni rnabee ley.

24

(Mt. 28:1-10; Mr. 16:1-8; Jn. 20:1-10)

¹ Chitmingu sidoote, de bniety gunaaqui güedeb ruu baa xte Jesús, güenédeb de perfum ni banchuudeb. Ne güénezadeb stuby stiop de bniety gunaa ni baany company laadeb.

² Chi bdzindeb ruy, gunádeb dec guiaroo ni bdaagu ruu baaqui aquit nágaatini xlatni.

³ Ax biiudeb per aquit bdxialtideb xcuerpi Xtadni Jesús.

⁴ Ne laiquipac cadxibdeb quit racbeedeb xa gúndeb, chi gunádeb tiop bniety nguiiu zuldí gax rut zuguaadeb, nacudeb lady rcuabcháa.

⁵ Ne de tant bdxibdeb ax bsabquiadeb axt lo liu, chiy de bniety nguiiqui raipy laadeb:

—¿Xínii rguílyti tuby bniety ni nabány lo de binguty?

⁶ Laany aquitiny ruré, te pur agubánny. Gulchanelaaaz ni guniiny laat chi zuguaany Galilea.

⁷ Guniiny laat dec laany ni nány Bniety ni bxiaald Dios, ná par gacny entriagu laznaa de binduld, par icuaadebny lo cruzy, ne ni rion dxi, sbíi ibánny stuby.

⁸ Chiyru güenelaazdeb de diidx ni raipy Jesús laadeb,

⁹ ne chi bzadeb ruu baaqui gudixteedeb irate zec ni gunádeb lo tsibtuby xpiny Jesús ne lo irateru de bniety.

¹⁰ María Magdalena, cun Lluan, cun María xnan Jacob, cun stuby de bniety gunaa, laadeb ná ni güenédeb rsonqui lo de apóstol.

¹¹ Per laadeb xíteete quit güeldilaaztided ni gunii de bniety gunaaqui te pur rlilodeb dec rniizideb.

¹² Per Bed blluuinbi güeguaaab láani baaqui. Ne chi guzurlob bguiaab láanqui, sábnizi ni bduuibny gunáb, ax zíagacbi rdxalob pur ni agucqui.

(Mr. 16:12-13)

¹³ Dxigacqui, tiop de xpiny Jesús zédeb tuby guidx ni lá Emaús, zecti tsibtuby kilómetro ná ruy par Jerusalén.

¹⁴ Chi zédeb nez ax cayueedeb diidx irate zec ni guc.

¹⁵ Lalzi ni cayueedeb diidx, lagacqui Jesús güebinnu laadeb ax cazanégacny laadeb.

¹⁶ Per masqui caguaadebny, per Dios quit nisaantiny niombeegadebny.

¹⁷ Chiy gunabdiidx Jesús laadeb:

—¿Xing rueet lalzi cazat? Ne, ¿xíni la nalas nuut?

¹⁸ Tubybi lá Cleofas, laab cuaibbi:

—Irate biny nán ni guc Jerusalén láani de dxic. ¿Ladxa liúziu ni gulezu Jerusalén quit gucbiiu xi cos guc?

¹⁹ Chiy laany raipny laadeb:

—¿Xi guc?

Ax raipdeb laany:

—Xte ni bannédeb Jesús de Nazaret, laany gucny tuby profet ni gúp guelrnabee zecli pur de cos ni baanny ne zecliza de diidx ni guniiny nez lo Dios ne nez lo de bniety.

²⁰ Ne cun de bxoz ni rnabee de bxoz ne de gurtisy xtenti baandeb entriaguny par gatyny ax bcuaadebny lo cruzu.

²¹ Par dundi dec laaniy ná ni niacnény naciony Israel. Per anre azé láani chon dxi ni guc irate de cosré.

²² Masqui tuby tiop de bniety gunaa ni zuguané dundi abchibdeb dundi, te pur nabaa sidoote güedeb ruu baaqui,

²³ ne cun quit bdxialtidede xcuerpiny, ax biecuideb rueedeb diidx dec bliulo de ángli lodeb raipy de ángliqui laadeb dec Jesús nabány.

²⁴ As güeguiaa tuby tiop de xcumpnierni ruu baaqui ax gunádeb zectisy ni gunii de bniety gunaaqui, per quit gunátidede Jesús.

²⁵ Chiy raipny Jesús laadeb:

—¡Xípalza gulliaaza racbeet ne racldaaza par chaldilaazti irate ni gunii de profet desde gulal!

²⁶ ¿Tatix quit ná par teed Crist guelzii xte de cosqui chiyru cuzny llayabaa?

²⁷ Chiyru guzulo caguxteeny lodeb xi zelo irate ni zéed lo xquiits Dios pur laany. Guzulony cun de libri xte Moisés ax güelaatecny cun irate de libri ni bcuaa de profet.

²⁸ Chi bdzindeb guidx rut zédeb, Jesús baanny zec ni chalaaru chiany.

²⁹ Per laadeb baandeb juers laany par yáanny, raipdebny:

—Biannébiu dunní, te agudxini, ne ayiiu guxinni.

Chiyru biiu Jesús par yannény laadeb.

³⁰ Ne chi zubnény laadeb lo milly ax cuány guechtily, chiy chi gulull bdeedny gracy Dios ax blullny guechtilqui par bdeedny laadeb.

³¹ Hóracqui gucdeb zec ni teste bllal bsloni ax bambeedeb laany. Per chiy gunitlogacny,

³² ax raipy tubybi stubybi:

—¡Niycazaquiy quesentiandquiza zacru xquel bziienni chi ziopnény nez, chí caniiny dunní xi zelo ni rnii lo xquiits Dios!

³³ Chiy quítru guleztideb, biunezgakdeb ax bieacquideb par Jerusalén, rut dxasaa tsíbtuby xpiny Jesús cunru de xcompnierdeb.

³⁴ Chiy raipdeb de bnietqui:

—Didxldícpacquiy dec agubány Xtadni Jesús, ne abliulony lo Simóny.

³⁵ Chiyru laadeb beedeb diidx xa xquel guc chi zédeb nez, ne xquel ni bambeedeb Jesús chi blullny guechtily.

(Mt. 28:16-20; Mr. 16:14-18; Jn. 20:19-23)

³⁶ Zeczi cayueedeb diidx xte de cosqui, chi bliulo Jesús glaytideb ax bguaapnydios laadeb guniiny:

—Dios iguaadny laat guelnaldiulaaz.

³⁷ Laadeb quesentiand bdxalodeb ne bdxibzadeb, pur ni baandeb xgab dec tuby spírit bingutiy gunádeb.

³⁸ Per Jesús raipy laadeb:

—¿Xínii rdxibtí? ¿Xínii runtioplaaztí?

³⁹ Gulguiaa de naa ne de niaa. Lagac narening. Gulguaald ne gulguiaa nare, te pur tuby spírit quit nátni de dzit ne de beel zec ni rianlot nare.

⁴⁰ Chi guniiny ziy ax bliuuny de naany ne de niiny.

⁴¹ Per laadeb zeczi quit reldilaaztídebny ne de tant ni rzaclaazdeb ne rdxalodeb, ax raipny laadeb:

—¿Ta nuu xi naptí iquiinia?

⁴² Chiyru bdeeddeb tuby ldaa beld biguii cun tuby ldaa dziny,

⁴³ ax cuánny de cosqui bquiiny nez lodeb.

⁴⁴ Chiyru raipny laadeb:

—Ni agudedá niy ná irate ni guniaa laat chi zeczi zuguaníaa laat: dec ná par gac irate de cos ni cá lo libri pur naa, zecli lo libri xte Moisés cun lo de libri xte de profet, ne lo libri xte salmos.

⁴⁵ Chiy hóracqui bxaalny xquelriendeb par gucheedeb ni rnii lo xquiits Dios,

⁴⁶ ax raipny laadeb:

—Lo xquiits Dios rnii dec Crist ná par teedny guelzii, ne ni rion dxi, sbíi ibánny stuby.

⁴⁷ Chiy desde Jerusalén sulo iríich diidx axtqui iduibte lo guichliu, dec nuu perdón par irate de

bniety ni yialaaz pur de xtuldni ne chaldilaazdeb nare.

⁴⁸ Laat nát testigu xte irate de cosqui.

⁴⁹ Ne nare sxiaalda par laat ni agunii Xtada. Per gulsuguaazic láani guidx Jerusalénqui axtisy icáat guelrnabee ni gueed desde llayabaa.

(Mr. 16:19-20)

⁵⁰ Chiyru bdiané Jesús laadeb láani guidx Jerusalén, güenény laadeb nez Betania, ax bldiasny de naany banldeeny quiadeb.

⁵¹ Ne lalzi ni cayunldeeny quiadeb, ax guasny zégacny yabaa.

⁵² Laadeb chi gulull btodebny ax bieccuideb par Jerusalén quesentiand rzaclaazdeb.

⁵³ Ne lillite nuudeb laniudoroo xte Jerusalén rniideb de diidx zaac pur Dios. Amén.

Xtiidx Dios cun ditsa
New Testament in Zapotec, San Juan Guelavía
(MX:zab:Zapotec, San Juan Guelavía)

copyright © 1995 Wycliffe Bible Translators, Inc.

Language: Zapotec, San Juan Guelavía

Translation by: Wycliffe Bible Translators, Inc.

Zapotec, San Juan Guelavía

zab

Mexico

Copyright Information

© 1995, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, San Juan Guelavía

© 1995, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 12 Jun 2026 from source files dated 29 Jan 2022

4b6898c2-1ae7-5b64-b781-1a33bd63388f